

ԱՐՄԵՆ ԱՍՐՅԱՆ

ԱՐԱՄ ՄԱՆՈՒԿՅԱՆ

ԿՅԱՆՔԸ ԵՎ ԳՈՐԾՈՒՆԵՈՒԹՅՈՒՆԸ

ԵՐԵՎԱՆ 2009

929 : 947.925 Օսմանյան

✓

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳԻՏՈՒԹՅՈՒՆՆԵՐԻ ԱԶԳԱՅԻՆ ԱԿԱԴԵՄԻԱ
ՊԱՏՄՈՒԹՅԱՆ ԻՆՍՏԻՏՈՒՏ

Խ. ԱՔՈՎՅԱՆԻ ԱՆՎԱՆ ՀԱՅԿԱԿԱՆ ՊԵՏԱԿԱՆ
ՄԱՆԿԱՎԱՐԺԱԿԱՆ ՀԱՄԱԼՍԱՐԱՆ
ՀԱՅՈՑ ՊԱՏՄՈՒԹՅԱՆ ԱՄԲԻՈՆ

ԱՐՄԵՆ ՍԵՐՅՈՒԺԱՅԻ ԱՍՐՅԱՆ

ԱՐԱՄ ՄԱՆՈՒԿՅԱՆ
ԿՅԱՆՔԸ ԵՎ ԳՈՐԾՈՒՆԵՈՒԹՅՈՒՆԸ

ՆԿԻՐՎՈՒՄ Է ԱՐԱՄ ՄԱՆՈՒԿՅԱՆԻ ԾՆՆԴՅԱՆ 130-ԱՄՅԱԿԻՆ


ՄԵՍՐՈՊ ԱՐՔ. ԱՇԵՆԱՆ
ՄԱՏԵՆԱԾՈՐ
50



ARCH. MESROB ASHJIAN
BOOK SERIES
50

Sp. Ashjian

ԵՐԵՎԱՆ
ՀՀ ԳԱՄ պատմ. ինստ
2009



ՀՏԴ 941 (479.25)

ԳՄԴ 63.3 (23)

Մ 283 Ա.

Տպագրվում է ՀՀ ԳԱԱ պատմության ինստիտուտի գիտական
խորհրդի որոշմամբ

Պատասխանատու խմբագիր՝ ՀՀ ԳԱԱ թղթակից անդամ
Աշոտ Մելքոնյան

Մ 283 Ա. Ասրյան Ա. Ս.

Արամ Մանուկյան. կյանքը և գործունեությունը.- Եր.: Պատմ.
ինստ., 2009,- 114 էջ:

Աշխատության մեջ արխիվային վավերագրերի, ժամանակի մա-
մուլի և այլ սկզբնաղբյուրների, հուշագրական և պատմագիտական տա-
րաբնույթ զրականության հիման վրա գիտականորեն ներկայացվում է
հայոց պատմության նշանավոր դեմքերից մեկի՝ 20-րդ դարասկզբի խոշո-
րագույն ազգային-քաղաքական ու պետական գործիչ, Հայաստանի
առաջին հանրապետության հիմնադիր Արամ Մանուկյանի
(1879 - 1919 թթ.) կյանքը և գործունեությունը:

ISBN 978-99941-73-35-8

ԳՄԴ 63.3 (23)



ԱՐԱՄ ՄԱՆՈՒԿՅԱՆ
(1879 - 1919)

«Երբ գիշերը գայ, մտեք ձեր հոգիի սենեակը և խօսեցեք ձեր խղճի հետ և ըսեք, արդեօք աշխատե՞ր էք հայ ժողովրդի համար, ինչպես Արամը, եղե՞ր էք այնքան անձնագոհ, որքան Արամը, տւե՞ր էք ձեր ամբողջ կեանքը հայ ժողովրդին, ինչպես Արամը...»:

Նիկոլ Աղբալյան

Արամ Մանուկյանը հայոց պատմության մեծերից է, հայոց նորագույն պատմության մեջ իր կատարած դերով ամենախոշոր, կենտրոնական դեմքը: Անհնար է պատկերացնել նոր ժամանակներում Հայոց անկախ պետականության վերականգնման փաստը, առանց վերհիշելու և արժևորելու Արամ Մանուկյանի կյանքն ու գործունեությունը: Հայոց պատմության ներկա փուլում, երբ մեր ժողովուրդը ջանքեր է գործադրում Հայաստանի երրորդ հանրապետության կայացման և ամրապնդման ուղղությամբ, մեծ հայրենասերի անցած ուղու ուսումնասիրությունն ու գնահատումը գիտատեսական ու գործնական բացառիկ կարևորություն է ներկայացնում: Ազգային ոգու բարձրացմանն ու ազգային ուժերի համախմբմանը, հայոց պետականության վերականգնմանը ուղղված նրա արդյունավետ ձեռնարկները, տիրող իրավիճակին չհամակերպվելու և շրջապատին չենթարկվելու նրա անսասան վճռականությունը, իրատեսական մոտեցումը ժողովրդի առջև ծառացած խնդիրներին կարող են օրինակելի լինել մեր պետական այրերի, հասարակական-քաղաքական ուժերի համար, որպեսզի ընկալեն, թե ճգնաժամային իրավիճակներում ինչպես պետք է համախմբեն ժողովրդին՝ հայրենիքը շենացնելու և հզորացնելու, ներքին և արտաքին մարտահրավերները դիմակայելու համար: Այն կարող է նպաստել մատաղ սերնդի ազգային ոգով դաստիարակությանը, ուսանողության և հասարակության տարբեր խավերի ազգային ու պետական մտածողության ամրապնդմանը:

Արամի անձը և գործունեությունը մշտապես գտնվել են պատմագիրների ուշադրության ներքո: Նրա մասին, մահվանից (1919թ. հունվարի 29) անմիջապես հետո, սկզբնապես և՛ Հայաստանում, և՛ արտերկրում,

իսկ Հայաստանի խորհրդայնացումից հետո միայն արտերկրում, հրատարակվել են բազմաթիվ համառոտ կենսագրականներ և կյանքի ու գործունեության առանձին դրվագներին նվիրված հուշագրություններ: Նրա գործունեության առանձին կողմեր տեղ են գտել նաև քննարկվող ժամանակաշրջանի վերաբերյալ ժամանակակիցների կողմից գրված հուշերում, հազվադեպ՝ նաև հայ պատմաբանների աշխատություններում:

Արդեն 1919թ. փետրվարի 9-ին Երևանի «Զանգ» թերթում Արամ Մանուկյանի կենսագրականով հանդես եկավ Ս. Վրացյանը¹: Երևանի «Աշխատանք» թերթի խմբագրությունը նրա հիշատակին նվիրեց թերթի առանձին թողարկում²: «Հայրենիք» ամսագրի խմբագրությունը 1922թ. նոյեմբերին հրատարակեց Ս. Վրացյանի և Ռուբեն Տեր-Մինասյանի կազմած Արամի կենսագրականը՝ ներկայացնելով գործչի կուսակցական-հեղափոխական գործունեությունը մինչև Արևմտյան Հայաստան շարժվելը (1904թ. հոկտեմբեր)³: Արամին նվիրված կենսագրականներ հրատարակվեցին նաև հետագայում⁴: 1923թ. Օ. Մխիթարյանը հրատարակեց Արամի հեղափոխական և մարդկային նկարագրի բնութագրմանը նվիրված հոդված⁵: Սարգսրապատի ճակատամարտի օրերին Արամի վնասված դերը ներկայացրեց նրա գործակից Ա. Շահխաթունին⁶: 1925թ. «Հայրենիք» ամսագրում տպագրած հուշ-հոդվածում Վ. Նավասարդյանը տվեց 1918թ. ամռանը Երևան ժամանած Խալիլի և Արամի հանդիպման պատմությունը⁷: Ռուբենն իր հուշերում, որոնք առաջին անգամ առանձին գրքերով լույս տեսան 1951-1952թթ. Լոս-Անջելեսում, իսկ հետագայում ունեցան մի շարք վերահրա-

¹ Վրացեան Ս., Արամ (Սարգիս Յովհաննիսեան), «Զանգ», Երևան, 1919, փետրվարի 9, N 16:

² «Աշխատանք»-ի բացառիկ՝ նվիրված Արամի հիշատակին, Երևան, 1919, փետրվարի 12, N 4:

³ «Հայրենիք»-ի խմբագրություն, Արամի կենսագրութիւնը, «Հայրենիք», Բոստոն, 1922, նոյեմբեր, N 1, էջ 26-31:

⁴ «Դրօշակ», Փարիզ, 1929, հունվար-փետրվար, N 1-2, էջ 26-32 և այլն:

⁵ Մխիթարեան Օ., Արամ, «Հայրենիք», 1923, հունիս, N 8, էջ 38-42:

⁶ Շահխաթունի Ա., Արամը. յիշողութիւններ, «Ճակատամարտ», Վ. Պոլիս, 1921, հունվարի 30, N 670 . 249; նույնի, Խալիլ փաշայի հանդիպումները Արամի հետ (Իմ յուշերից), «Հայրենիք», 1959, հուլիս, N 7, էջ 27-34; նույնի, Սարգսրաբադի հերոսամարտը եւ մահափորձը Արամ փաշայի դէմ (Իմ յուշերից), «Հայրենիք», 1959, օգոստոս, N 8, էջ 21-30:

⁷ Նավասարդեան Վ., Արամի կեանքից, «Հայրենիք», 1925, նոյեմբեր, N 1, էջ 75-79:

տարակուսություններ, այդ թվում Հայաստանում՝ 1990թ.⁸, հետաքրքիր մանրամասներ ներկայացրեց Արամի գործունեության կարսյան շրջանի (1903-1904թթ.), Արևմտյան Հայաստանում 1905-1912թթ. ծավալած գործունեության, նաև 1918թ. Երևանում ծավալված իրադարձություններին Արամի մասնակցության վերաբերյալ:

Կոմսը (Վահան Փափազյան) իր հուշերում հետաքրքիր մանրամասներ ներկայացրեց Վանում 1905-1914թթ. Արամ Մանուկյանի գործունեության, ինչպես նաև արևմտահայերի առաջին համագումարին (1917թ.) նրա մասնակցության մասին⁹:

Արամի վերաբերյալ իրենց հուշ-մեմագրություններում ուշագրավ տեղեկություններ են հաղորդում նաև Օ. Մխիթարյանը, Մալխասը (Արտաշես Հովսեփյան), Ս. Վրացյանը և ուրիշներ¹⁰: Օ. Մխիթարյանն իր մեմագրության մեջ արձանագրել է Արամի մասնակցությունը Վանի 1915թ. ապրիլյան հերոսամարտին, ինչպես նաև նրա ձեռնարկները որպես Վանի հայկական նահանգապետության նահանգապետի:

Վանում Արամի ծավալած գործունեության մասին տեղեկություններ կան նրա ժամանակակից ոչ դաշնակցական գործիչների՝ ռամկավարներ Ա. Դարբինյանի, Ա. Եկարյանի, Ա. Թերզիբաշյանի, անկուսակցական Հ. Երամյանի հուշ-մեմագրություններում¹¹:

Արամի գործունեության մասին արժեքավոր հիշատակություններ կան օտարազգի ժամանակակիցների մեմագրություններում¹²: Արամի

⁸ Ռուբեն, Հայ յեղափոխականի մը յիշատակները, հ. 1-7, Երևան, 1990:

⁹ Փափազեան Վ., Իմ յուշերը, հ. Ա, Պոսթըն, 1950, հ. Բ, Պէյրուք, 1952:

¹⁰ Մխիթարեան Օ., Վանի հերոսամարտը, Սոֆիա, 1930; Մալխաս, Ապրումներ, հ. Ա, Պէյրուք, 1956; Վրացեան Ս., Հին թղթեր նոր պատմութեան համար, Բէյրութ, 1962; Նույնի, Կեանքի ուղիներով: Ղէպքեր, դէմքեր, ապրումներ, հ. Դ, Պէյրուք, 1965, հ. Ե, Բէյրութ, 1966; Նույնի, Հայաստանի Հանրապետություն, Երևան, 1993:

¹¹ Դարբինեան Ա., Հայ ազատագրական շարժման օրերէն (Յուշեր 1890էն 1940), Փարիզ, 1947; Յուշեր Արմենակ Եկարեանի, Խմբագրեց՝ Լ. Աճեմեան, Գահիրէ, 1947; Թերզիբաշեան Ա., Անդրանիկ, Փարիզ, 1942; Երամեան Հ., Յուշարձան Վան-Վասպուրականի, Աղեքսանդրիա, 1929:

¹² Սորգենթաու Հ., Ամերիկյան դեսպան Հենրի Սորգենթաուի հուշերը և հայկական եղեռնի գաղտնիքները, Թարգմանիչ՝ Ենովք Արմեն, Երևան, ֆաքս. հրատ., 1990; Henry B., Au Pays de L'Espouvanter: L'Arménie Martyre. Préface de M. Paul Deschanel, Paris, 1917; Լեփսիուս Յ., Գաղտնի տեղեկագիր տոգթ. Եփաննես Լեփսիուսի, Հայաստանի ջարդերը, Կ. Պոլիս, 1919 և այլն:

գործունեության առանձին դրվագներ արժանագրվել են նաև սփյուռքում հրատարակված մի շարք աշխատություններում¹³։

Արամի գործունեության մասին ուշագրավ նյութեր կան Հայաստանում հրատարակված փաստաթղթերի և նյութերի ժողովածուներում¹⁴, «Բանբեր Հայաստանի արխիվների» գիտական համդեսի թողարկումներում¹⁵։

Սկզբնաղբյուրային առատ տեղեկություններ կան ՀՀ Ղաշնակցության պատմության նյութերի հատորյակներում¹⁶։

Արամի կյանքի ու գործունեության համեմատաբար ծավալուն և տարողունակ շարադրանքը տվել է 1918թ. ճակատագրական ամիսներին նրա գործակից Արշալույս Աստվածատրյանը։ Դեռևս 1934-1935թթ. «Կեն»

¹³ Hovannisian R., The Republic of Armenia, vol. I, The First Year, 1918-1919, Berkeley-Los Angeles-London, 1974; Մույնի, Armenian Van/Vasurakan, U.S.A., 2000; Ter Minassian A., La République d'Arménie (1918-1920). La mémoire du siècle, Bruxelles, 1989 և այլն։

¹⁴ Հայաստանը միջազգային դիվանագիտության և սովետական արտաքին քաղաքականության փաստաթղթերում (1828-1923), Խմբագիր Ջ. Կիրակոսյան, կազմողներ Ջ. Կիրակոսյան, Ռ. Սահակյան, Երևան, 1972; Հայերի ցեղասպանությունը Օսմանյան կայսրությունում։ Փաստաթղթերի և նյութերի ժողովածու, Խմբագիր Մ. Ներսիսյան, կազմողներ՝ Մ. Ներսիսյան, Ռ. Սահակյան, Երևան, 1991; Геносид армян в Османской империи: Сборник документов и материалов под редакцией М. Г. Нерсисяна. Составители М. Нерсисян, Р. Саакян, Ереван, 1982; Армянский вопрос и геноцид армян в Турции (1913-1919). Материалы Политического архива министерства иностранных дел Кайзеровской Германии. Сборник. Составитель, ответственный редактор, автор предисловия, введения и примечаний В. Минкасян, Ереван, 1995; Հայաստանի Հանրապետությունը 1918-1920թթ., (Քաղաքական պատմություն)։ Փաստաթղթերի և նյութերի ժողովածու, Պատ. խմբագիրներ՝ Գ. Գալոյան, Վ. Ղազախեցյան, Երևան, 2000; Հայաստանի Հանրապետության պառլամենտի օրենքները (1918-1920թթ.), Պատասխանատու խմբագիրներ՝ Միրզոյան Ս., Սամիկոնյան Ֆ., Երևան, 1998։

¹⁵ Ավետիսյան Մ., Փաստաթղթեր Արամ Մանուկյանի պետական գործունեության մասին, «Բանբեր Հայաստանի արխիվների», Երևան, 1990, N 2, էջ 133-152; Андраник Озаян, Документы и материалы, Главный редактор Галоян Г., «Բանբեր Հայաստանի արխիվների», Երևան, 1991, N 1-2; Հայոց Ազգային Համախորհրդակցությունը (Թիֆլիս, 1917թ. սեպտեմբեր-հոկտեմբեր), Փաստաթղթեր ու նյութեր, Խմբագիր՝ Վ. Ղազախեցյան, «Բանբեր Հայաստանի արխիվների», 1992, N 1-2։

¹⁶ Նիւթեր Հ.Հ. Ղաշնակցութեան պատմութեան համար, Պատրաստեց եւ խմբագրեց Տասնապետեան Հ., և. Բ, Պէյրուք, 1985; և. Գ, Բէյրուք, 1976; և. Դ, Բէյրուք, 1982։

ամսագրի¹⁷ և 1951թ. «Հայրենիք» ամսագրի էջերում նա շարադրել էր իր հուշերը Արամի երևանյան շրջանի (1918թ.) գործունեության մասին¹⁸։ «Հայրենիք» ամսագրի էջերում (1963թ. նոյեմբերից 1964թ. օգոստոս) հրատարակած հոդվածաշարում Ա. Աստվածատրյանը, իր իսկ մատնանշամբ, որպես աղբյուրներ ունենալով Արամի, Կոմսի, Ռուբենի և իր անձնական հուշերը, Ս. Վրացյանի «Հայաստանի Հանրապետություն»ը, «Յուշապատում Հ.Յ. Դաշնակցության» գիրքը, նկարագրել է Արամի կյանքն ու գործը ծնունդից մինչև մահը¹⁹։ Նրանում վեր են հանվել Արամի նվիրվածությունը ազատագրական շարժմանն ու հայրենիքին, անշահախնդրությունն ու բարձր կամային հատկանիշները, ներկայացվել են նրա գործունեության մի շարք շրջաններ։

Ա. Աստվածատրյանի հոդվածաշարի, Արամի և այլ ժամանակակիցների հուշերի, ինչպես նաև մեմագրություններից վերցված հատվածների միավորմամբ 1969թ. կազմվեց Արամի մահվան 50-ամյակին նվիրված «Արամը» ժողովածուն, որը 1991թ. վերահրատարակվեց երևանում²⁰։ Ամբողջությամբ վերցրած՝ դրանք գնահատելի գործեր են եղել Արամի գործունեությանն աշխարհասփյուռ հայության բեկորներին ծանոթացնելու և հիշատակը վառ պահելու, նրա օրինակով սերունդներին դաստիարակելու առումներով։ Սակայն, դրանք չի կարելի համարել Արամի կյանքի և գործունեության մասին ամբողջական աշխատություն՝ ելնելով այն իրողություններից, որ դրանցում ներկայացված չեն Արամի կյանքի և գործունեության մի ամբողջ շարք խնդիրներ ու ժամանակահատվածներ, իսկ մի մասն էլ ներկայացված է թերի։

Ցավոք հայրենիքում երկար ժամանակ Արամի մեծությունն ի հարկին չգնահատվեց։ Հայաստանում խորհրդային կարգերի գոյության տասնամյակների ընթացքում հայրենական պատմագրությունը

¹⁷ Աստվածատրյան Ա., Արամը (յուշեր ու տպատրուրիւններ), «Վեմ», Փարիզ, 1934, նոյեմբեր-դեկտեմբեր, N 6, էջ 23-35, հունվար-ապրիլ, N 1, էջ 57-72։

¹⁸ Աստվածատրյան Ա., Արամը (յուշեր եւ տպատրուրիւններ), «Հայրենիք», Բոստոն, 1951, փետրվար, N 2, էջ 22-46։

¹⁹ Աստվածատրյան Ա., Արամը, «Հայրենիք», 1963, նոյեմբեր, N 11, էջ 33-52, դեկտեմբեր, N 12, էջ 69-80, 1964, հունվար, N 1, էջ 50-64, փետրվար, N 2, էջ 48-55, մարտ, N 3, էջ 29-42, ապրիլ, N 4, էջ 67-89, մայիս, N 5, էջ 72-80, հունիս, N 6, էջ 75-80, հուլիս, N 7, էջ 74-80, օգոստոս, N 8, էջ 35-41։

²⁰ «Արամը», Մահուան յիսնամեակին առթիւ, Երևան, 1991։

պարտադրված էր 19-20-րդ դարերի ազգային կարևորության իրադարձությունների, ազգային շատ ու շատ հերոսների թվում հրապարակավ եթե ոչ վատաբանելու, ապա մոռացության մատնելու կամ էլ ի միջի այլոց և խիստ վերապահումներով արտահայտվելու Արամի մասին²¹։ Իհարկե, երբեք չպետք է մոռանալ այն իրողությունը, որ երբեմն խորհրդահայ պատմագիտական միտքը կարողանում էր ճեղքել իր ճանապարհին հարուցված գաղափարական-քաղաքական արգելքները և ասել ճշմարտությունը պատմական ոչ այնքան հեռավոր անցյալի իրադարձությունների, նաև առանձին գործիչների, այդ թվում և Արամի մասին։ Դրա լավագույն օրինակներից է այն, որ դեռևս 1981թ. Հայկական սովետական հանրագիտարանում հրապարակվեց Արամի՝ ճիշտ է բավական զուսպ և հակիրճ, բայց ճշմարիտ կենսագրականը²²։ Իսկ որ գիտեին Արամի մեծության մասին և ցանկանում էին գնահատել այն, կասկածի ենթակա չէ։ Դրա վկայությունն է ՀՀ պատմության պետական թանգարանի (ՀՀ ՊՊԹ) նոր պատմության բաժնի վավերագրերի ֆոնդում պահվող Արամին նվիրված Հ. Թուրշյանի անտիպ հոդվածը։ Նրանում հեղինակը, ազատ լինելով ամեն տեսակ կապանքներից, բարձր է գնահատել Սարդարապատի հերոսամարտին Արամի մասնակցությունը²³։

Հայաստանի երրորդ հանրապետության հռչակումից հետո ստեղծվեցին բարենպաստ պայմաններ խորհրդային ժամանակաշրջանում պատմության անտեսված էջերի և պատմական գործիչների, այդ թվում և Արամ Մանուկյանի կյանքի և գործունեության ազգաշահ ուսումնասիրության համար։ Պարբերական մամուլում տպագրվեցին նրա գործունեությունն արժևորող մի շարք հոդվածներ, նրա գործունեության առանձին կողմեր տեղ գտան պատմագիտական հիմնարար արժեք

²¹ Թուրշյան Հ., Սարդարապատի հերոսամարտը, Երևան, 1965; Աղայան Ծ., Հոկտեմբերը և հայ ժողովրդի ազատագրական պայքարը, Երևան, 1982; Արզումանյան Ս., Արհավիրքից վերստնունդ, Երևան, 1973, Հարությունյան Ա., Թուրքական ինտերվենցիան Անդրկովկաս 1918թ. և ինքնապաշտպանական կռիվները, Երևան, 1984 և այլն։

²² Հայկական սովետական հանրագիտարան, հ. 7, Երևան, ՀՍՄՀ ԳԱ, 1981, էջ 254։

²³ ՀՀ ՊՊԹ, Նոր պատմության բաժնի վավերագրերի ֆոնդ, Թուրշյան Հ., Հուշեր նվիրված Վանի 1915թ. ինքնապաշտպանության հերոս Արամ Մանուկյանին, բաժնի մատյան 941, մայր մատյան 11844, ք. 39։

ներկայացնող աշխատություններում²⁴: 2004թ. ՀՀ ԳԱԱ Պատմության ինստիտուտին կից գործող մասնագիտական խորհրդում տողերիս հեղինակը պաշտպանեց Արամի կյանքին և գործունեությանը նվիրված թեկնածուական ատենախոսություն²⁵: Նրա հիման վրա 2005թ. հրատարակվեց Արամի կյանքի և գործունեության ամբողջական պատմությունը բովանդակող առաջին գիտական մենագրությունը²⁶, որը 2008 և 2009թթ. վերահրատարակվեց:

Սույն աշխատության մեջ, որը հանդիսանում է վերոհիշյալ մենագրության սեղմված տարբերակը, արխիվային նյութերի, ժամանակի մանուլի և այլ սկզբնաղբյուրների, այդ թվում Արամի հուշերի բնագրի և այլ գրառումների, ժամանակակիցների հուշերի, չեզոք (այդ թվում և օտարազգի) և ընդդիմադիր հեղինակների, հայրենի պատմաբանների հիմնարար աշխատությունների օգտագործման և վերլուծության միջոցով գիտականորեն ներկայացնում ենք Արամի կյանքի և գործունեության ամբողջական պատմությունը: Արամի ամբողջ կյանքը և կուսակցական, ազգային-քաղաքական ու պետական գործունեությունն իր բոլոր դրսևորումներով դիտարկել ենք որպես մեկ միասնական ամբողջություն, որպես հայ ժողովրդի ազատությանն ու գոյավիճակի բարելավմանը, անկախ պետականության վերականգնմանն ու ամրապնդմանը միտված գործի անբաժանելի բաղադրիչներ:

²⁴ Համբարյան Ա., Ազատագրական շարժումները Արևմտյան Հայաստանում (1898-1908թթ.), Երևան, 1999; Սիմոնյան Հ., Անդրանիկի ժամանակը, Երկու գրքով, գ. Ա, Բ, Երևան, 1996; Նույնի, Ազատագրական պայքարի ուղիներում, Չորս գրքով, գ. I, II, Երևան, 2003; Գալոյան Գ., Հայաստանը և մեծ տերությունները 1917-1923թթ., Երևան, 1999; Ավետիսյան Հ., Հայկական հարցը 1918 թվականին, Երևան, 1997; Նույնի, Հայոց ազգային միասնության հաղթանակը. 1918 թվականի մայիս, Երևան, 1998; Կարապետյան Ս. Ս., Հայոց 1915-1916 թվականների ցեղասպանության հարցերը հայ պատմագրության մեջ, Երևան, 1998; Զոհրաբյան Է., Ազգամիջյան կոիվները Երևանի նահանգում 1918թ., Երևան, 2000 և այլն:

²⁵ Ասրյան Ա., Արամ Մանուկյան. կյանքը և գործը, թեկնածուական ատենախոսություն, Երևան, 2004, 202 էջ:

²⁶ Ասրյան Ա., Արամ Մանուկյան. կյանքը և գործը (Ազատագրական շարժման և անկախ պետականության վերականգնման ուղիներում), Երևան, 2005:

ԱԶԳԱՅԻՆ-ԱԶՍՏԱԳՐԱԿԱՆ ՇԱՐԺՄԱՆ ՏԱՐԻՆԵՐԻՆ

ԱՐԱՄ ՄԱՆՈՒԿՅԱՆԻ ՍՈՒՏՔԸ ԱԶԳԱՅԻՆ-ԱԶՍՏԱԳՐԱԿԱՆ ՇԱՐԺՈՒՄ

Արամ Մանուկյանը (ծննդյան անվամբ Սարգիս Հարությունի Հովհաննիսյան²⁷) ծնվել է 1879թ. մարտի 19-ին Արցախ-Ղարաբաղի Շուշի քաղաքում²⁸:

²⁷ Մանկության տարիներին նրան հաճախ անվանել են Սերգեյ: Այդպես էր նա Կարսում (1903-1904թթ.): Միայն 1904թ. վերջից Երկիր անցնելու շրջանից նա ընդունեց Արամ Մանուկյան հեղափոխական անունը: Դա ընդունված կարգ էր. Երկիր անցնող ազատագրական շարժման բոլոր գործիչներն ընդունում էին հեղափոխական անուն:

²⁸ Տես՝ Ասրյան Ա., Արամ Մանուկյան. կյանքը և գործը (Ազատագրական շարժման և անկախ պետականության վերականգնման ուղիներում), Երևան, 2009, էջ 14-15: Այս տեսակետի կողմին, որը հաստատվում է բազմաթիվ ուղղակի և անուղղակի փաստերով, պատմագիտության մեջ կա երկրորդ տեսակետ ևս, որը գործչի ծննդավայր է ընդունում Ղափանի Ջեյվա գյուղը:

Ինքը Արամ Մանուկյանը, տարբեր աղբյուրներում պարզ և որոշակի իրեն համարել է Ղարաբաղի ծնունդ: 1904թ., Ռուբեն Տեր-Մինասյանի հետ ունեցած զրույցներից մեկում նա հայտնել է. «...Ղարաբաղը ես լաւ կը ճանաչեմ, քանի որ անոր զաւակն եմ» (Ռուբեն, Հայ յեղափոխականի մը յիշատակները, հ. 1, Երևան, 1990, էջ 192): 1916թ. մայիսին՝ Պետրոգրադում հայ փախստականական առաջին համաժողովարի պատգամավոր Արամը երկխոսությանը մասնակից իր զուլցակցին ասել է. «Ես ռուսահպատակ եմ, ծնունդով շուշեցի եմ...» («Գրական թերթ», Երևան, 1990, մարտի 30, N 14): 1917թ. գրած իր հուշերում նա շուշեցի Իշխանի հետ Վանում ունեցած առաջին հանդիպման առիթով ի միջի այլոց նկատել է. «...մեր հայրենակցութիւնն ու մախկին ծանօթութիւնը մեծ բան էր այս հեռաւոր եւ օտար հորիզոնի տակ» (Երևանի Մեսրոպ Մաշտոցի անվան հին ձեռագրերի ինստիտուտ Աստուճաղարան, Նորագույն ձեռագրերի հավաքածո, N 146, Մանուկյան Արամ, Վերադառնալու գիւցազնական անցեալից, Տետր 3, էջ 9բ; Արամ, Յուշեր, «Հայրենիք», 1923, ապրիլ, N 6, էջ 79):

Անշուշտ, հարցի վերաբերյալ անգնահատելի է գործչի միակ ժառանգի Սեդա Մանուկյանի կարծիքը: Արձագանքելով մեր հարցմանը նա, հեմվելով մոր և հորաբլուզ հետ ունեցած կենդանի շփումների միջոցով ձևավորված տեղեկությունների վրա, 2000թ. հունվարի 24-ի նամակում գրում է, որ Արամի ծննդավայրը Շուշին է (Ա. Ասրյանի անձնական արխիվ, Սեդա Մանուկյանի 2000թ. հունվարի 24-ի նամակը Արմեն Ասրյանին):

ՀՅԴ ինքնորոգ ընդհանուր ժողովի (1919թ.) կողմից կուսակցության պատմությունը պատրաստելու նպատակով ընտրված մարմնի անդամներ, ՀՅԴ ականավոր գործիչներ Ս. Վրացյանը և Ռուբեն Տեր-Մինասյանը 1922թ. հրատարակած Արամի կենսագրականում գրել են, որ Արամը ծնվել է Շուշի քաղաքում

Արամի հայրը գինագործ էր (ղոնդախսագ), իսկ մայրը՝ Սոնան, զբաղվում էր երեխաների խնամքով, որոնք ընտանիքում հինգն էին՝ Յովհաննես, Կարապետ, Սարգիս, Աննա, Սառա²։ Սարգիսը (Արամը, այսուհետև՝ Արամ) երեխաներից կրտսերն էր, ընտանիքի սիրո և ուշադրության առարկան։ Նա մախնական կրթությունը ստացել է Շուշիի Ազուլյաց ծխական դպրոցում, ապա 1895թ. ընդունվել է Ղարաբաղի հայոց թեմական հոգևոր դպրոց։

Արամի պատանեկության և ուսումնառության տարիները՝ 1890-ական թթ., թուրքական բռնապետության դեմ ուղղված հայ ազատագրական զինված պայքարի վերելքի, հայրենասիրական-ազատասիրական գաղափարների բուռն խմորումների ժամանակաշրջան էին: Շուշին դարձել էր այդ խմորումների կարևոր կենտրոններից մեկը: Թեմականի աշակերտ Արամը շատերի հետ անդամագրվեց Շուշիում իր կազմակերպչական ցանցն ընդարձակող հայ ազատամարտի

(«Հայրենիք», Բոստոն, 1922, նոյեմբեր, N 1, էջ 26): Արամի բազմաթիվ այլ ժամանակակիցներ ևս նրան համարել են շուշեցի («Հայրենիք», 1963, նոյեմբեր, N 11, էջ 34; «Աշխատանք», Երևան, 1919, փետրվարի 12, N 4): Սակայն, հետազայում մի շարք հեղինակներ, ելնելով այն հանգամանքից, որ Արամի ծնողները գրեթե միշտ ապրում էին Ջեյվայում, երբեմն հակասելով իրենց իրենց, սկզբնավորեցին Ջեյվայի տարբերակը: Ս. Կրացյանը և Թադեն առաջիններն էին, որ 1929թ. ՀՀԴ օրգան «Պրոշակ»ում Ջեյվան նշեցին որպես Արամի ծննդավայր («Պրոշակ», Փարիզ, 1929, հունվար-փետրվար, N 1-2 , էջ 26, 29):

Հասկանի Զեյվա գյուղի սբ. Ստեփանոս եկեղեցու չափաբերական մատյանների (Շուշիի մատյանները չեն պահպանվել) ուսումնասիրությունը ցույց տվեց, որ դրանցում ոչ մի հետք չկա Արամ Մանուկյանի՝ Սարգիս Դովիաննիսյանի, ծննդյան մասին: Դրանցում տեղեկություններ չկան նաև նրա ծնողների, եղբայրների ու քույրերի ծննդյան, մահվան կամ ամուսնության վերաբերյալ: Դետաբեքար, Արամ Մանուկյանի ծննդավայրը Շուշին է:

* Արամի հարազատների մի մասը մահացել են բնական մահով, մինչև 1920թ. ղարաբաղյան կոտորածները, իսկ մյուսները՝ կոտորածների ժամանակ: Արամի եղբայրներից ու քույրերից միայն Սառային է հաջողվել շուրջը հավաքել իր և Կարապետի երեխաներին, մի կերպ հասնել Երևան, որտեղ համգրված են գտել Արամի կնոջ Կատարինե Զալյանի օգնությամբ: Արամի քույրերի ու եղբայրների երեխաներից այժմ կենդանի է Կարապետի դուստրը, որը երկար տարիներ ապրում էր Բաքվում, 1988թ. հետո այստեղ ծավալված հակահայ դեպքերից հետո տեղափոխվել է Բելոռուսիա: Արամի դուստրը Սեդա Մանուկյանը (ծնվել է 1918թ. Երևանում) մինչ 1976թ. ապրել է Երևանում, իսկ այդ թվականից մինչև մահը (2005թ.) Մոսկվայում: Սեդա Մանուկյանի ամուսինն է եղել Խանասորի Վարդանի որդին՝ Ռուբեն Սեփաբյանը (1912-1980):

առաջատար ուժ ՀՀ դաշնակցությանը և իր ամբողջ կյանքն անմնացորդ նվիրեց հայ ժողովրդի ազատության վեհ գործին:

Արդեն թեմական դպրոցում ուսանելու տարիներին Արամն աչքի ընկավ կուսակցական մեծ ակտիվությամբ: Նա քարոզչական-կազմակերպչական աշխատանքներ ծավալեց և՛ թեմականում, և՛ քաղաքում ու գյուղերում: Նրա գործունեությունը նկատելի էր հատկապես թեմական դպրոցում: Այստեղ նա նախաձեռնեց աշակերտական հավաքներ, մի քանի ընկերների հետ հրատարակեց «Կոկոն» անունով ձեռագիր թերթիկը՝ քարոզելով հայրենասիրական-հեղափոխական գաղափարներ: Հեղափոխական գաղափարներ տարածելու համար Արամը և նրա մի շարք կուսակցական ընկերներ 1900-1901 ուստարվա վերջին հեռացվեցին Շուշիի թեմականից²⁹, որից հետո ուսումը շարունակեցին Երևանի թեմական դպրոցում: Այստեղ ևս եռում էր աշակերտական կյանքը. աշակերտությանը կրթական հարցերից բացի հուզում էին նաև ազգային-հասարակական խնդիրներ: Արամն անմասն չմնաց այդ շարժումից: Նա պատրաստում էր «դասախօսություններ, ռեֆերատներ, հրատարակում աշակերտական թերթ. կապ պահպանում ուրիշ քաղաքների աշակերտական միութիւնների հետ և մասնակցում կուսակցական ընդհանուր գործունեութեան»³⁰:

Արամը բարեհաջող կերպով Երևանի թեմականն ավարտեց 1903թ. մայիսին³¹:

Դեռևս 1901 թվականից Արամը գտնվում էր ՀՀԴ Բաքվի կենտրոնական կոմիտեի տրամադրության տակ, իսկ ուսումն ավարտելուց հետո նա հաստատվեց Բաքվում, որը 20-րդ դարասկզբին Անդրկովկասի հայ հասարակական-քաղաքական կյանքի խոշորագույն կենտրոններից էր: Այստեղ հայ քաղաքական ուժերը, առանձնապես ՀՀԴ-ն և հայ սոցիալ-դեմոկրատական խմբակները հայ բանվորության շրջանում ծավալել էին աշխատանքներ՝ ձգտելով իրենց շուրջը համախմբել նրանց: Քաղաքական հորձանուտ ներքաշված Արամը

²⁹ Լեո, Պատմութիւն Ղարաբաղի Հայոց Թեմական Հոգեւոր Դպրոցի (1838-1913), Թիֆլիզ, 1914, էջ 563-568; Թաշճեան Վ., Իշխանը (Վանայ Իշխանի կյանքն ու գործունեությունը), Երևան, 1994, էջ 20:

³⁰ «Զանգ», Երևան, 1919, փետրվարի 9, N 16:

³¹ Հ ԱԱ, ֆ. 8, ց. 1, գ. 59, ք. 52:

շուտով դարձավ Բաքվի կազմակերպության ճանաչված գործիչներից մեկը³²։ Նա մասնակցեց քաղաքական ցույցերին ու գործադուլներին, որպես Դաշնակցության ներկայացուցիչ 1903թ. ընտրվեց գործադուլային բյուրոյի անդամ³³։ Հատկանշական է այն, որ հավաքների ժամանակ Արամն արժարժու էր նաև արևմտահայությանն օգնելու խնդիրը։

Իբրև ՀՅԴ անդամ՝ Արամն ակտիվ մասնակցություն ունեցավ հայ եկեղեցու ունեցվածքը բռնագրավելու մասին ցարական հրամանագիրը չեղյալ համարելու համար մղվող պայքարին։ Այնուհետև ՀՅԴ Բաքվի կ. կոմիտեի հրահանգով նա մի կարճ ժամանակով եղավ Գանձակում՝ տեղի ինքնապաշտպանական աշխատանքները կազմակերպելու նպատակով, ապա անցավ Կարս՝ փորձառություն ծեռք բերելուց հետո Սասուն անցնելու մտադրությամբ։

Կարսում, որը 20-րդ դարի սկզբին հանդիսանում էր Արևմտյան Հայաստանին օգնություն ապահովող առանցքային երկու հենակետերից մեկը (մյուսը ս. Թադեի գիծն էր Պարսկաստանում), ՀՅ Դաշնակցությունը ստեղծել էր կուսակցական ամուր կառույց։ Այստեղ Արամը կատարում էր Կարսի կ. կոմիտեի հրահանգները, ապահովում կապը ժողովրդի և կուսակցական օղակների միջև, զբաղվում ազատագրական շարժման խորացմանն ուղղված քարոզչական գործունեությամբ։ Եռանդուն գործունեություն ծավալած Արամը կարճ ժամանակում ծեռք բերեց մեծ հեղինակություն։ Նրանից մի փոքր ուշ Կարս անցած Ռուբենը նկատել է. «Երբ ես Կարս եկայ, որպես փրոփակամտի կեդրոնական դեմք մնացեր էր Սերգեյը (Արամը-Ա.Ա.), շրջապատուած ինձ պէսներով, որոնք թէև կը տեսնէին, կը հասկնային, բայց երբ գործը կու գար հասկցնելու դիմացինին, լեզունին փայտ կը կտրէր, կը ծանրանար։ Ո՛հտի լաւ էր որ մենք լռէինք եւ փրոփակամտի գործը ձգէինք Սերգեյին»³⁴։ Ո՛ղղամիտ, զրուցակիցների հետ անմիջական Արամը ժողովների ժամանակ խոր հավատով էր պաշտպանում իր ասածը և ոգևորում բոլորին։ Ազատամարտի մվիրայւներ Մենակի և Իսաջան Առաքելյանի

³² Սիմոնյան Հ., Ազատագրական պայքարի ուղիներում, գ. I, Երևան, 2003, էջ 599։

³³ Նիւթր Դ.Յ. Դաշնակցութեան պատմութեան համար, հ. Գ, Պատրաստեց եւ խմբագրեց Տասնապետեան Հ., Բեյրութ, 1976, էջ 165։

³⁴ Ռուբեն, Հայ յեղափոխականի մը յիշատակները, հ. 1, Երևան, 1990, էջ 88։

նահատակության առիթով նա նշում էր. «սիրելիք, լացը, սուգը նրանց համար չէ. նրանք նահատակուեցին եւ անմահութիւնը վաստակեցին: Լացը, սուգը մեզի համար է, որ խօսում ենք նահատակութիւնից. բայց վախենում ենք վաստակել զայն...»: Ռուբենի արտահայտությամբ «Սերգէյը իր նպատակին հասած էր՝ պատրաստած էր բոլորը «մատաղ» ընելու»³⁵: Արամի հաջողությունները քարոզչական բնագավառում այնքան ակնհայտ էին, որ Դաշնակցության Կարսի կազմակերպությունը նրան վստահեց քարոզչական գործի ղեկավարությունը, հակառակ իր անհամաձայնությանը, թե դա չէր Կարս անցնելու իր նպատակը:

Արդեն այս շրջանում Արամը հանդես էր գալիս որպէս հասուն գործիչ: Նա գտնում էր, որ ազգային իրավունքները վերականգնելու համար պետք է ապավինել սեփական ուժերին³⁶:

Արամն ակտիվորեն մասնակցեց Երկիր ուղարկվող զինատար խմբերի կազմակերպմանը, որոնց միջոցով ազգային-քաղաքական ուժերը հույս ունեին նոր թափ հաղորդել ազատագրական պայքարին: Արամը երիտասարդությանը հորդորում էր իր հետ Սասուն անցնել: Ավելին, 1903թ. սեպտեմբերին նա միացավ Խանի և Ներուզի 150 հոգուց բաղկացած խմբին՝ Երկիր անցնելու մտադրությամբ, սակայն հիվանդության պատճառով կես ճանապարհից հետ վերադարձավ³⁷: 1903-1904թթ. Երկիր ուղարկվեցին բազմաթիվ այլ խմբեր ևս, սակայն նրանք գրեթե բոլորն էլ ունեցան ողբերգական վախճան: Նահատակվեցին Արամի մերձավոր ընկերներից շատերը:

Այդ իրադարձություններից հետո՝ ազատամարտի մեջ առաջին քայլերը կատարող Արամը որոշեց անցնել Արևմտյան Հայաստան (Երկիր) և տեղում նպաստել ազգային-ազատագրական շարժման ծավալմանը:

ԱՐԵՎՍՏՅԱՆ ՀԱՅԱՍՏԱՆՈՒՄ 1905-1907ԹԹ.

Արամի նախնական մտադրությունն էր անցնել Սասուն, սակայն Սասունի ապստամբության պարտությունը, և հատկապես Պարսկաս-

³⁵ Նույն տեղում, էջ 45:

³⁶ Նույն տեղում, էջ 187-196:


³⁷ «Հայրենիք», Բոստոն, 1922. N 1. էջ 30:

տանից Վան անցնելու դյուրությունները փոխեցին նրա մտադրությունը: Կարսից Արամն անցավ Թիֆլիս, որտեղ ՀՅԴ Բյուրոյից ստացավ համապատասխան հրահանգներ, ինչպես նաև որպես կուսակցության Վանի ղեկավար մարմնի իրավահավասար անդամ գործելու լիազորություն, ապա 1904թ. աշնանը շարժվեց դեպի Պարսկաստան՝ թուրք-պարսկական սահմանին մերձակա ս. Թադեոս (Թադե) առաքյալ վանքի գծով Վան թափանցելու մտադրությամբ: 1904թ. հոկտեմբերին նա հաստատվեց ս. Թադեոս առաքյալի վանքում, որը հանդիսանում էր ՀՅԴ գլխավոր կայանը Պարսկաստանում: Հակառակ անմիջապես մեկնելու ցանկությամբ՝ Արամը հարկադրված չորս ամիս մնաց վանքում: Այդ ընթացքում նա ծանոթացավ վանքի դերին, փոխադրության ձևերին, այստեղ գործող անձանց: Վանքում գործող գործիչներին տրված գնահատականներից պարզվում է, որ նրա համար մարդկանց մեջ կարևորը ընդհանուր գործին օգուտ բերելն էր ու ազնվությունը: Գովեստով խոսելով մի շարք գործիչների, հատկապես վանահայր Գևորգ վարդապետ Նալբանդյանի մասին, նրան ներկայացնելով որպես աշխատասեր և հայրենասեր մի անձնավորություն՝ Արամը պախարակում էր վանքում ՀՅԴ ներկայացուցիչ Արթուրին, մշելով, որ նա բիրտ և ապաշնորհ անձնավորություն էր³⁸:

1905թ. հունվարին նա նամակներ ստացավ ՀՅԴ Վասպուրականի կազմակերպության ղեկավար Կոմսից և իր ընկեր Իշխանից: Վերջինս, մատնանշելով Երկրում գործելու դժվարին պայմանները, Արամին խորհուրդ էր տալիս «լաւ խորիել եւ ապա միայն Երկիր մտնել...»³⁹: Սակայն, Արևմտյան Հայաստան անցնելու վճռականությամբ լի գործչին դա չէր հուզում: Հունվարի վերջին շարժվելով Թադեի վանքից, անցնելով մոտ 130-150 կմ ճանապարհ, հաղթահարելով բազմաթիվ դժվարություններ (բավական է մշել, որ նա, թուրքերի ու քրդերի կողմից որպես դոսից եկվոր չճանաչվելու համար, իր ուսերին կրում էր յուղի տիկ, որը ծակվել էր և յուղը ներծծվում էր նրա շորերի ու մարմնի մեջ, իսկ նա չէր

³⁸ Երևանի Մեսրոպ Մաշտոցի անվան հին ձեռագրերի ինստիտուտ՝ Մատենադարան, Նորագույն ձեռագրերի հավաքածու, N 146, Մանուկյան Արամ, Վերլիշումներ դիւցազնական անցեալից, Տ. 1, էջ 29թ-30թ: Այսուհետև՝ Մատենադարան, ՆԶՀ, N 146, Արամ, Վերլիշումներ..., Տ.:

³⁹ «Արամը», էջ 194:



կարող դա հանել ուսերից) 1905թ. փետրվարի 6-ին Արամը ծախյալ կերպով՝ հասարակ գյուղացու շորերով, մտավ Վան⁴⁰:

Վանի նահանգը 20-րդ դարի սկզբին վերածվում էր Արևմտյան Հայաստանում ծավալվող ազգային-ազատագրական շարժման կենտրոնի: Տարոնի հետ միասին այն դիտվում էր Արևմտյան Հայաստանում իրականացվելիք ապստամբության երկրորդ օջախ:

Վանում Արամին դիմավորեց և գործերի վիճակին ծանոթացրեց ՀՀԴ Վանի կազմակերպության ղեկավար Կոմսը: Վերջինիս տպավորությունն այն էր, որ Արամը լուրջ, խելացի և ունակ գործիչ էր, և կարող էր նպաստել գործերի հաջողությանը⁴¹:

Արամի ժամանելուց կարճ ժամանակ անց Կոմսը վճռեց հեռանալ Վանից: Դա Արամին խոր անհանգստության մատնեց: Պատճառն այն էր, որ Կոմսը գործերին քաջատեղյակ, շրջահայաց, և որ չափազանց կարևոր էր նաև տեղացի գործիչ էր ու ժողովրդի մոտ ուներ մեծ հեղինակություն: Իսկ տեղացի գործիչ լինելը շատ կարևոր հանգամանք էր երկրում, մասնավորապես Վանում: Վանեցիներն այնքան էլ մեծ վստահություն չէին տածում «դրսեցիների» նկատմամբ, գտնելով, որ նրանց սիրտը չէր կարող ցավալ Վանի համար, որովհետև նրանք ժամանակավոր բնակիչներ էին տեղում, չունեին անգամ ընտանիք:

Կարճ ժամանակ անց՝ ստանձնելով ՀՀԴ Վանի կազմակերպության ղեկավարությունը, նա, ելնելով ազատագրական շարժման անցյալից, և հետամուտ լինելով իր կուսակցության կողմից որդեգրվող պայքարի նոր մարտավարությանը, եռանդուն գործունեություն ծավալեց ընդհանուր ապստամբության համար անհրաժեշտ հիմքեր ստեղծելու, առաջին հերթին Վան զենք-զինամթերք փոխադրելու ուղղությամբ⁴²: Ինչպես իրավացիորեն նկատում է Հ. Սիմոնյանը՝ Արամը պաշտպանում էր «Հրայրի այն գաղափարը, որ եթե հայերը պետք է ապստամբություն բարձրացնեն, ապա դա պետք է լինի համաժողովրդական՝ նախապատրաստված բազմակողմանիորեն և հիմնավոր»⁴³: Բռնի հեղա-

⁴⁰ Սատենադարան, ՆՁՀ, N 146, Արամ, Վերյիշումներ..., Տ. 1, էջ 60բ:

⁴¹ Փափագեան Վ., Իմ յուշերը, հ. Ա, Պոսթըն, 1950, հ. Ա, էջ 350:

⁴² Նիւթեր Հ.Հ. Դաշնակցութեան պատմութեան համար, Պատրաստեց Պատրաստեց եւ խմբագրեց Տասնապետեան Հ., հ. Գ, Բեյրութ, 1976, էջ 105:

⁴³ Սիմոնյան Հ., Ազատագրական պայքարի ուղիներում, գ. I, էջ 628:

փոխությունը, այսինքն՝ զինված ապստամբությունը համարելով իրենց վերջնական նպատակը՝ Արամը գտնում էր, որ այն պետք է դնել նպատակոր հողի վրա⁴⁴։ Հատկանշական է այն, որ լինելով դաշնակցական գործիչ, նա չէր խորշում օգտվել արմենականների փորձից, որոնք ունեին նախապատրաստական աշխատանքների հարուստ անցյալ։

Արամի ղեկավարության շրջանում ավարտվեց Վանի նահանգում ՀՀԴ ամբողջական հաստատման և զանգվածային կազմակերպության վերածման գործընթացը։ Այդ առումով շատ կարևոր էր հիմնականում արմենականների հետ կապված տեղի մտավորականությանը ՀՀԴ կողմը ներգրավելու Արամի մոտեցումը։ Նրա հանգամանք առանց տեղական ուժերի հնարավոր չէր գործ կատարել⁴⁵։ Սակայն, դա այնքան էլ դյուրին գործ չէր։ Բանն այն է, որ դեռևս Կոմսի ժամանակ կ. կոմիտեի տեղացի անդամներից Թեոսը և Ալեսը դեմ էին արտահայտվել նրանց ՀՀԴ մտնելուն, մշելով, թե քաղաքի զգալի մասն, ուսուցչությամբ հանդերձ, արմենական էր և թշնամի Ղաշնակցությանը, մի մասը չեզոք կամ հակառակ էր հեղափոխությանը, իսկ մնացած մասը «կամ դաւաճան են եւ կամ կառավարութեան գործիք»⁴⁶։ Ըստ նրանց, զանգվածային կազմակերպության ստեղծումը կարող էր հանգեցնել նրա մեջ լուտենների սողոսկմանը։ Անշուշտ, իրերին այդ կերպ նայելը սխալ էր։ Սակավաթիվ ու կղզիացած կազմակերպությունը չէր կարող հասնել իր նպատակների կենսագործմանը, նրա գոյությունը կդառնար սոսկ անվանական։ Մինչդեռ Արամի մտադրության իրականացումը նշանակելու էր ՀՀԴ շարքերի խտացում և ամրապնդում։ Ստանալով Ռուբենի և Իշխանի աջակցությունը՝ Արամը Արմենական կուսակցության գործիչներ Հ. Բաղեշյանին ու Ղ. Մելոյանին հրավիրեց Ղաշնակցություն, այն էլ միանգամից Վանի կ. կոմիտե⁴⁷։ Այդ անմախաղեպ քայլն ինքնին վկայում է, թե ինչպիսի նշանակություն էր տրվում նշված գործիչների ներգրավմանը Ղաշնակցության մեջ։ Հիրավի, Վանում տիրապետող գավառական հայրենասիրության մթնոլորտում տեղական ուժերի ընդգրկումը Ղաշ-

⁴⁴ Նիւթեր Հ.Յ. Ղաշնակցութեան..., հ. Գ, էջ 104։

⁴⁵ Նույն տեղում, էջ 102։

⁴⁶ Ռուբեն, Հայ յեղափոխականի մը յիշատակները, հ. 2, Երևան, 1990, էջ 126։

⁴⁷ Սատենադարան, ՆՁՀ, N 146, Արամ, Վերյիշումներ..., Տ. 4, էջ 66բ-67բ։

նակցության մեջ կարևորագույն գործոն էր կուսակցության զարգացման և ազատագրական շարժման խորացման համար:

Ձեռնարկված քայլերի շնորհիվ ՀՅԴ շարքերը զգալիորեն ստվարացան: 1908թ. թուրքական սահմանադրության նախօրյակին Ղաշնակցությունը Վանում ուներ մոտ 1000 անդամ, իսկ գյուղերի «մեծ մասը՝ քահանայով, ռեսով և գզիրով՝ դաշնակցական էին...»⁴⁸: Թե՛ քաղաքում և թե՛ գյուղերում կազմակերպված դաշնակցական խմբերը առաջ էին տանում զինման գործը, Վարագա լեռան վրա զբաղվում էին զինավարժությամբ, կազմակերպում էին գյուղերի ինքնապաշտպանությունը, նպաստում կրթական գործին և այլն:

ՀՅԴ գործունեության կարևորագույն կողմը երկրում մարտական-զինականն էր, առանձնապես հետագա պայքարի համար զենք կուտակելը: Այդ ուղղությամբ Արամի ղեկավարությամբ ՀՅԴ Վանի կազմակերպությունը ծավալեց նպատակամղված գործունեություն: Նախանգի հայկական գյուղերում ստեղծվել էին 7-15 հոգանոց մարտական խմբեր, որոնք հանդիսանում էին ՀՅԴ զինվորական ուժի միջուկը: Գյուղական խմբերի վրա այլևայլ խնդիրների հետ պարտականություն էր դրված պաշտպանել գյուղերը թուրք-քրդական ելուզակների ոտնձգություններից և կազմակերպել գյուղերի զինումը: Դա կատարվում էր հետևյալ կերպ. ունևոր գյուղացիներին պարտադրվում էր ունենալ անհատական զենք, իսկ մնացյալ գյուղացիներից, ըստ կարողության, պարտադիր կարգով հավաքվում էր բնամթերք և նրա վաճառքից գոյացած գումարը հատկացվում զենքի: ՀՅԴ IV ընդհանուր ժողովում Արամը նշում էր, որ 1906թ. ընթացքում կուսակցությունն ավելի շատ ռազմամթերք է փոխադրել Վասպուրական, քան նախկինում⁴⁹: 1906թ. Վասպուրական էր փոխադրվել ավելի քան 400 հրացան: Այդ գործին ևս Արամն ունեցել էր անմիջական մասնակցություն: 1906թ. հոկտեմբերին, Վիեննա մեկնելուց առաջ, հաստատվելով սբ. Թադեոսմ՝ նա երկիր էր առաքել մի քանի հարյուր հրացան, մոտ 100 հազար փամփուշտ և այլ ռազմամթերք⁵⁰:

⁴⁸ «Վան-Տոսպ», Թիֆլիս, 1916, հունվարի 3, N 6, էջ 4:

⁴⁹ Նիւթեր Հ.Յ. Ղաշնակցութեան..., հ. 9, էջ 105:

⁵⁰ Մատենադարան, ՆՁՀ, N 146, Արամ, Վերյիշումներ..., Տ. 6, էջ 22բ-23բ;

«Արամը», էջ 373:

Ձեռնարկվեցին արդյունավետ քայլեր հայության ներքին կյանքին թուրքական կառավարության միջամտությունները կանխելու և քրդական շահատակություններին վերջ տալու ուղղությամբ: Թուրքական իշխանություններն առիթը բաց չէին թողնում միջամտելու հայերի ներքին կյանքին, որը թանկ էր նստում վերջիններիս վրա. նրանք ենթարկվում էին հավելյալ սոցիալ-տնտեսական, ֆիզիկական ճնշման և անձնական նվաստացման: Ժողովրդի գլխին պատուհաս էին նաև թուրքական դատարանները, որոնք տարիներով ձգձգում էին դատական գործերը և դրանք լուծում միայն կաշառքի, ծեծի ու կեղծիքի միջոցով: Կառավարական անտեղի միջամտությունների բացառմանը միտված առաջնակարգ քայլերից էր դատական գործի տնօրինումը ՀՀԴ Վանի կազմակերպության կողմից: Դաշնակցական դատարանները դատերը կատարում էին անվճար, առանց ձգձգումների, տեղական սովորույթների համաձայն:

Վանի հայտնի չեզոք գործիչ Հ. Երամյանը, որը տարբեր առիթներով քննադատել է Դաշնակցությանը, դրվատել է նրանց դատական գործունեությունը՝ գրելով. «Երեք շեֆերը՝ Կոստ, Արամն ու Իշխանը, ինչպես և իրենց գաւառական գործակալները քաղաքի և գաւառներու մէջ դատական կամ առնելիքի ու տալիքի խնդիրներ ևս կը վճռէին այնչափ արագ և ստէպ այնքան արդար, որ թուրքեր ու քիւրտեր անգամ անոնց գաղտնի դատարանները կը դիմէին՝ պետական ատեսաններու ձգձգումներէն և ծախսերէն խուսափելու համար»⁵¹:

Դատական գործունեությանը զուգահեռ Արամը և նրա կուսակիցները աշխատանքներ ծավալեցին նաև հայ հասարակական կարգն ամրապնդելու ուղղությամբ: Ազգաբնակչությանն արգելվեց թաղերում օղի վաճառելը, հարբելը, թղթախաղը: Այդ քայլի նպատակը անհարկի միջադեպերի բացառումն էր: Պատասխանատվություն սահմանվեց կեղծ դրամ հատելու, թուրքերին ու քրդերին զենք-զինամթերք վաճառելու, զոդության, այդ թվում թուրքերից ու քրդերից կատարվող զոդության համար: Այդ ամենը նպաստում էր հայկական կյանքի առողջացմանը, թուրքական իշխանությունների միջամտությունների նվազեցմանը:

⁵¹ Երամյան Հ., Յուշարծան Վան-Վասպուրականի, Աղեքսանդրիա, 1929, էջ 70-71:

Ժողովրդի դրության բարելավման, ազատագրական շարժման հե-
մարաճման ամրացնելու տեսակետից առանձնակի նշանակություն ունեն
պայքարը քրդերի բռնությունների դեմ: Բանն այն է, որ քրդական ցեղերը,
թուրքական վարչակարգի հովանավորության պայմաններում, անպատիժ
կերպով սպանում և թալանում էին արևմտահայությանը, ոտնահարում
էին նրանց մարդկային, ազգային և կրոնական իրավունքները: Այդ
գործողությունների հետևանքով ժողովուրդը մատնվում էր թշվառության,
թողնում հայրենիքը, փոխում կրոնը: Դա նաև ծանր հարված էր հասցնում
հայ ազատագրական ուժերի հեղինակությանը: Պայքարը տարվում էր
տարբեր ձևերով: Արամը և նրա ընկերները ժողովրդին հորդորում էին
քուրդ աղաներին հարկ ու «նվերներ» չտալ, ձրի պարիսպներ չկատարել՝
սպառնալով, որ տվողները կենթարկվեին պատասխանատվության:
Արգելվել էր նաև դատական հարցերով դիմել քուրդ աղային: Այդ
քարոզչության հետևանքով աստիճանաբար վերացվեցին կողմնակի
տուրքերն ու հարստահարությունները⁵²: Հաճախ ժողովրդին ցուցա-
բերվում էր նաև զինական օգնություն: Այսպես, Վասպուրականին սահմա-
նակից Բիթլիսի մահանգի Ոգմ գյուղը կուսակցության զինական աջակ-
ցությամբ մղած երկարամյա պայքարից հետո լիովին ազատագրվեց
քրդական լծից⁵³: Այդ առիթով Արամն արտահայտել է հետևյալ հատ-
կանշական միտքը. «... քիչ տեղ ճանաչում է զենքի ուժը. ով կռուող է,
կտրիճ է, նա իրաւունք ունի աղա, մանաւանդ «աշիր» կոչուելու, այսինքն՝
ազնուական դառնալու: Այսպէս է եղել միշտ եւ ամէն տեղ. զենքն եւ ուժն
են մարդկանց ազնուական դարձրել եւ ոչ թէ արիւնը»⁵⁴:

Քրդական բռնությունների դեմ ուղղված պայքարի շնորհիվ 1906-
1907թթ. հայկական գավառների մեծամասնությունն ազատվեց նրանց
բռնություններից⁵⁵:

Ելնելով ազատագրական շարժման անցյալից՝ Արամը մի պահ
հակվեց սուլթանական բռնապետության դեմ թուրք հակասուլթանական

⁵² Նիքեր Դ.Յ. Դաշնակցութեան..., հ. 9, էջ 18:

⁵³ Մատենադարան, ՆԶՀ, N 146, Արամ, Վերյիշումներ..., Տ. 5, էջ 19բ-20բ:

⁵⁴ Նույն տեղում, էջ 21բ: «Արամը», էջ 330:

⁵⁵ Նույն տեղում, էջ 21բ: «Վան-Տոսպ», 1916, հունվարի 17, N 8, էջ 4: Համբարյան
Ա., Ազատագրական շարժումները Արևմտյան Հայաստանում (1898-1908թթ.),
Երևան, 1999, էջ 312:

ուժերի հետ գործակցաբար պայքարելու օգտին: Նա և ՀՀԴ Վանի մյուս գործիչները գտնում էին, որ մեկուսի պայքարով հնարավոր չէր ապահովել հայ ազատագրական շարժման հաջողությունը, և անհրաժեշտ էին համարում զարկ տալ ընդհանուր նպատակներ հետապնդող հակապետական շարժմանը՝ հուսալով այդ ձևով փոփոխել իշխող վարչակարգը և հասնել հայ ժողովրդի դրության բարելավմանը⁵⁶: Արամն արտահայտվեց նաև հայ-քրդական համերաշխության օգտին, ամենևին չակնկալելով, թե քրդերն իրենց հետ միասնաբար կապստամբեն սուլթանի դեմ: Նա ընդամենը ծգտում էր նրանց չեզոքությանը: Սակայն, այս ուղղությամբ գործադրված քանքերն էական արդյունք չտվեցին, քանզի խիստ տարբեր էին մի կողմից հայ, մյուս կողմից՝ թուրք և քուրդ ժողովուրդների շահերն ու կենսակերպերը. թուրքը և քուրդը իշխող էին, վայելում էին ազգային, կրոնական ու տնտեսական արտոնություններ, ինչպես նաև վարչակարգի հովանավորությունը, ապրում էին հային անպատիժ հարստահարելով, կողոպտելով և շահագրգռված չէին բարեկամությամբ:

Արամի գործունեությունը մշտապես միտված էր ազգային խնդիրների լուծմանը: Նույնիսկ այն դեպքում, երբ նա քարոզչական աշխատանքների ժամանակ արծարծում էր նաև սոցիալիստական գաղափարներ, աճող սերնդի մեջ ներարկում պահպանողականության դեմ պայքարի ոգի, նրա գլխավոր մտահոգությունն արևմտահայության ազատագրությանը նպաստելն էր: Արամը փորձում էր ընդլայնել ազատագրական շարժման սոցիալական բազան, և այդ պատճառով որոշակիորեն նպաստեց «նոր սերնդական» շարժման առաջացմանը:

Կովկասյան հեղափոխական իրադարձությունների ազդեցության տակ գտնվող այդ շարժման առաջնորդները հանդես էին գալիս կրոնի, եկեղեցական կարգերի, պահպանողականության, ընտանեկան՝ հնուց եկող ավանդույթների, հարուստների դեմ, արտահայտվում էին անսահմանափակ ազատության օգտին, հասարակական կյանքի խթանիչ էին համարում սոցիալ-տնտեսական գործոնները, գտնում, որ հեղափոխական ձեռնարկները պետք է ծառայեն համամարդկային նպատակներին:

⁵⁶ Ուրևն, Հայ յեղափոխականի մը յիշատակները, հ. 4, Երևան, 1990, էջ 228-229, 308-310:

Արամը գտնում էր, որ հասարակական մեծ ակտիվություն դրսևորող, հեղափոխական գործին մվիրված «նոր-սերնդականների» ծայրահեղ հայացքները ժամանակի ընթացքում կհարթվեն և նրանք կդառնային հեղափոխությանը պիտանի տարրեր⁵⁷։ Եվ նա չսխալվեց։ Այդ սերունդն ակտիվորեն մասնակցեց Վանի 1915թ. հերոսամարտին։ Սակայն, ընդունելով համոզմունք «նոր-սերնդականներին»՝ Արամը թույլ չտվեց, որ շարժումն ընդունի վտանգավոր չափեր, հատկապես որ շարժումը հարուցել էր վանեցիների դժգոհությունը։ Արամը, մատնանշելով տեղական պայմանները, սոցիալիզմը արևմտահայ իրականության մեջ ամբողջովին ներդնել ձգտողներին զգուշացնում էր, որ դրա համար անհրաժեշտ է համապատասխան հող։ Այդ իսկ պատճառով կարճ ժամանակ անց «նոր-սերնդական» շարժումը կասեցվեց։

Ինչ վերաբերում է Վասպուրականում իրականացվող քարոզչության բովանդակությանը, ապա պետք է ասել, որ շեշտը դրվում էր ինքնապաշտպանության վրա, ըստ որում, մոտակա նպատակ էր դիտվում կյանքի և գույքի ապահովությունը⁵⁸։

Արամի, ինչպես նաև Արևմտյան Հայաստանում գործող ազատագրական շարժման մյուս գործիչների գործունեությունն ընթանում էր ծանրագույն պայմաններում։ Նրանց համար գոյություն չունեի ցերեկային կյանք, նրանք ենթակա էին ամենօրյա ծեբբակալման և մահվան վտանգի։ Նրանց համար երազ էր անկաշկանդ ծիծաղելը, առանց շորերի մաքուր անկողնում քնելը, մշտական կացարան ունենալը։ Արամը, ինչպես իր նման շատերը, հարկադրված էր ամեն օր մութն ընկնելուն պես բազմաթիվ զրկանքներ կրելով փոխել պատսպարանը՝ թուրքական կառավարության հետապնդումներից խուսափելու և ընդհարումների տեղիք չտալու համար։ Արամի գործունեությունն ավելի դժվարացավ 1906թ. սկզբին, երբ նա հիվանդացավ աչքացավով և ոսկրացավով՝ զրկվելով ինքնուրույն շարժվելու հնարավորությունից։

Արևմտյան Հայաստանում ծավալած գործունեության առաջին տարիներից Արամն իրեն դրսևորեց որպես հետևողական, կազմակերպչական մեծ ցիղ ունեցող գործիչ։ Նրա ղեկավարության

⁵⁷ Փափագեան Վ., հ. Ա, էջ 487-489; Ռուբեն, հ. 5, էջ 248։

⁵⁸ Նիւթեր Յ.Յ. Դաշնակցութեան..., հ. 9, էջ 74-75։

շրջանում ՀՀՊ Վասպուրականի կառույցը դարձավ ամենամարտունակ ու հեղինակավոր կազմակերպությունը Արևմտյան Հայաստանում, իսկ ինքը կարճ ժամանակում ձեռք բերեց մեծ հեղինակություն և ժողովրդի կողմից արժանացավ «փաշա» տիտղոսի: Ասվածի վառ վկայություններից է այն հանգամանքը, որ 1906թ. Վանում գումարված ՀՀՊ Վասպուրականի շրջանային երրորդ և չորրորդ ժողովների կողմից Արամն ընտրվեց Վանի (Շամի) շրջանից կուսակցության IV ընդհանուր ժողովի պատգամավոր:

Իբրև ՀՀՊ Վանի կազմակերպության ներկայացուցիչ Արամը մասնակցեց 1907 թվականին Վիեննայում կայացած ՀՀՊ 4-րդ ընդհանուր ժողովին: Նա այն պատգամավորների թվում էր, որոնք ըստ ամենայնի դնում էին ազատագրական պայքարի անցած տարիներին կուսակցության ծավալած գործունեության վերաքննման, սխալներն ընդունելու և դրանք չկրկնելու խնդիրը: Նա նշում էր. «Ներկայումս մենք ոչ թե պիտի մոր ձեռնարկների մասին մտածենք, այլ պիտի աշխատենք մի նպատակայարմար տակտիկա ընդունել, որից կը բխեն մոր ձեռնարկները: Հին մեթոդը շարունակելով մենք նոյն հին սխալները կ'անենք»⁵⁹: Բոլոր խնդիրներում նրա մեկնակետը ժողովրդին ջարդերից ու գրկամքներից հեռու պահելու մտահոգությունն էր: Արամը համոզեսեկավ նաև իբրև կուսակցության միասնության սկզբունքի հետևողական պաշտպան: Չնայած իր երիտասարդ տարիքին, նա արդեն բավականին փորձառու քաղաքական գործչի տպավորություն էր թողնում, որը չէր ընդունում ծայրահեղ ծախսակողմյան-անջատական տրամադրություններով տարված որոշ երիտասարդ գործիչների տեսակետները՝ Ղարաբաղի բարբառով նրանց տալով «խոխենք» փաղաքշական բնորոշումը:

ԵՐԻՏԹՈՒՐՔԱԿԱՆ ՀԵՂԱՇՐՋԱՆԱՆ ԺԱՄԱՆԱԿԱՇՐՋԱՆՈՒՄ

ՀՀՊ Վանի կազմակերպության վերելքը շարունակվեց մինչև 1908թ. հունվարի 22-ը, երբ կուսակցության անդամ դիերցի Ղավիթը (Ղավոն) թուրքական իշխանություններին մատնեց ՀՀՊ զինապահեստներն ու բազում գաղտնիքներ ծանր հարված հասցնելով հայ ազատագրական

⁵⁹ Նույն տեղում, էջ 110:

շարժմանն ու մահանգի հայությանը: Մատուռայան հետևանքներն ահավոր ծանր էին: Միայն առաջին օրերին իշխանությունները Վանի և սբ. Գրիգոր վանքի (Վանից 20 կմ հեռու) գաղտնարաններից հայերից առգրավեցին 300 հրացան, 300 հազար փամփուշտ և մեծաքանակ դինամիտ: Հետագայում բռնագրավեց ևս 200 հրացան, բանտարկվեցին 200-ից ավելի հայեր և այլն:

ՀՀԴ Վասպուրականի մարմինը մահավճիռ կայացրեց Ղավոյի նկատմամբ, որն ի կատար ածվեց 1908թ. մարտի 10 (23)-ին Տաճատ Թերլեմեզյանի կողմից:

Թուրքերի կարևոր խնդիրներից էր ազատագրական շարժման դեկավարների, այդ թվում Արամի վերացումը, որի մասին կուսակալը նշել էր, թե Վանում «միայն մեկ թշնամի կայ, որ գիտե թե ինչ կ'ուզէ. անարժանի է փաշա կոչուելու ...»⁶⁰:

1908թ. մայիսին թուրքական իշխանությունները ձերբակալեցին Արամին ու նրա ընկերներին, որոնց մասին Ղավոյի ձեռքով տարածել էին զանազան հերյուրանքներ: Ահա թե ինչպես է արտահայտվել այդ մասին թուրքական ոստիկանության ծառայող, մահմեդականացած հայ Մեհմեդ էֆենդին. «Եղած ամբաստանությունները (ոմանք Ղաւոյի անունով ստորագրուած), բոլորն ալ խմբագրուած են ոստիկանութեան ձեռքով: Բայց Արամ բոլորիս համար կը մնայ յարգանքի եւ պատուի առարկայ»⁶¹: Իրոք, որքան էլ որ թուրքական իշխանությունները ջանացին հեղինակագրկել ՀՀԴ Վանի ղեկավար գործիչներին, այդ թվում և Արամին, և այդ ձևով գլխատել ազատագրական շարժումը, հաջողության չհասան: Ասվածը հաստատվում է այն իրողությամբ, որ հետագայում ևս Արամը վայելում էր ինչպես տեղացի դաշնակցական և ոչ դաշնակցական գործիչների, այնպես էլ ժողովրդական զանգվածների հարգանքը: Այդ հարգանքն, ինչպես կտեսնենք, իր շմեցուցիչ դրսևորումն ունեցավ Արամի հուղարկավորության օրը: Բացի այդ, ՀՀԴ ղեկավարությունը երբեք նրան թույլ չէր տա շարունակել գործունեությունը Վանում, քանի որ կուսակցության հեղինակությունը կտրուկ կընկներ:

⁶⁰ Ռուբեն, Հայ լեզվափոխականի սը յիշատակները, հ. 5, Երևան, 1990, էջ 268:

⁶¹ Նույն տեղում, էջ 268-269:

Անկասկած, ձերբակալված գործիչները ենթարկվելու էին մահապատժի, եթե քաղաքական իրադարձությունները թուրքիայում այլ զարգացում չստանային:

1908թ. հուլիսին թուրքիայում իրականացվեց երիտթուրքական հեղաշրջումը. տապալվեց սուլթանի միահեծան իշխանությունը, երկիրը հռչակվեց սահմանադրական միապետություն, հայտարարվեց պառլամենտի առաջիկա բացման մասին:

Ելնելով ազատագրական շարժման ընթացքից՝ հեղաշրջումից հետո բանտից ազատված Արամն արտահայտվեց երիտթուրքերի հետ գործակցելու իր կուսակցության քաղաքական գծի օգտին: Իսկ ՅՅԴ-ն փոխզիջման դիրք էր ընդունել և ձգտում էր արևմտահայության դրության բարելավմանը հասնել Օսմանյան կայսրության շրջանակում՝ խաղաղ ճանապարհով և առանց արտաքին միջամտության:

Արամը գտնում էր, որ չպետք է անտեսել հեղափոխության ընձեռած առավելությունները, գերազնահատել հայության ուժերն ու հետապնդել զուտ ազգային խնդիրներ⁶²: Նա և ՅՅԴ Վասուլուրականի մյուս գործիչները, դրական գնահատելով սահմանադրությունը և արտահայտվելով այլազգի հեղափոխական ուժերի հետ գործակցության օգտին, ձգտում էին լուծել հողային հարցը՝ չեղյալ դարձնել համիդյան վարչակարգի խրախուսած հողային բռնագրավումները հայերից, զինաթափել ավազակային տարրերին, հակառակ դեպքում՝ զինել նաև խաղաղ բնակչությանը, ազգային թվաքանակի համեմատ մասնակցել երկրի գործադիր և օրենսդիր մարմինների աշխատանքներին, հասնել ազգերի իրավահավասարության: Միաժամանակ, նրանք հարկ էին համարում ուժեղացնել կազմակերպությունը ներքնապես⁶³: Կարճ, նրանց ձգտումն էր հասնել արևմտահայության անվտանգությանը, այլ ժողովուրդների հետ իրավունքների հավասարեցմանը:

Երիտթուրքական հեղաշրջումից հետո թուրքիայում անցկացվեցին խորհրդարանական ընտրություններ: Առաջադրվեց նաև Արամի թեկնածությունը: Կոմսի հավաստմամբ Արամը դրա համար ուներ համապատասխան հատկանիշներ, համարձակ էր, հարմարվող և անկաշկանդ,

⁶² Ռուբեն, հ. 5, էջ 245-247:

⁶³ Փափագեան Վ., հ. Բ, էջ 24-25:

ուներ թուրքերենի որոշ իմացություն⁶⁴: Սակայն, նա նախընտրեց մնալ տեղում, հուսալով որ. «այդպես աւելի օգտակար կը լինէր ժողովուրդին...»⁶⁵: Հիրավի, Արամը մնում էր ազգային-հասարակական կյանքի կենտրոնում և արագ ու անաչառ կերպով լուծում տալիս ժողովրդին հուզող տարբեր հարցերի: Նրա դրական կամ բացասական խոսքից հետո, Ե. Սարգսյանի հավաստմամբ, մարդիկ այլևս ուրիշի չէին դիմում⁶⁶: 1909թ., երբ Արամն Իշխանի, Վան ժամանած Ռոստոմի և այլոց հետ մեկնեց Վարագ, նրան շրջապատեցին զանգվածները և ստիպեցին իրենց վեճերն ու զանգատները լսել⁶⁷:

1909թ. ամռանն Արամը ժամանակավորապես հեռացավ Վանից: Այդ շրջանում Երկրից ժամանակավորապես հեռացան ազատագրական շարժման հեղինակավոր գործիչների մեծ մասը: Նոր պայմաններում ազատագրական շարժման առաջավոր գծում գտնվող և արևմտահայ ժողովրդի շրջանում մեծ հեղինակություն ունեցող գործիչների հեռացումը Երկրից ավելի նպատակահարմար էր, քան ներկայությունը՝ խաղաղ գործունեության անցնելու հետևանքով իրենց հեղափոխական հմայքը ժողովրդի շրջանում չկորցնելու տեսակետից: Արամը նախ անցավ Էրզրում, ապա սևծովյան ափամերձ քաղաք Օրդու և ստանձնեց տեղի հայկական դպրոցների տեսչությունը:

1911թ. Արամը բժիշկների խորհրդով անցավ Ժնև բուժվելու, սակայն միջոցների սղության պատճառով չկարողացավ լիակատար բուժում ստանալ: Նա Ժնևում մնաց մոտ մեկ տարի և, օգտվելով այդ պատեհությունից, 1912թ. «Դրօշակ»ում տպագրեց հոդվածների մի շարք՝ նվիրված հայ ազատամարտի մի խումբ նահատակների հիշատակին⁶⁸: Արամի ցանկությունն էր հավերժացնել այդ գործիչների անունները, որոնք ունեցել էին զնահատելի մասնակցություն ազատագրական

⁶⁴ Նույն տեղում, էջ 40-41:

⁶⁵ Աստուածատրեան Ա., Արամը, «Հայրենիք», 1964, փետրվար, N 2, էջ 29:

⁶⁶ Սարգսեան Ե., Լեռնապարը 1908-1909 (Հայոց Ձոր, Գաւաշ, Կարճկան, Շատախ, Մոկս, Կարկառ), «Հայրենիք», 1955, նոյեմբեր, N 11, էջ 15:

⁶⁷ «Զանգ», 1919, փետրվարի 2, N 13:

⁶⁸ Արամ, Տիրան Մինասեան («Հայրիկ»), «Դրօշակ», 1912, մայիս, N 5, էջ 117-119: Նույնի, Յակոբ Չիլինկարեան (Աշոտ Հայկունի), Նույն տեղում, հունիս, N 6, էջ 149-152: Նույնի, Դաւիթ Թումանեան (Ծուռ Դաւիթ), Նույն տեղում, հուլիս օգոստոս, N 7-8, էջ 179-181.

շարժմանը: Արամը հույս էր հայտնում, որ ապագայում հայ քանդակագործը կկերտի նրանց կոթողը հետևյալ մակագրությամբ. «Այստեղ կանգնի՜ր ու խոնարհւի՜ր, ո՛վ անցորդ, որովհետև այստեղ եմ բոլոր նրանք, որ հիստեցին ձեր սիրուն երազները»⁶⁹:

1912թ. Արամը ժնկից կրկին անցավ Օրդու՝ ուսուցչության, ապա վերադարձավ Վան: Արամի և հայ ազատամարտի մյուս մեծանուն դեմքերի վերադարձն Արևմտյան Հայաստան թելադրված էր երիտթուրքերի հակահայկական քաղաքականության սաստկացմամբ, արևմտահայության նոր զանգվածային ջարդերի սպառնալիքով: Այստեղ նա ընտրվեց Ազգային երեսփոխանական ժողովի նախագահ⁷⁰: «Ու այնուհետև Արամը եղաւ Վասպուրականի Դաշնակցութեան ղեկավար ու մղիչ ոյժը Իշխանի, ապա Ա. Վռամեանի հետ: Ինչպէս Ռոստոմը բովանդակ Դաշնակցութեան մէջ, Արամը ամեն ինչ էր Վասպուրականում. դպրոց, ազգային հաստատութիւններ, մամուլ, ժողով ու հանդէս, երիտասարդական շրջաններ, գաւառ, Աղթամար, յարաբերութիւններ կառավարութեան հետ- ամեն բանի վրայ տիրական էր Արամի միտքն ու հոգին»⁷¹:

Արամն ամբողջովին նվիրվել էր Վանին: Նա համակված էր լավատեսությամբ Վանի ապագայով և ոգևորված էր նրա երիտասարդությամբ: Ս. Վրացյանին ուղղված նամակներից մեկում (այն անթվակիր է, բայց ամենայն հավանականությամբ գրվել է 1912-1913թթ.) նա գրում էր. «Խնդրում եմ լուրջ ուշադրութիւն դարձրու Վանին. հիանալի երիտասարդութիւն ունինք: Ես շատ եմ ոգեւորուած»: Քիչ անց նա գրում էր. «... Ես աւելի վանեցի եմ զգում ինձ, քան թէ դարաբաղցի: Եւ ի՞նչ ես կարծում. Վանի վերջալույսը տեսնողը ուրիշ տեղացի կ'ուզէ՞ լինել»⁷²: Քիչ է ասել, թե ոգևորված էր: Նա շարունակ պահանջներ էր ներկայացնում դոսի ընկերներին տեղական խնդիրները լուծելու համար: Ս. Վրացյանն այդ կապակցությամբ գրել է. «Արամից, Վանից, յաճախ

⁶⁹ Արամ, Տիրան Մինասեան («Հայրիկ»), «Դրօշակ», 1912, մայիս, N 5, էջ 119:

⁷⁰ «Զանգ», 1919, փետրվարի 9, N 16:

⁷¹ Յուշապատումն Յ.Յ. Դաշնակցութեան. 1890-1950, Պատրաստեց Ա. Վրացեան, Բոստոն, 1950, էջ 466:

⁷² Վրացեան Ա., Հին թղթեր նոր պատմութեան համար, Բէյրութ, 1962, էջ 37:

նամակ էի ստանում եւ միշտ նրա կամ աղն էր պակաս, կամ մաղը»⁷³: 1913թ. սեպտեմբերի 6-ին գրած նամակով Արամը Ս. Վրացյանին խնդրում էր աջակցել Ամերիկա անցած դոկտոր Ռեյնոլդսին՝ Վանում ամերիկյան քոլեջ բացելու նպատակով կատարվելիք հանգանակության գործում: Դա թելադրված էր ամերիկացիների հետ կրթական հարցերի շուրջն առկա համերաշխությամբ⁷⁴:

Սակայն, Վանում հաստատված հարաբերական անդորրը երկար չտևեց: Ժողովրդավարական կարգախոսներով իշխանության անցած երիտթուրքերը կարճ ժամանակ անց նոր թափով վերսկսեցին նախկին վարչակարգի հայաջինջ քաղաքականությունը: Ստեղծված իրավիճակում Արամը, որը երբեք չէր մտածել վերջ տալ ինքնուրույն ազգային-ազատագրական շարժմանը, դարձյալ հակվեց, այլևս անդառնալիորեն, ազգային ուժերով ազգային խնդիրները լուծելու գաղափարին:

⁷³ Նույն տեղում, էջ 36:

⁷⁴ Նույն տեղում:

ԱՌԱՋԻՆ ՀԱՍԱՇԽԱՐՀԱՅԻՆ ՊԱՏԵՐԱԶՄԻ ՏԱՐԻՆԵՐԻՆ

ՎԱՆԻ ՀԵՐՈՍԱՍԱՐՏԻ ԿԱԶՄԱԿԵՐՊՈՒՄԸ

Երբ սկսվեց Առաջին համաշխարհային պատերազմը, թուրքական իշխանությունների հետ բանակցությունների միջոցով Արամ Մանուկյանն ամեն կերպ փորձեց Վանի հայությանը փրկել զրկանքներից ու ջարդերից, իսկ երբ խաղաղ միջոցներով այլևս անհնար դարձավ կանխել հայոց մեծամասշտաբ ջարդերը, Արամը, որպես ՀՀԴ ներկայացուցիչ, քաղաքական այլ ուժերի հետ ձեռնարկեց 1915թ. ապրիլյան ինքնապաշտպանության կազմակերպմանը. «Մեր կացութիւնը յուսահատական էր այն ատեն,– նկատել է Արամը:– Ընտրելու մէկ բան միայն կը մնար մեզի համար. կամ անձնատուր ըլլալ եւ թողուլ որ խողխողեն մեզ իբր ոչխար, կամ մեռնիլ զէն ի ձեռին կռուելով: Այս վերջինը նախընտրեցինք»⁷⁵: Արամը քաջ գիտակցում էր, որ հայոց դարավոր թշնամուն միայն ազգային միասնության դեպքում կարելի է հակահարված հասցնել, և այդ իսկ պատճառով ամեն ինչ արեց այդ միասնությանը հասնելու համար: Ինքնապաշտպանության ընդհանուր գործի դեկավարման մեջ ներգրավվեցին բոլոր հեղինակություն ունեցող գործիչները՝ անկախ նրանց կուսակցական պատկանելությունից: 1915թ. ապրիլի 5-ին Արամի նախաձեռնությամբ ստեղծվեց Վանի Հայ ինքնապաշտպանության զինվորական մարմինը, որում նրա առաջարկով ընդգրկվեցին փորձառու զինվորականներ՝ դաշնակցականներ Բուլղարացի Գրիգորը, Կայծակ Առաքելը, ռամկավար Արմենակ Եկարյանը, անկուսակցական Փանոս Թերլեմեզյանը և ուրիշներ⁷⁶: Որոշ ժամանակ անց Արամը նույնպես մտավ այդ մարմնի մեջ⁷⁷ և դեկավարեց Վան-Այ-

⁷⁵ Լեփսիուս Յ., Գաղտնի տեղեկագիր տոքթ. Եփաննես Լեփսիուսի: Հայաստանի ջարդերը, Թարգմանեց՝ Մ. Շամտանճեան, Կ. Պոլիս, 1919, էջ 106:

⁷⁶ Հերոսապատում Սեօ Եղեռնի, Պէյրուք. 1978, էջ 59: Վան-Վասպուրականի հերոսամարտը-75 (կազմ. Հ. Փափազյան). Երևան, 1990, էջ 22:

⁷⁷ ՀԱԱ, ֆ. 242, ց. 1, գ. 74, ք. 39:

գեստանի ինքնապաշտպանությունը⁷⁸: Արամի գործուն մասնակցությամբ ստեղծվեցին Ջինվորական մարմնին ենթակա մի շարք կառույցներ՝ Ջինաբաշխ մարմինը, Տեղեկատու դիվանը, զինագործարանը, հիվանդանոցը և այլն: Ջինվորական մարմնի քարտուղար Օ. Մխիթարյանի հավաստմամբ՝ «Ջինվորական մարմնի և ամոր յարակից օրգաններու, ինչպես նաև Վանի հերոսամարտի ամբողջ բարոյական ղեկավարությունը»⁷⁹ ընկել էր Արամի վրա:

Վանին 1915թ. հերոսամարտին անդրադարձած աղբյուրների գերակշռող մասը օտար (մաս թուրքական) և հայրենի, դաշնակցական և ոչ դաշնակցական, ուղղակիորեն, թե անուղղակիորեն Արամին ճանաչել են ինքնապաշտպանության կազմակերպիչ և ղեկավար, կենտրոնական դեմք Վանում: Հայ ազատագրական շարժման մեծամուն գործիչներից մեկը՝ Գարեգին Նժդեհը բարեբախտություն է համարել վանեցիների գլխին կախված ճակատագրական այդ պահին Արամի ներկայությունը Վանում, որի իմաստությունը ժողովրդի հերոսականության հետ պիտի կասեցներ թշնամու առաջխաղացումը⁸⁰:

20-րդ դարասկզբի քաղաքական գործիչ Հակոբ. Ջավրյանը Վանի հայոց գլխավոր էր համարում դարձյալ Արամ Սանուկյանին: Նրան ներկայացնելով որպես բնակչության շրջանում մեծ հեղինակություն վայելող, «ուժեղ բնավորություն» ունեցող ժողովրդական գործիչ, Ջավրյանն ավելացնում էր, որ ռազմական գործողությունների սկզբից Արամը դարձել էր քաղաքի պարետ և դրսևորել զարմանալի եռանդ ու խելամտություն քաղաքի պաշտպանության գործում: Ըստ նրա՝ բոլորն Արամին «ենթարկվում էին անառարկելիորեն և հավատում էին նրան»⁸¹:

Արամին, որպես Վանի հերոսամարտի կազմակերպիչներից մեկի, բարձր գնահատական է տվել նաև Ջևղեթի ռազմական խորհրդական, գերմանացի սպա Ռաֆայել դը Նոգալեսը⁸²:

⁷⁸ Այգեստանից մեկուսացված Քաղաքամեջում՝ Վան քաղաքի երկրորդ մասում, ևս հայերը դիմեցին ինքնապաշտպանության:

⁷⁹ Մխիթարյան Օ., Վանի հերոսամարտը, Սոֆիա, 1930, էջ 54:

⁸⁰ Նույն տեղում, էջ 4:

⁸¹ Հ ԱԱ, ֆ. 503, ց. 1, գ. 64, ք. 12-14:

⁸² Սահակյան Ռ. Օ., Վասպուրականի հայության գոյամարտը 1915 թվականին, «Պատմա-բանասիրական հանդես», Երևան, 1995, N 1, էջ 23:

Երիտթուրքերի ղեկավարներից Նազըմը, խեղաթյուրելով իրականությունը, Վանի հերոսամարտը համարել է ապստամբություն, իսկ Արամին՝ «հայ ապստամբապետ»⁸³:

Արամին Վանի հայերի ղեկավար է անվանել ինքնապաշտպանության ականատես, ամերիկացի միսիոներուհի Նեփը: Մեկ այլ ականատես, գերմանական որբանոցի տնօրեն Սփյորին Արամին անվանել է Վանի հայերի առաջնորդներից⁸⁴:

Արամին ինքնապաշտպանների առաջնորդ է համարել Անդրանիկ Օզանյանը⁸⁵:

Հարցին իրենց գնահատականներն են տվել նաև պատմաբանները: Ա. Համբարյանը գրում է. «Արամը թեև չէր մտնում Ձինվորական մարմնի մեջ, բայց ղեկավարում էր նրա աշխատանքները»⁸⁶: Հ. Սիմոնյանը նրան անվանում է «Վանի կռիվները ղեկավարող» գործիչ⁸⁷:

Սփյուռքահայ պատմաբան Ռ. Հովհաննիսյանը նշելով, որ Ձինվորական մարմինը գլխավորում էր Ա. Եկարյանը, ավելացնում է, որ ինքնապաշտպանության սիրտն ու հոգին Արամն էր, որը Վռամյանի և Իշխանի կորստից հետո ինքնահաստատվեց ոչ միայն որպես Դաշնակցության առաջնորդ, այլ նաև որպես ազգային առաջնորդ⁸⁸:

Աղբյուրների համեմատական վերլուծությունից, հայ պատմագրության կարկառուն դեմքերի ապակուսակցական դիրքերից տված գնահատականներից, ինքնապաշտպանությանը Արամի ունեցած մասնակցության կոնկրետ փաստերի ուսումնասիրությունից հետևում է, որ ինքնապաշտպանության կազմակերպման և ղեկավարման գործում Արամն ունեցել է առաջնակարգ ղեկավար մասնակցություն: Ասվածից չի հետևում, թե նա միակ ղեկավար անձն էր: Ինքնապաշտպանության

⁸³ Ռիֆաթ Մելվան Չատ, Օսմանյան յեղափոխութեան մութ ծալքերը եւ իթքիատի հայաշինջ ծրագիրները, Երևան, ֆաքս. հրատ., 1990, էջ 92:

⁸⁴ Մեծ պատերազմը եւ հայ ժողովուրդը, էջ 49; Ակունի Ս., Սիլիոն մը հայերու ջարդի պատմութիւնը, Կ. Պոլիս, 1920, էջ 36-37:

⁸⁵ Նույն տեղում, ֆ. 370, ց. 2, գ. 152, թ. 1; Андраник Озанин, Документы и материалы, «Բանբեր Հայաստանի արխիվների», 1991, N 1-2, էջ 165:

⁸⁶ Համբարյան Ա., Արևմտահայերի 1915թ. կոտորածները և ինքնապաշտպանական մարտերը, Երևան, 1990, էջ 41-42:

⁸⁷ Սիմոնյան Հ., Անդրանիկի ժամանակը, գ. Ա, էջ 451:

⁸⁸ Hovannisian R., Armenian Van/Vaspurakan, U.S.A. 2000, p. 226:

ղեկավարման գործում, հատկապես ռազմական մասով մեծ դեր են կատարել նաև Ա. Եկարյանը, Կայծակ Առաքելը, Գր. Բուլղարացին:

Կարծում ենք խնդրի առթիվ ընդունելի է Արմենակ Փոխարյանի հետևյալ բնորոշումը. «Ձինվորական մարմնի մեջ Արամը, հենված իր ներկայացրած կուսակցության ուժին և իր հմայքին, այդ մարմնի կենտրոնական անձնավորությունն էր, և ամենքը՝ թե՛ ժողովրդական հիմնարկությունների ներկայացուցիչներ, թե՛ օտարներ և թե՛ ընկերներն առհասարակ նրանից խորհուրդ էին հարցնում որևէ գործի համար»⁸⁹:

Ձինվորական մարմինն անմիջապես ձեռնարկեց ինքնապաշտպանական մեծածավալ աշխատանքներ: Կազմվեց ինքնապաշտպանության հատակագիծ, Այգեստանը բաժանվեց պաշտպանական շրջանների: Ապրիլի 6-ի դրությամբ ստեղծվել էին պաշտպանական հինգ շրջաններ՝ իրենց շրջանապետերով, 50 դիրքեր՝ նույնքան խմբապետերով. զինվորների թիվը 800 էր, որից 400-ը հրացանակիր, 400-ը՝ ատրճանակով զինված⁹⁰: Թուրքական կողմը հայոց դեմ կենտրոնացրել էր 6000-12000 կռվող և 12 թնդանոթ:

Վան-Այգեստանի ինքնապաշտպանությունը սկսվեց 1915 թ. ապրիլի 7-ին: Այդ օրը թուրքերը Սահակ բեյի փոսից, Յաջի Բեքիրի զորամուցից, Թոփրակ կալեի կողմից բացված հուժկու հրետակոծությունից հետո անցան լայնածավալ հարձակման. հայկական դիրքերի համար սպառնալի կացություն ստեղծվեց: Առանձնապես օրհասական էր դրությունը Սահակ բեյի դիրքում: Գիտակցելով պահի լրջությունը՝ Արամը, համապատասխան ցուցումներ տալով Ձինվորական մարմնի անդամներին, իր թիկնապահների և մի խումբ ընկերների հետ անմիջապես շտապեց այնտեղ: Հայտնվելով հրացանային և թնդանոթային ուժգին կրակի տակ՝ նա առաջնորդին վայել իր պահվածքով (զինվորներից յուրաքանչյուրի հետ առանձին զրուցում էր, համբուրում նրանց, գոտեպնդում և խորհուրդներ տալիս) բարձրացրեց զինվորների մարտական ոգին⁹¹: Ռազմական տեսակետից կարևորելով հաղորդակցությունը դիրքերի միջև՝ Արամը դիրքապահներին հանձնարարեց անցուղիներ փորել Սահակ բեյի դիրքից

⁸⁹ Վան-Վասպուրականի հերոսամարտը, էջ 24:

⁹⁰ Մխիթարյան Օ., նշվ. աշխ., էջ 65:

⁹¹ Նույն տեղում, էջ 74-75:

մինչև Թովմասյան դիրքը՝ խոստանալով ուղարկել օգնական բանվորական ուժ:

Արամը ծայրահեղ զգուշության կողմնակից էր և գտնում էր, որ ամեն վայրկյան պետք է պատրաստ լինել իրավիճակի բարդացմանը: Կռվի առաջին օրվա երեկոյան, երբ թշնամին ժամանակավորապես դադարեցրել էր հարձակումը, նա հայ ինքնապաշտպաններին կարգադրեց զգոն լինել՝ «առաջն առնելու համար ամեն տեսակ դավադրության»⁹², և չսխալվեց: Շուտով թշնամին նոր ուժով վերսկսեց հարձակումը և դարձյալ հանդիպեց հայերի անկոտրում դիմադրությանը: Արամի, Ջինվորական մարմնի անդամներ Ա. Եկարյանի, Գր. Բուլղարացու և Կայծակ Առաքելի ղեկավարությամբ հայերը ոչ միայն հուսալիորեն պաշտպանվում էին, այլև արժանի հակահարված հասցնում թշնամուն: Ապրիլի 8-ին և 9-ի լույս 10-ի գիշերը հայկական ուժերը, ցուցաբերելով արիություն ու հնարամտություն, գրավեցին թուրքական կարևորագույն հենակետերի վերածված անգլիական հյուպատոսարանի շենքը և Համուդ աղայի զորանոցը: Ջորանոցի գրավմանն իր անմիջական մասնակցությունը բերեց նաև Արամը⁹³:

Արամի գործունեությունը չէր սահմանափակվում միայն Վան-Այգեստանով: Դեռևս ապրիլի 14-ին, ընդունելով թուրքերի դեմ մաքառող շատախցիների պատվիրակությունը, նա Շատախի, Փեսանդաշտի և Քերծի ռազմիկներին հրահանգեց վարել բացառապես պաշտպանական մարտեր ու շարունակ լինել ժողովրդի հետ: Ելնելով քաղաքի պաշտպանների բարոյահոգեբանական, ռազմական ու պարենային կացությունը չժանրացնելու նկատառումներից՝ Արամն արգելեց Շուշանց-Վարագ գծում հավաքված 5000 զավառահայ փախստականների նահանջը Վան, և Ջինվորական մարմնի մյուս անդամների հետ քայլեր ձեռնարկեց նրանց պաշտպանության համար: Ապրիլի 14-ին Արամի հրահանգով այնտեղ ուղարկվեցին Այգեստանում ապաստանած 15000 գաղթականներից առանձնացված սպառազեն գյուղացիները: Նույն օրը Շուշանց-Վարագ գծի հրամանատար նշանակվեց դաշնակցական գործիչ Շիրինը: Ձեռնարկված քայլերի շնորհիվ տեղի ազգաբնակչությունը մինչև ապրիլի 25-ը դիմադրեց թշնամուն և հետո միայն հարկադրաբար նահանջեց Այգեստան:

⁹² Նույն տեղում, էջ 79:

⁹³ «Աշխատանք», Վան, 1915, հունիսի 17, N 25 (224):

Մարտական գործողությունները վանում նոր թափ ստացան ապրիլի 19-ին: Իրենց հերոսությամբ աչքի ընկան Ա. Եկարյանն ու Կայծակ Առաքելը, որոնց միջամտության շնորհիվ կործանումից փրկվեց Թաղաքյահրեզի շրջանը: Այդ օրը թուրքերը տվեցին 40-ից ավելի զոհ⁹⁴: Թուրքական հարձակումն իր գագաթնակետին հասավ ապրիլի 21-ին: Այգեստանի վրա արծակվեց 500 ռումբ: Արամն այդ օրը տարերքի մեջ էր. նա շարունակ դիրքից դիրք էր անցնում և ոգևորում հայ զինվորներին⁹⁵: Ուժերի գերազույն լարմամբ հետ մղվեցին բոլոր գրոհները: Թշնամուն ոչ մի հաջողություն չբերեց նաև ապրիլի 28-ի հարձակումը, որն ուղեկցվում էր ուժգին ռմբակոծությամբ: Հայոց դիմադրությունն այնքան հերոսական ու կազմակերպված էր, որ թուրքական գրոհներից մեկն առաջնորդող գերմանացի մի սպա, կրած անհաջողությունից հուսահատված, հեռացավ վանից՝ խոստովանելով, թե այդպիսի դիմադրության չէր սպասում⁹⁶:

Մայիսի 3-ին հայ ինքնապաշտպանները հետ մղեցին թուրքական վերջին գրոհը: Չկարողանալով կոտրել վանեցիների հերոսական դիմադրությունը և տեղեկանալով ռուսական բանակի առաջխաղացման մասին նահանգի կուսակալը դադարեցրեց քաղաքի պաշարումը և նահանջեց Բիթլիսի ուղղությամբ:

Վանի հերոսամարտը հաստատեց այն իրողությունը, որ միասնաբար գործելու և ճիշտ ղեկավարվելու դեպքում հայությանն անկարելի է հաղթել: Հերոսամարտի շնորհիվ ավելի քան 150 հազար վասպուրականցիներ փրկվեցին անխուսափելի կոտորածներից: Արևմտահայության գերակշռող մեծամասնությունը, ցավոք, զոհ գնաց թուրքերի կողմից իրականացված ցեղասպանությանը:

1915թ. մայիսի 5-6-ը Վան մտան Արարատյան կամավորական գունդը և ռուսական բանակի «Բայազետ»ի զորախումբը: Վերջինիս հրամանատար գեներալ Ա. Նիկոլակին Արամը վանեցիների անունից հանձնեց քաղաքի բանալիները⁹⁷: Ի պատասխան հերոսամարտի հաղթանակի առթիվ իր և ՀՀԴ հասցեին կատարած կամավորական զնդի

⁹⁴ ՀԱԱ, ֆ. 242, ց. 1, գ. 76, ք. 5:

⁹⁵ Հերոսապատում Մեծ Եղեռնի, էջ 78:

⁹⁶ Բարբի Հ., Սարսափի երկրին մէջ: Նահատակ Հայաստան, Թարգմանեց՝ Ա. Շամտանճեան, Կ. Պոլիս, 1919, էջ 84:

⁹⁷ ՀԱԱ, ֆ. 45, ց. 1, գ. 2, ք. 45, ֆ. 57, ց. 5, գ. 102, ք. 44, ֆ. 242, ց. 1, գ. 74, ք. 51:

հեծելագործի հրամանատար Խեչոյի գովասանքի՝ Արամն ազնվորեն նշեց, թե Վանում «կուսակցությունը չէ որ գործ տեսաւ, այլ ամբողջ ժողովուրդը»⁹⁸։ Հիրավի, թեև հերոսամարտում Ղաշնակցության դերը վիթխարի էր, սակայն նրան մասնակցել էին մահ մյուս կուսակցությունները, ամբողջ ժողովուրդը։

ՎԱՆ-ՎԱՍՊՈՒՐԱՎԱՆԻ ՆԱԴԱՆԳԱՊԵՏԸ

1915թ. մայիսի 7-ից 16-ը ռուսական Կովկասյան բանակի հրամանատարության հրամաններով Արամ Մանուկյանը նշանակվեց Վանի նահանգապետ⁹⁹։ Այդ նշանակումը միանգամայն բնական էր։ Վանում իր երկարամյա գործունեության ընթացքում, և հատկապես Ապրիլյան հերոսամարտի օրերին մա ձեռք էր բերել մեծ հեղինակություն։ Նրա հեղինակությունն ընդունում էին բոլորը՝ և՛ ղաշնակցականներն ու ոչ ղաշնակցականները, և՛ օտար գործիչները, և՛ նույնիսկ թուրքերը։

Արամի գլխավորությամբ վասպուրականահայությունը ձեռնամուխ եղավ հայրենի նահանգի վերաշինմանը։ Ձևավորվեցին նահանգի վարչական կառուցվածքը և կառավարման համակարգը, առանց որոնց խոսք չէր կարող գնալ 1915թ. ցեղասպանությունից մազապուրծ հայության առջև ծառացած բազմաբնույթ խնդիրների լուծման մասին։ Հատկանշական է այն փաստը, որ Վանի կառավարությունը ձևավորելիս Արամը հերթական անգամ դրսևորեց ապակուսակցական մոտեցում՝ նրանում ընդգրկելով բոլոր կարող ուժերին, ինչ կուսակցության էլ նրանք պատկանեին։ Այնուհետև նահանգապետությունը ձեռնամուխ եղավ նահանգի անվտանգության ապահովման, քայքայված տնտեսության վերականգնման, հատկապես գյուղատնտեսական աշխատանքների վերսկսման, գաղթականության խնամքի, օրինականության և կարգ ու կանոնի ապահովման աշխատանքներին, հայ բնակչության շահերը ռուս զինվորականների ու ռուսական իշտությունների պաշտպանելուն և այլ խնդիրների լուծմանը։

⁹⁸ Յուշեր Արմենակ Եկարեանի, էջ 233։

⁹⁹ Հ ԱԱ, ֆ. 242, ց. 1, գ. 39, ք. 4, գ. 19, ք. 44։

Պետական ավանդույթների բացակայության և պետական լծակների նոր ձևավորման պայմաններում Արամը հարկադրված էր մեծ ժամանակ հատկացնել նաև բնակչության շահերի պաշտպանությանը:

Առաջնահերթ լուծում պահանջող խնդիրներից էր ինքնապաշտպանության ապահովումն ու նահանգից հեռացած քրդերի վերադարձի կանխումը: Քրդական հարձակումներից պաշտպանվելու համար ստեղծվեցին ինքնապաշտպանական խմբեր, որոնք ընդհուպ մինչև հուլիսյան գաղթը հաջողությամբ կատարեցին իրենց վրա դրված խնդիրը: Այլևայլ, բայց հատկապես քրդերի վերադարձի առնչությամբ առկա էին լուրջ հակասություններ Արամի և զորահրամանատարության միջև: Եթե Արամը ձգտում էր խափանել հայոց ցեղասպանությանը մասնակցած քրդերի վերադարձը, ապա ռուսական կողմը նրանց հանդեպ ցուցաբերում էր կարեկցական մոտեցում: Այսպես, կովկասյան չորրորդ բանակային կորպուսի հրամանատարը 1915թ. հունիսին թույլատրել էր ռուսական հպատակությունն ընդունած քրդերի վերադարձն իրենց նախկին գյուղեր¹⁰⁰: Անհանգստացած իր ժողովրդի ճակատագրով՝ Արամը, դրսևորելով մեծ պատասխանատվություն իր ժողովրդի նկատմամբ, հունիսի 26-ին և 27-ին դիմեց ռուսական բանակի հրամանատարությանը՝ փորձելով կանխել այդ որոշման կենսագործումը¹⁰¹: Մատնանշելով քրդերի ոճրագործությունները նահանգի հայկական բնակավայրերում և թուրքերի հետ համատեղ գործողությունները ռուսական զորքերի դեմ, քրդական հավատարմության դրսևորումը ռուսներին բացատրելով նրանց պարենային ծանր կացությամբ՝ Արամը գտնում էր, որ նրանց հարկ է դիտել որպես ռազմագերիների՝ դրանից բխող հետևանքով կամ էլ նրանց մեջ տեսնել սովորական հանցագործների և ի հարկին պատժել: Նա աշխատում էր հրամանատարությանը համոզել, որ քրդերի վերադարձով կխախտվի անդորրը՝ Վանում այն պարզ պատճառով, որ ջարդված և կողոպտված հազարավոր հայերի հարազատները չէին կարողանա անտարբեր մնալ իրենց թշնամիների հանդեպ: Նա իրավացիորեն նշում էր, որ թույլատրել քրդերին վերադառնալ՝ կնշանակի, թե կարելի է

¹⁰⁰ Նույն տեղում, ֆ. 242, ց. 1, գ. 39, ք. 42; ֆ. 503, ց. 1, գ. 62, ք. 6:

¹⁰¹ Նույն տեղում, ֆ. 242, ց. 1, գ. 39, ք. 42-47:

անպատիժ կերպով կողոպտել և սպանել հայերին և վերջիններիս թուրքիայում «ռուսական զենքի հաջողության միակ անկեղծ կողմնակիցների» մոտ կառաջացնի ծանր հիասթափություն Ռուսաստանի հանդեպ: Իր մտքերն ազդու դարձնելու նպատակով Արամը համարձակորեն նշում էր, որ որոշման գործադրման դեպքում ինքը չի կարող իր վրա պատասխանատվություն վերցնել Վանի շրջանում հանդարտության և օրինակարգի պահպանության համար և հայտնում էր իր բողոք-նկատառումները. 1) չգործադրել հունիսի 22-ի հրամանը, 2) հայոց ջարդերի ու թալանի մասնակից հանձնված քրդերին ենթարկել պատասխանատվության, 3) զգուշացնել չգրավված տարածքների մահմեդականներին, որ հայերի նկատմամբ ոճրագործությունների մասնակիցները ենթակա են պատասխանատվության: Թեև նահանգապետի փաստարկները հիմնավոր էին, իսկ նշված հրամանը հակասում էր 1915թ. գարնանը Անգլիայի, Ֆրանսիայի և Ռուսաստանի հրապարակած հռչակագրին, որով հայոց ջարդերի իրականացնողները համարվում էին պատասխանատու, Վանի կայազորի պետը, հասկանալի համարելով հանդերձ Արամի անհանգստությունը, մերժեց չեղյալ համարել հրամանը, գտնելով, թե իբր դա կնշանակեր արտոնել հայերին հարձակվել քրդերի վրա և կողոպտել նրանց¹⁰²: Իրական պատճառն այլ էր. ռուսական հրամանատարությունը, ելնելով պատերազմական իրավիճակից, որոշակիորեն վարում էր քրդերին սիրաշահելու քաղաքականություն:

Արամի գլխավորությամբ արդյունավետ քայլեր կատարվեցին փախստական ժողովրդի պահպանության ուղղությամբ: Տասնյակ հազարների հասնող թշվառների միակ ապավենը հայկական կառավարությունն էր, որն ամեն ինչ արեց նրանց սովի և համաճարակի ճիրաններից փրկելու համար: Համաճարակներից օրական մահանում էր 30-40 մարդ: Շուրջ 15-25 հազար գաղթականների տեղավորելով հիմնականում Աղթամարում և Ոստանում, կառավարությունն այլ վայրերից սննդամթերք էր հասցնում նրանց համար: Նահանգապետության միջոցները սակավ էին, և Արամը օգնության խնդրանքով դիմեց նախ նահանգի ժողովրդին: Գտնելով, որ սովն ու հիվանդությունները կարող են ավելի մեծ

¹⁰² Նույն տեղում, գ. 5, ք. 176; ֆ. 503, ց. 1, գ. 62, ք. 8:

ավերածություններ գործել, քան թուրքական բռնությունները, Արամը ծագումն էր արթնացնել ժողովրդի զգացմունքները և մղել նրան գործողության ի նպաստ սովյալների: Նա նշում էր. «Մի՛ մոռնաք որ փոխադարձ օգնութեամբ միայն կրնանք պահել մեր ազգային գոյութիւնը: Եթէ մէկը չ'օգնէ միւսին, մենք կորած ենք. մէկը ամենքին, ամենքը մէկին, հոս է մեր փրկութեան խարիսխը»: Նահանգապետը ժողովրդին կոչ էր անում աջակցել գաղափարապետերին, որոնց ինքը համծնարարել էր հանգանակություն ծավալել սովյալների օգտին¹⁰³: 1915թ. հունիսի 23-ի դրությամբ տեղական միջոցներով հավաքվել էր 10000 փութ ցորեն, որի կեսը, ինչպէս նաև 8000-10000 ոչխար, ավելի քան 2000 խոշոր անասուններ արդեն իսկ բաժանվել էր ժողովրդին: Սակայն ներքին ռեսուրսները բավարար չէին: Նահանգապետը և Վանի շրջանային վարչությունը դիմեցին նաև Կովկասի և գաղութների հայությանը՝ խնդրելով արագացնել բժիշկների, դեղորայքի, սննդի և երկրագործական մեքենաների առաքումը¹⁰⁴: Արամը խնդրեց նաև Ամենայն Հայոց կաթողիկոս Գևորգ Ե Սուրենյանցի աջակցությունը¹⁰⁵: Օգնությունն անհրաժեշտ էր ոչ միայն տվյալ պահի, այլ նաև ծնունդ պահուստ կուտակելու համար: Օգնությունը դրսից առաքվեց ժամանակին:

Արամի մտածված, հետևողական միջոցառումների շնորհիվ Վանի հայկական նահանգապետությունը օր-օրի ոտքի էր կանգնում. կյանքը Վան-Վասպուրականում զարթոնք էր ապրում: Ապագայի հանդեպ լավագույն հույսերով տոգորված ժողովուրդը վերականգնում էր ավերված օջախները, կառուցում նորերը, մշակում դաշտերն ու այգիները, վերաբացում արհեստանոցներն ու խանութները, փոերը, շուկան, աշխուժացնում առևտուրն ու կրթական կյանքը:

Բազմադարյան պետականագրկությունից հետո Արամի գլխավորությամբ իրականացված քայլերը Վանի հայկական նահանգապետության ստեղծման ու ամրապնդման ուղղությամբ, այն է՝ նահանգի վարչական կառուցվածքի ձևավորում, ազգային գործիչներով համալրված

¹⁰³ Խույն տեղում, ֆ. 242, ց. 1, գ. 43, ք. 1, գ. 68, ք. 1:

¹⁰⁴ «Մշակ», 1915, հունիսի 9, N 147:

¹⁰⁵ Ավետիսյան Մ., Փաստաթղթեր Արամ Մանուկյանի պետական գործունեության մասին, «Բանբեր Հայաստանի արխիվների», 1990, N 2, էջ 137-138:

վարչական ապարատի ստեղծում, նահանգի հայության ու կառավարության առջև կանգնած խնդիրների լուծում ազգային շահերին համապատասխան ոգով, իրենց մեջ պարունակում էին պետականությանը բնորոշ քայլեր: Առանց չափազանցության Վանի նահանգապետությունը կարելի է համարել հայոց նորագույն պետականության նախատիպ:

Դժբախտաբար, Վանի հայկական նահանգապետությունը երկար կյանք չունեցավ: Ռուս-թուրքական Կովկասյան ռազմաճակատից ռուսական Կովկասյան բանակի IV կորպուսի զորամասերի նահանջի օրերին՝ զորահրամանատարության հրամանով Վան-Վասպուրականի հայությունը հուլիսի 18-ին բռնեց հարկադիր գաղթի ուղին: Նահանգապետ Արամը հանդես բերելով ազգային-պետական մտածողություն, հայրենասիրություն, պատասխանատվության և պարտքի բարձր զգացում իր ժողովրդի նկատմամբ, վճռակյանապես դեմ արտահայտվեց գաղթին, այն համարելով կործանարար հայության համար և ընտրեց դիմակայության կազմակերպման դժվարին ուղին: Սակայն գաղթի կասեցումը նրա և հայրենամկեր մյուս ուժերի կամքից վեր գործ էր:

ԱԶԳԱՅԻՆ-ՔԱՂԱՔԱԿԱՆ ԳՈՐԾՈՒՆԵՌԹՅՈՒՆԸ 1916-1917ԹԹ.

Հարկադրաբար հեռանալով Վանից, Արամ Մանուկյանը մինչև 1917թ. դեկտեմբերը հաստատվեց Թիֆլիսում և ակտիվորեն մասնակցեց Անդրկովկասում ու նրա սահմաններից դուրս եռացող ազգային-քաղաքական կյանքին, որի առանցքը ցեղասպանությունից մազապուրծ արևմտահայ փախստականների ճակատագիրն էր: 1916թ. մարտի 2-ին Արամը մասնակցեց Բաքվի Հայոց Ազգային բյուրոյի նիստին և հաղորդեց արևմտահայությանը պատուհասած արհավիրքի մասին¹⁰⁶: 1916թ. մայիսին Արամը մասնակցեց Պետրոգրադում գումարված հայ փախստականների առաջին համագումարին¹⁰⁷, որտեղ քննության դրվեցին արևմտահայ փախստականներին նյութական օժանդակություն ցուցաբերելու,

¹⁰⁶ Նույն տեղում, ֆ. 223, ց. 1, գ. 111, ք. 63:

¹⁰⁷ «Աշխատանք», 1916, մայիսի 4, N 1; Վրացեան Ս., Հին թղթեր նոր պատմութեան համար, էջ 211:

նրանց բժշկական, կրթական և այլ կարիքները բավարարելու հարցերը (ցարական աստիճանավորներն արգելել էին քաղաքական հարցերի ըննարկումը): Բնականաբար, այդ խնդիրները հաջողությամբ իրականացնելու համար հարկավոր էր ստեղծել փախստականների գործերը տնօրինող կենտրոնական մարմին, որը կկորդինացներ մնացյալ բոլոր մարմինների աշխատանքը: Մի շարք պատգամավորներ, այդ թվում Մ. Պապաջանյանը և Արամը գտնում էին, որ նոր կառույցի նստավայրը պետք է գտնվեր ժողովրդին հնարավորին չափ մոտ, քանզի այդ ժամանակ այն ավելի լավ կտեսներ նրա կարիքները և, բնականաբար, կգործեր առավել արդյունավետ: Այդ տեսակետն ընդունվեց ժողովականների կողմից: Համագումարը ցանկալի արդյունքը չտվեց, այդ իսկ պատճառով նոր հավաք գումարելու կարիք առաջացավ: 1916թ. դեկտեմբերին Արամը, ֆիդայապետ Անդրանիկը և ռամկավար գործիչ Ա. Դարբինյանը հանդես եկան արևմտահայերի համագումար հրավիրելու նախաձեռնությամբ, սակայն ցարական իշխանություններն արգելեցին:

Արամ Մանուկյանի և ազգային-քաղաքական մյուս գործիչների և ուժերի գործունեությունն ավելի ակտիվացավ և, որ կարևոր է, արգասաբեր եղավ 1917թ. փետրվարյան հեղափոխությունից հետո, երբ Ռուսաստանում մտցվեցին քաղաքական-դեմոկրատական ազատություններ: Արամը, ֆիդայապետ Անդրանիկը և Ա. Դարբինյանը երկրորդ անգամ ձեռնամուխ եղան արևմտահայերի համագումար հրավիրելու աշխատանքներին, և այս անգամ հասան հաջողության: 1917թ. մայիսի 2-11-ը Երևանում գումարվեց արևմտահայերի առաջին համագումարը, որն ընդունեց կարևորագույն որոշումներ միտված արևմտահայության գոյության ապահովմանը, Արևմտյան Հայաստանի վերաշինմանը, ստեղծեց արևմտահայության կյանքը ղեկավարող մարմիններ և այլն:

Մինչև համագումարի բացումը, մայիսի 1-ին տեղի ունեցավ հիշարժան իրադարձություն Արամ Մանուկյանի կյանքում: Այդ օրը Երևանում նա ամուսնացավ Կատարինե Զալյանի՝ Ղուրդուղուլիի (Արմավիր) մանկական որբանոցի գլխավոր բժշկուհու հետ: Այդ ամուսնությունից 1918թ. հոկտեմբերին ծնվեց Արամի միակ ժառանգը՝ Սեդա Մանուկյանը (1918-2005)¹⁰⁸:

¹⁰⁸ Ասրյան Ա., Արամ Մանուկյան. կյանքը և գործը..., էջ 16, 147:

Արամը ղեկավար մասնակցություն ունեցավ 1917թ. մայիսի 10-ին երևանում գումարված թուրքահայ դաշնակցականների շրջանային ժողովին, որտեղ քննվեցին փախստականության կրթության, որքանոցների վիճակի բարելավման, տեղերում ժողովրդի կողմից ընտրովի վարչության ձևավորման և այլ հարցեր¹⁰⁹:

Նա իր անմիջական մասնակցությունը բերեց արևմտահայկական նահանգների վերաշինությանը՝ հանդիսանալով ժամանակավոր կառավարության կողմից նշանակված Թուրքահայաստանի ընդհանուր կոմիսարի քաղաքացիական մասի օգնական Յ. Ջավրյանի «աջ բազուկը»¹¹⁰: Նրա միջոցով 1917թ. ամռանը երկրագործական գործիքներ էին ուղարկվում Արևմտյան Հայաստան: Կառավարության աջակցությամբ ծավալված եռանդուն քայլերի շնորհիվ 1917թ. ամռանը Արևմտյան Հայաստան էին վերադարձել մոտ 150 հազար փախստականներ, արագորեն վերականգնվում էին ավերված օջախները և մշակվում պապեմական հողերը:

Արամն ակտիվորեն մասնակցեց նաև 1917թ. սեպտեմբերի 29-ից հոկտեմբերի 13-ը Թիֆլիսում գումարված Հայոց Ազգային համախորհրդակցության աշխատանքներին¹¹¹, որի քննարկմանն էին ներկայացվել փետրվարյան հեղափոխությունից հետո հրատապ դարձած Կովկասյան ռազմաճակատի և վտանգված հայկական շրջանների ապահովության, արևմտահայ փախստականության, Անդրկովկասում ազգամիջյան հարաբերությունների և հայ ժողովրդի համար կենսական այլ հարցեր: Ս. Վրացյանի հաղորդման համաձայն՝ Արամն ընտրվեց արևելահայության կյանքը ղեկավարելու նպատակով ստեղծված Թիֆլիսի Հայոց Կենտրոնական Ազգային խորհրդի անդամ¹¹²: Առաջին հայացքից վերջինիս հաղորդումն անընդունելի է, քանզի ըստ արխիվային տվյալների նա չի եղել Ազգային խորհրդի առաջին կազմում: Սակայն, եթե հաշվի առնենք այն իրողությունը, որ կուսակցություններն իրավասու

¹⁰⁹ «Աշխատանք», 1917, մայիսի 20, N 6:

¹¹⁰ Յուշապատում Յ.Յ. Դաշնակցութեան. 1890-1950, էջ 467:

¹¹¹ Հայոց ազգային համախորհրդակցությունը. Թիֆլիս, 1917թ. սեպտեմբեր-հոկտեմբեր: Փաստաթղթեր ու նյութեր, «Բանբեր Հայաստանի արխիվների», 1992, N 1-2, էջ 106:

¹¹² Վրացյան Ս., Հայաստանի Հանրապետություն, Երևան, 1993, էջ 51:

էին Ազգային խորհրդի իրենց անդամներին փոխարինել, և այն, որ հետագայում կատարվեցին փոփոխություններ, կարելի է ընդունել, որ Արամը որոշ ժամանակ եղել է Ազգային խորհրդի անդամ:

1917թ. հոկտեմբերի 21-ից (մինչև 1918թ. ապրիլի 14-ը) Արամը Երևանի «Աշխատանք» թերթի խմբագիրն էր: Նրա օրոք թերթը, շարունակելով դրական ավանդույթները, արծագանջում էր հայ իրականությանը հուզող խնդիրներին: 1917թ. նոյեմբերի 18-ի խմբագրականը, աչքի առաջ ունենալով ռազմաճակատի քայքայումը, նշում էր, որ Թուրքիան երբեք չի հրաժարվի Անդրկովկասը նվաճելու մտքից և, եթե թուրքական բանակի ճանապարհին ուժեղ պատվար չլինի, նա անպայման կձգտի իրականացնել իր պլանները: Այն հույս էր հայտնում, որ մոտ օրերը գումարվելիք Հայ զինվորական միության համագումարը կկարողանա ամբողջական կազմակերպություն ստեղծել, որ հայ զինվորը կկանգնի հայրենիքի պաշտպանության դիրքերում¹¹³: Նույն թվականի դեկտեմբերի 16-ին թերթը միանգամայն ճիշտ կերպով նկատում էր, որ թուրքական հարձակման դեպքում միակ խոչընդոտը նրա առջև, ինչպես նաև միակ տուժողը լինելու է հայությունը: Անդրկովկասյան հարևանների մասին թերթը զարմանալի հեռատեսությամբ գրում էր. «մեր դրացիները եթե չօժանդակեն, զոնե չը պիտի փորձեն ամենափոքրիկ ընդդիմութիւն մը իսկ ցուցնելու թշնամիին»¹¹⁴: Թերթն անդրադառնում էր նաև ժամանակի ամենահիրատապ խնդիրներից մեկին՝ դասալքությանը, առաջարկելով Հայկական կորպուսը ձևավորելու, դասալիքներին հավաքելու համար չսահմանափակվել միայն զաղափարական կոչերով, այլ այն զուգակցել տարաբնույթ հարկադիր քայլերի հետ¹¹⁵:

1917թ. վերջին ռուսական Կովկասյան ռազմաճակատի քայքայումը, որը սկսվել էր փետրվարյան հեղափոխությանը հաջորդած ամիսներին և խորացել հոկտեմբերյան հեղաշրջումից հետո, թուրքական ներխուժման վտանգի տակ դրեց ոչ միայն Արևմտյան, այլև Արևելյան Հայաստանը: Ցեղասպանության սարսափները տեսած հայությունը տագնապի մեջ էր,

¹¹³ «Աշխատանք», 1917, նոյեմբերի 18, N 56:

¹¹⁴ Նույն տեղում, 1917, դեկտեմբերի 16, N 64:

¹¹⁵ Նույն տեղում, 1917, դեկտեմբերի 9, N 62:

քանզի թուրքերի կողմից Արևմտահայաստանի վերագրավումը և ներխուժումը Արևելյան Հայաստան հղի էր հայ ժողովրդի ամբողջական ոչնչացման վտանգով: Անհրաժեշտ էր արագացնել հայկական զորամիավորումների ստեղծումը, որոնք կփոխարինեին հեռացող ռուսական զորքերին: Դրություները բարդանում էր նրանով, որ ինչպես ամբողջ Անդրկովկասում, այնպես էլ Արևելյան Հայաստանի նշանակալի մասն ընդգրկող Երևանի նահանգում առկա էր իշխանության վակուում: 1917թ. նոյեմբերի 15-ին ստեղծված Անդրկովկասի գործադիր իշխանության նոր բարձրագույն մարմինը՝ Անդրկովկասի կոմիսարիատը՝ բաղկացած հայերի, վրացիների և կովկասյան թաթարների (ներկայումս՝ ադրբեջանցիներ) ներկայացուցիչներից, չդարձավ գործող իշխանություն: Այն ավելի շատ զբաղված էր մութ խաղերով, ավելի շատ հետևում էր օրեցօր բարդացող կացությանը, քան ընթացք տալիս նրան: Այն անտարբեր էր հատկապես պատերազմական մախապատրաստությունների հարցում:

Անդրկոմիսարիատի անգործության պայմաններում երկրամասի ժողովուրդները հայացքները սկեռել էին իրենց ազգային խորհուրդներին, որոնք էլ փաստորեն դարձել էին տեղական իշխանություններ ազգային սահմաններում: Երևանի նահանգում հայությունը հայացքն ուղղել էր դեպի տեղի Հայոց Ազգային խորհուրդը, որը կազմվել էր Թիֆլիսի Ազգային խորհրդի օրինակով: Սակայն, մա՛թեն ընթռնում էր դրության ծանրությունը և իրադարձությունների հավանական ողբերգական ընթացքը, իր անելիքի մասին հստակ պատկերացում չունեի: Ս. Վրացյանը նկատել է, որ սկզբնապես այն «անգույն և անջիղ մի մարմին էր, որ գնում էր դեպքերի հոսանքի հետևից»¹¹⁶: Այն սպասում էր իրահանգների Թիֆլիսից, որի հետ կապն անկայուն էր:

Այդ իրավիճակում՝ 1917թ. դեկտեմբերին Թիֆլիսի Հայոց Կենտրոնական Ազգային և Հայ զինվորական խորհուրդները Արամ Մանուկյանին արտակարգ լիազորություններով գործուղեցին Երևանի նահանգ:

¹¹⁶ Վրացյան Ս., Հայաստանի Հանրապետություն, էջ 125:

ԱՆԿԱԽ ՊԵՏԱԿԱՆՈՒԹՅԱՆ
ՎԵՐԱԿԱՆԳՆՄԱՆ ՈՒ ԿԱՅԱՑՄԱՆ
ՈՒՂԻՆԵՐՈՒՄ

ԱԶԳԱՅԻՆ ՈՒԺԵՐԻ ՀԱՍՄԱՆԱԲՈՒՄԸ ԹՈՒՐՔԱԿԱՆ ՆԵՐՆՈՒԺՄԱՆ ԴԵՄ
ԱՐԵՎԵԼՅԱՆ ՀԱՅԱՍՏԱՆՈՒՄ

1917թ. դեկտեմբերի 18-ին¹¹⁷ Հայոց Կենտրոնական Ազգային և Հայ գինվորական խորհուրդների լիազոր-ներկայացուցչի կարգավիճակով Արամը ժամանեց Երևան: Ինչպես նշում է Հ. Կոստյանը, 1918թ. հունվարից Արամը նաև Արևմտահայ Ապահովության խորհրդի լիազորն էր Երևանում¹¹⁸: Ա. Աստվածատրյանն իրավացիորեն մատնանշել է այդ քայլի դրդապատճառներից թերևս ամենակարևորը: Նա գրում է. «Ազգ. խորհուրդը 1917թ-ին հեռատեսութիւն ունեցաւ և Երեւան ուղարկեց շատ պատասխանատու գործով Արամին՝ աչքի առաջ ունենալով նրա գործ կազմակերպելու եւ այն վարելու բացառիկ կարողութիւնները՝ բացառիկ ծանր պայմաններում»¹¹⁹: Արամի ընտրությունը պայմանավորված էր մեկ կարևոր համգամանքով ևս: Լինելով ՀՀ դաշնակցության ղեկավար դեմքերից՝ նա կարողացել էր ազգային խնդիրների լուծման ժամանակ դրսևորել ապակուսակցական մոտեցում և առավել կայուն հող ստեղծել հաջողության հասնելու համար:

Հաստատվելով Երևանում՝ Արամը, օժտված ազատագրական պայքարի, Վանի 1915թ. հերոսամարտի, այնուհետև՝ համանուն նահանգի քաղաքացիական-պետական կյանքի կազմակերպման հարուստ փորձով, գերմարդկային ճիգեր գործադրեց հայությանը սպառնացող նոր ողբերգությունը կանխելու համար:

¹¹⁷ Ձոհրաբեյան Է., Ազգամիջյան կռիվները Երևանի նահանգում 1918թ., Երևան, 2000, էջ 25:

¹¹⁸ Կոստյան Հ., Հայկական Թերմոպոլիս, «Դրօշակ», 1928, մայիս, N 5, էջ 138:

¹¹⁹ Աստուածատրեան Ա., Սարդարապատի պատմաշինութիւնը: 3. Թուրշեանի «Սարդարապատի հերոսամարտը» գրքին առթիւ, Պէյրուս, 1966, էջ 137:

Նա առաջադրեց հայ ժողովրդի պաշտպանությանն ու ազատությանն միտված հստակ և իրատեսական ուղեգիծ: Նույն օրը Արամը հանգամանալից զեկույցով հանդես եկավ Երևանի Հայոց Ազգային խորհրդի նիստում և ներկաներին ծանոթացրեց Թիֆլիսի Հայոց Ազգային խորհրդի գործունեությանը, տարածաշրջանում տիրող ընդհանուր իրավիճակին՝ կարևոր տեղ հատկացնելով թուրքական վտանգի հանդեպ հայ ժողովրդի անդրկովկասյան գլխավոր հարևանների դիրքորոշմանը: Նա զգուշացնում էր, որ «...աղբբեջանցիք անհամբեր սպասում են թիրքերին, իսկ վրացիները թեև այդքան հեռու չեն գնում, բայց գաղտնի յարաբերութեան մեջ են թիրքերի հետ՝ իրենց կաշին փրկելու համար...»¹²⁰: Իր զեկույցը Արամն ավարտեց մտքերով, որոնք, փաստորեն, ուղենշային դարձան նրա երևանյան գործունեության համար: Ահա դրանք. «Ամեն ոք իր մասին է մտածում: Իր երկրի սահմաններից այն կողմ եթե նայող կայ, նայում է միայն յանուն իր շահերի: Ոչ ոք ոչ մի մարդ չի ուղարկի տաճկական ճակատ՝ տուն գնացող ռուսներին փոխարինելու համար: Եթե ընդհանուր ուժերով ճակատ պահելու խօսք էլ է լինում, դա լոկ խօսք է՝ զուրկ իրական հիմքից ու անկեղծութիւնից: Հայերով ոչ ոք չի հետաքրքրում, շօշափելի օգնութիւն հասցնելու մտքով: Դրա հակառակը, կայ դաւադրական վերաբերմունք: Սենակ ենք եւ պետք է ապավինենք միայն մեր ուժերին՝ թէ՛ ճակատը պաշտպանելու եւ թէ երկրի ներսը կարգ հաստատելու համար»¹²¹:

Գիտակցելով տարածաշրջանում զարգացող ռազմաքաղաքական անցքերի հնարավոր վտանգավոր հետևանքները՝ Արամը հանուն հայ ժողովրդի փրկության գերագույն նպատակի ցուցաբերեց նախանձելի համառություն ու հետևողականություն հասարակական գիտակցությունը փոխելու, նրանում սեփական ուժերին ապավինելու գաղափարն ամրապնդելու և համագային շարժում կազմակերպելու համար:

Երևանի Հայոց Ազգային խորհուրդը, որում ներկայացուցիչներ կային ՀՀ դաշնակցությունից, Հայ ժողովրդական կուսակցությունից, էսեններից, Հայ զինվորական խորհրդից, անկուսակցականներից և բոլշևիկներից, Արամի առաջարկությամբ ստեղծեց իշխանության նոր,

¹²⁰ Աստուածատրեան Ա., Սարգսյանի պատմաչիւնութիւնը, էջ 41:

¹²¹ Աստուածատրեան Ա., Արամը, «Հայրենիք», 1964, ապրիլ, N 4, էջ 70:

ոյուրաշարժ մարմին՝ Հատուկ կոմիտե՝ նրան օժտելով իրեն համահավասար իրավասություններով: Հատուկ կոմիտեի նախագահ ընտրվեց ժողովրդի մեջ մեծ հարգանք վայելող Մ. Մուսիմյանը: Սակայն, ինչպես Հատուկ կոմիտեի, այնպես էլ Ազգային խորհրդի, ընդհանուր գործի, Երևանի նահանգի փաստացի ղեկավարն ու ոգին դարձավ Արամը:

Սահմանվեցին Հատուկ կոմիտեի առջև ծառացած կարևորագույն խնդիրները: Դրանք էին՝ հայկական գորքի կազմակերպում և օգնություն ռազմաճակատին. նահանգում ծավալվող մահմեդական խռովությունների սանձահարում, խաթարված օրինականության վերականգնում, պարենավորման և այլ կնճիռների լուծում:

Արամը սեղմ ժամկետում քաղաքում ստեղծեց աշխատանքով հագեցած մթնոլորտ: Աշխատանքի լծվեցին ամենքը՝ անկախ կուսակցական հանգամանքից և սոցիալական դիրքից: Արամի շունչն զգացվում էր ամենուր. նա «ամեն տեղ էր՝ իր խորհուրդներով, ցուցմունքներով, հրահանգներով ու հրամանով»¹²²:

Արամ Մանուկյանի առաջադրած՝ սեփական ուժերին ապավինելու քաղաքական գիծն ամրագրվեց կոնկրետ քայլերով: Առաջնահերթ լուծում պահանջող հայկական գորքի ստեղծումը թելադրում էր առաջին հերթին կատարել կազմակերպված գորահավաք: Արամի գլխավորությամբ ազգային մարմիններն ու գործիչները հայ ազգաբնակչության շրջանում ծավալեցին քարոզչական լայն աշխատանք՝ նրան սպառնացող վտանգի դեմ վճռական պայքարի կազմակերպման անհրաժեշտությունը բացատրելու, ոգևորելու և, բնականաբար, գործողության մղելու նպատակադրմամբ:

Արդեն 1917թ. դեկտեմբերի 21-ին հայկական առաջին գունդը ռազմաճակատ ճանապարհելու առիթով ելույթ ունենալով ներկաների առջև՝ Արամն արժանին մատուցեց ճակատ մեկնող զինվորներին և հանդիմանեց մնացողներին՝ նրանց զգացմունքներին դիպչելու մտադրությամբ: Նա նշում էր. «Ես սարսափով դիտում եմ, որ ռազմի դաշտ մեկնողներու շարքերը այսքան ցանցառ են և մօսր, իսկ այստեղ մնացողների թիւը այսքան շատ. ես իմ խօսքը ձեզ եմ ուղղում, ձեզ, քաղաքացիներ, որովհետև հայ մարտիկները քաջալերանքի պետք չունին-

¹²² Նույն տեղում, էջ 74:

ամօ՞թ ձեզ, ամօ՞թ մեզ, որ տակաւին անտարբեր մնում ենք. անէ՛ծք և նախատինք անոնց, որոնք պարտքի գիտակցութիւն չունին, երդուեցէք որ հայ մարտիկները ռազմաճակատի վրայ մենակ չեն մնալու. ուխտենք որ մեկնողների ետևից շարք-շարք, տասնեակ հազարաւորներով օգնութեան պիտի փութանք»¹²³. Նմանատիպ ելոյթներով Արամը ոգևորում և գործողության էր մղում ժողովրդական զանգվածներին:

1917թ. դեկտեմբերի 23-ին Հատուկ կոմիտեն հրապարակեց Արամի հեղինակած¹²⁴ «Կոչ հայ զինուորներին» շրջաբերականը՝ հայ ժողովրդին ահազանգելով իրեն սպառնացող մահացու վտանգի մասին: Այն շեշտում էր, որ ժողովրդի հավաքական կամքը և պատմական պահը յուրաքանչյուրից պահանջում է լքվել պարտականության գիտակցութեամբ և կանգնել իր դիրքում: Արտահայտելով իր վճռականությունը զինվորների հավաքագրման և Հայկական կորպուսի կազմավորման հարցում՝ Հատուկ կոմիտեն նախատեսում էր հավաքագրել Երևան քաղաքի ու նահանգի գավառների, ինչպես նաև Զանգեզուրի 20-32 տարեկան բոլոր հայ զինապարտներին, ներառյալ «զանազան արտօնութիւններով ու պատրւակներով տանը նստածները»: Հստակորեն սահմանվում էին այն վայրերը, ուր պետք է ներկայանային զորակոչվողները: Ծրագրվում էր հատուկ ուշադրություն դարձնել զինվորների ընտանիքների նյութական ապահովությանը¹²⁵: Այդ կերպ զորակոչվողները կազատվէին այն ծանր մտատանջությունից, որ աշխատուժից զրկվող իրենց ընտանիքները չեն մատնվի սովի և այլ զրկանքների: Այս միջոցառումներն, անշուշտ, նպաստելու էին հաջող զորահավաքի իրականացմանը և մարտունակ բանակի ստեղծմանը:

Հատուկ կոմիտեն հայտարարեց 20-32 տարեկանների զորակոչ: Զորակոչիկները պարտավոր էին անհապաղ՝ իրենց զինվորական հագուստով, սննդի երեք օրվա պաշարով ներկայանալ նշանակման վայրեր: Որպեսզի գործն ինքնահոսի չմատնվեր, գյուղերի կոմիսարների վրա պարտականություն դրվեց հրամանը ստանալուն պես հավաքել բոլոր զինակոչիկներին և միլիցիայի հետ անվտանգ տեղ հասցնել: Միաժա-

¹²³ «Աշխատանք», 1917, դեկտեմբերի 23, N 66:

¹²⁴ Վրացյան Ս., Հայաստանի Հանրապետություն, էջ 126:

¹²⁵ Հ ԱԱ, ֆ. 290, ց. 1, գ. 2, ք. 5:

մանակ, նրանցից ու միլիցիայի պետերից պահանջվում էր անմիջապես ձերբակալել դասալիքներին և ուղարկել սահմանված վայրեր¹²⁶:

Զբավարարվելով պարտադիր զորակոչի հրամանով՝ Հատուկ կոմիտեն ժողովրդի տարբեր խավերին՝ փորձված մարտիկներին, մտավորականությանը, ուսանողությանն ու աշակերտությանը ուղղված առանձին կոչով հորդորում էր կամավոր զինվորագրվել ազատության գործին¹²⁷: Ժողովուրդը հավատով արծագանքում էր իրեն ուղղված կոչերին: Հ. Մելիքյանի հաղորդմամբ՝ շրջաններից խմբերով Երևան էին գալիս զինվորներ «ազգային երգեր երգելով ու դրօշակներով՝ վրան մակագրուած «Մահ կամ Ազատութիւն»¹²⁸: Ժողովրդի ակտիվությունն ուրախացնում և, միաժամանակ, մտահոգություն էր պատճառում Արամին: Նա ժողովրդի արծագանքը համարում էր գիտակցության նշան և ավելացնում, որ այդ պայմաններում կարելի էր հրաշքներ գործել: Մյուս կողմից, նա մտահոգություն էր արտահայտում գործը պատշաճ ձևով կազմակերպելու վերաբերյալ: Նա նշում էր. «...վախենում եմ՝ մենք սեւերես դուրս գանք մեր ժողովրդի առջեւ, չկարողանանք կազմակերպել գործը եւ կորցնենք նրա հաւատն ու վստահութիւնը...»¹²⁹: Ժողովրդի արծագանքը զորակոչին և Արամի վերոհիշյալ վերաբերմունքը խոսում են այն մասին, որ մի կողմից՝ ժողովուրդն իր զգալի մասով գիտակցում էր պահի լրջությունը և պատրաստ էր զոհողության, իսկ մյուս կողմից՝ Արամը ձգտելու էր արդարացնել նրա ակնկալիքները:

Հայկական զորամասերի ձևավորման, առավել ևս դրանցից կազմակերպված, մարտունակ և հայրենասեր բանակ ստեղծելու համար անհրաժեշտ էր զորակոչել բոլորին, բացառել խուսափողների թիվը: Հակառակ դեպքում գործը կծախողվեր, այն պարզ պատճառով, որ յուրաքանչյուր զորակոչվող տեսնելով, որ իր դրացին այս կամ այն կերպ խուսափում է ծառայությունից, ինքը ևս կփորձեր խույս տալ դժվարություններից: Դեռևս 1917թ վերջին օրերին արծակված հրամանով

¹²⁶ Նույն տեղում, ֆ. 289, ց. 1, գ. 4, ք. 1; ֆ. 4047, ց. 1, գ. 110, ք. 1:

¹²⁷ Նույն տեղում, ֆ. 289, ց. 1, գ. 2, ք. 18:

¹²⁸ ԲԺ. Յովակիմ Մելիքեան, Արեան ճանապարհով, «Հայրենիք», 1924, դեկտեմբեր, N 2, էջ 94:

¹²⁹ Աստուածատրեան Ա., Արամը, «Հայրենիք», 1964, ապրիլ, N 4, էջ 72; «Արամը», էջ 92:

տանտերերին հանձնարարվել էր հետևել, որ 20-32 տարեկանները մինչև տարեվերջ գինվորագրվելու համար ներկայաման սահմանված վայրեր: Նրանք պարտավոր էին խուսափողների մասին անհապաղ տեղեկացնել Հատուկ կոմիտեին, այլապես խստորեն կպատժվեին¹³⁰: Առանձին հրամաններով զորամասերից ժամանակավորապես արձակված գինվորներին կարգադրվում էր 1918թ. հունվարի 10-ին ներկայանալ Երևանում տեղակայված պահեստի գումարտակ¹³¹:

Հատուկ կոմիտեն վճռականորեն պայքարում էր դասալիքների, զորակոչից խուսափողների, զենք-զինամթերք, պետական գույք հափշտակողների դեմ: 1918թ. փետրվարի վերջերին հրապարակված հրամանով նախատեսվում էր Զինվորական դատարանի առաջ կանգնեցնել բոլոր այդպիսի տարրերին¹³²: Դրանք զուտ խոսքեր չէին: 1918թ. մարտի 2-ին որպես հայրենիքի դավաճաններ Ալեքսանդրապոլում գնդակահարվեցին երեք գինվորներ՝ երկուսը դասալքության, մեկը՝ բանակից ծի գողանալու համար¹³³:

Դասալիքներին ու զորակոչից խուսափողներին հայտնաբերելու, ինչպես նաև մահմեդական խռովությունները ճնշելու նպատակով Արամը և Դրոն անհրաժեշտ գտան ստեղծել մի կարգապահ ու մարտունակ զորամաս¹³⁴: Կարճ ժամանակամիջոցում Դրոյի ղեկավարությամբ ստեղծվեց 1200 հետևակային և 200 հեծյալ ընդգրկող հատուկ զորամիավորում:

Նկատենք, որ 1918թ. սկզբին տիաճ միջադեպ էր եղել Արամի և Դրոյի միջև: Վերջինս հանդիմանել էր Արամին այն բանի համար, որ նա արդարացրել էր ավտոտնտեսության պատասխանատու հաշիկ Ստեփանյանի վարմունքը, որը կատարելով Հատուկ կոմիտեի հրահանգը, այն է՝ առանց իր արտոնության ոչ ոքի չտրամադրել մեքենա, հրաժարվել էր առանց նրա արտոնության մեքենա հատկացնել նաև Դրոյին¹³⁵: Թեև դրանից հետո Արամի և Դրոյի հարաբերությունները փոքր

¹³⁰ Հ ԱԱ, ֆ. 289, ց. 1, գ. 4, ք. 2; ֆ. 4047, ց. 1, գ. 110, ք. 2:

¹³¹ Նույն տեղում, ֆ. 289, ց. 1, գ. 4, ք. 3, 4; ֆ. 4047, ց. 1, գ. 110, ք. 3:

¹³² Նույն տեղում, ֆ. 4047, ց. 1, գ. 110, ք. 5:

¹³³ Նույն տեղում, ֆ. 121, ց. 2, գ. 177, ք. 1:

¹³⁴ Ter Minassian A., La République d'Arménie (1918-1920). La memoire du siecle, Bruxelles, 1989, p. 76:

¹³⁵ «Արամը», էջ 116-117:

ինչ սառել էին, այնուամենայնիվ նրանք շարունակում էին համագործակցել ի շահ հայրենիքի անվտանգության:

Հայկական զինուժի ձևավորման գործն արդյունավորելու նպատակով Հատուկ կոմիտեն, հավատարիմ իր խոստմանը, քայլեր ձեռնարկեց զորակոչվողների ընտանիքների կարիքները հոգալու ուղղությամբ: 1918թ. հունվարի 12-ին Հատուկ կոմիտեն որոշեց մինչև ազգային ու պետական միջոցների գոյացումը նշված գործը կազմակերպել գյուղական համայնքների հաշվին: Պարտավորություններից խուսափող գյուղերն ու անձինք ենթակա էին պատասխանատվության և վճարելու էին կրկնակի չափերով: Նույն խնդրին էր ուղղված նաև Ազգային խորհրդի 1918թ. փետրվարի 16-ի շրջաբերականը, որում զորակոչից խուսափելը որակվում էր դավաճանություն և ավելացվում, որ սպառնացող վտանգի պայմաններում «ամբողջ ազգը պետք է մտածէ իր պաշտպանութեան մասին. զինուորացուները-կռուի դաշտում, իսկ մնացածները-հոգալով զինուորների թողած ընտանիքի մասին»¹³⁶: Մեկ առ մեկ սահմանվում էին գյուղերի պարտականությունները համագյուղացի զինվորների ընտանիքների նկատմամբ՝ նրանց նյութական կացության վատթարացումը կանխելու համար:

Ֆինանսական միջոցների սղությունը իշխանություններին դրդեց ներմուծել ազգային տուրքի գաղափարը: Դա նշանակում էր, որ յուրաքանչյուր ընտանիք համաձայն իր կարողության կամ եկամտի չափի, պարտադիր կերպով տարեկան որոշակի տուրք պետք է մուծեր ազգային բյուջե: 1918թ. մարտի 7-ին Հատուկ կոմիտեն հայ ազգաբնակչությունից պահանջում էր անհապաղ վճարել տուրքը և նախազգուշացնում, որ թերացողները կենթարկվեն խիստ պատիժների¹³⁷: Ընդհանուր առմամբ, Երևանի Ազգային խորհրդին 1918թ. փետրվար-հուլիս ամիսներին ազգային տուրք էին մուծել Երևանի 1443 բնակիչներ¹³⁸:

Քայլեր էին ձեռնարկվում ձևավորվող զորամասերը սպառազինելու ուղղությամբ: Այդ նպատակով Երևանի Ազգային խորհրդի կողմից փոքրիկ զորամասեր ուղարկվեցին Զուլֆա, Շահթախթ, Նախիջևան,

¹³⁶ Հ ԱԱ, ֆ. 289, ց. 1, գ. 6, թ. 1:

¹³⁷ Նույն տեղում, գ. 4, թ. 9; ֆ. 4047, ց. 1, գ. 110, թ. 7:

¹³⁸ Նույն տեղում, ֆ. 289, ց. 1, գ. 1, թ. 1-74:

Շարափխանե, որոնք որոշ քանակությամբ ռազմամթերք տեղափոխեցին Երևան¹³⁹։ Օգտագործվում էին նաև նահանգի ռեսուրսները։ Արամի կարգադրությամբ ստեղծվել էր մի հանձնաժողով¹⁴⁰, որը պետք է հավաքեր նահանջող ռուսական զորքի կողմից ճակատից բերվող զենք-զինամթերքը, մեքենաները, ձիերը և դրանք հատկացներ հայկական զորամասերին։ Ձորքին ոչ պիտանի ձիերը նրա կարգադրությամբ բաժանվում էին ժողովրդին։

Արամի գլխավորությամբ, որին գործակցում էին 1918թ. հունվարին Երևանում հաստատված զեներալ Մովսես Սիլիկյանը, Հայկական կորպուսի կոմիսար Դրոն, գնդապետ Դանիել Բեկ Փիրումյանը և իրատես ու տաղանդավոր այլ զինվորականներ, կատարված աշխատանքների շնորհիվ ձևավորվում էր հայկական կանոնավոր զինուժը։ 1918թ. մարտի սկզբի դրությամբ Հայկական կորպուսի երկրորդ դիվիզիան, այլ կերպ՝ Երևանյան զորաջոկատը, որի հրամանատարն էր զեներալ Մ. Սիլիկյանը, հիմնականում կազմավորվել էր։

Հայկական զորամասերի ձևավորման, ռազմաճակատի ամրապնդման խնդիրն անխզելիորեն կապված էր Երևանի նահանգում իրադրության կայունացման հետ, ինչն առաջին հերթին թելադրում էր սանձահարել հսկայական չափեր ընդունած մահմեդականության հակահայկական խռովությունները, որոնք կազմակերպվում և ուղղորդվում էին թուրքական հրամանատարության կողմից։

Մահմեդական ավազակախմբերը հարձակվում էին հայկական բնակավայրերի, հաղորդակցության ճանապարհների վրա, ավերում երկաթգծերն ու երկաթուղային կայարանները, կամուրջները, խորտակում գնացքները, թալանում դրանք և մորթում դրանցում գտնվող հայերին։ Այդ շարժումները ոչ միայն խափանում էին զորամասերի փոխադրումը ռազմաճակատ, այլև պատճառ էին դառնում, որ ռազմունակ հայերն իրենց հարազատներին պաշտպանելու համար զանված մնան սեփական բնակավայրերում, կամ այդ նպատակով լքեն ռազմաճակատը։

¹³⁹ «Լրատու» Երևանի Հայոց Ազգային խորհրդի, Երևան, 1918, հուլիսի 23, N 6:

¹⁴⁰ Բժ. Յովակիմ Մելիքեան, նշվ. հոդվածը, «Հայրենիք», 1924, դեկտեմբեր, N 2, էջ 95:

Թաթարների ըմբոստությունների սպառնալից բնույթի վերաբերյալ Երևանից հաղորդում էին Թիֆլիս՝ Անդրկովկասյան Կոմիսարիատին, որը չէր կարողանում շտկել կացությունը: Այնինչ դրությունը թեժանում էր: 1918թ. փետրվարի 20-ին հայ-թաթարական ընդհարումներ տեղի ունեցան անգամ Երևան քաղաքում: Դրանք դադարեցին միայն Արամի, Դրոյի, Շահխաթունու միջամտության շնորհիվ¹⁴¹:

Կոմիսարիատի անկարողությունն ու չկամությունը նահանգի իշխանություններին՝ ի դեմս Արամի և Դրոյի, ի վերջո դրդեց սեփական ուժերով հանգուցալուծել խնդիրը: Վճռական գործողությունների անցնելուց առաջ հայկական կողմը փորձեց մահմեդական գործիչների հետ բանակցելով հասնել հարցի խաղաղ լուծմանը, սակայն ապարդյուն:

Փետրվարի 22-ին հայկական զորամասերը Դրոյի գլխավորությամբ գրավեցին ու հրկիզեցին Ուլուխանլուն, որը հարկադրված հնազանդություն հայտնեց: Այդ վճռական քայլով բացվեց Երկաթուղային կապը Երևան-Ղամաղլու(Արտաշատ)-Ալեքսանդրապոլ գծում: Սանձահարվեցին նաև Սուրմալուի, Իգդիրի, Կողբի, Ղամաղլուի, Նոր Բայազետի շրջանների թուրքերը: Համառ կռիվների արդյունքում հայկական ուժերը ջարդեցին Ղավալուն (Արարատ) շրջապատած 3000-ոց թաթարական խուժանին, որը շաբաթներ շարունակ փորձում էր տիրանալ նրան: Դա մեծ իրարանցում առաջացրեց Թիֆլիսում: Փետրվարի 25-ին Երևան ժամանեց Անդրկովկասի օրենսդիր մարմնի պատվիրակությունը, սակայն անօգուտ: Վերջինս չուներ ոչ ուժ և ոչ էլ ցանկություն իրավիճակը Երևանում կայունացնելու համար:

Թուրք-քրդական ավազակախմբերի դեմ պայքարի ընթացքում հայկական զորամասերը 1918թ. առաջին եռամսյակում հնազանդեցին 50-ից ավելի թաթարական գյուղեր¹⁴²: Այդ պայքարը շարունակվեց նաև հետագայում:

Արամի գործունեությունը չէր սահմանափակվում միայն թաթարական գյուղերի հնազանդեցմամբ: Նա որոշակիորեն վարում էր երկիրն այդ թշնամական տարրից մաքրագործելու քաղաքականություն: 1918թ. գարնանն Ալազյազի շրջանը թաթարներից ազատագրած խմբապետ Մուշեղը

¹⁴¹ Կրացյան Ս., Հայաստանի Հանրապետություն, էջ 141:

¹⁴² Հ ԱԱ, ֆ. 121, ց. 2, գ. 84, թ. 5:

Հանրապետության ստեղծումից հետո Ռուբենին հայտնել է, որ «պապենական այդ հողերը վերագրաւելու» գործում ունեցել են Արամի օժանդակութունը¹⁴³։ Այդ կերպ ոչ միայն ինչ-որ չափով լուծվում էր գաղթականության հարցը և հայացվում երկիրը, այլև ստրատեգիական կարևորության տարածքներն ազատվում էին թշնամական տարրերից։ Շնորհիվ Արամի և Դրոյի շրջահայաց գործելակերպի՝ հաջողվեց միառժամանակ սանձահարել թաթարների ու քրդերի հակահայկական ելույթները։

Օգտվելով երկրում ստեղծված ծանրագույն իրավիճակից՝ ակտիվացել էին նաև հայ անիշխանական տարրերը։ Սկզբնավորվել էր մի շարժում, որը հայտնի է մաուզերիզմ անունով։ Մաուզերիստների գործողությունների հետևանքով նահանգում ծաղկում էր թալանչիությունը, վտանգվում կյանքի և գույքի ապահովությունը, ընկնում էր տեղական իշխանության հեղինակությունը ժողովրդի շրջանում։ Երևանում հաստատվելու պահից Արամը պայքարում էր նմանօրինակ դրսևորումների դեմ։ ՀՀ դաշնակցության հայտնի խմբապետերից Դալի Ղազարի խմբի տղաների մի մասը «մաուզերիստներ» էին և վնասակար գործունեություն էին ծավալել երկրում։ Իր մոտ կանչելով Դալի Ղազարին՝ Արամը նրան կարգադրեց հավաքել իր խումբը և մեկնել ճակատ¹⁴⁴։ Նրա նախագուշացումից հետո, 1918թ. մարտի 2-ին Դալի Ղազարը հայտարարեց առաջավոր գիծ մեկնելու մասին¹⁴⁵։ Այդ հայտարարությունից հետո պարզվեց, որ խմբին պատկանելու ամվան տակ քրեական գործունեություն էին ծավալել նաև խմբի հետ կապ չունեցող անձինք։ Իր չարագործություններով բնակչության վրա ճնշող ազդեցություն էր ունենում հատկապես մաուզերիստների պարագլուխներից Չոլախ Գևորգը՝ Դալի Ղազարի նախկին մարտիկներից մեկը։ Բազմաթիվ նախազգուշացումներից հետո նա ոչ միայն չուղղվեց, այլ ընդհակառակը՝ ըմբոստացավ իշխանությունների դեմ։ Անհանդուրժելի գտնելով Չոլախ Գևորգի գործունեությունը՝ Արամը կարգադրեց գնդակահարել նրան¹⁴⁶։

¹⁴³ Ռուբեն, Հայ յեղափոխականի մը յիշատակները, հ. 7, Երևան, 1990, էջ 109։

¹⁴⁴ Բժ. Յովակիմ Սելիքեան, նշվ. հոդվածը, «Հայրենիք», 1925, փետրվար, N 4, էջ 85։

¹⁴⁵ Հ ԱԱ, ֆ. 121, ց. 2, գ. 178, ք. 1։

¹⁴⁶ Բժ. Յովակիմ Սելիքեան, նշվ. հոդվածը, «Հայրենիք», 1925, փետրվար, N 4, էջ 85; «Արամը», էջ 112-114։

Արամը, որպես հայրենասեր ու հեռատես քաղաքական գործիչ, դարավոր թշնամուց հայ ժողովրդի փրկության ճանապարհին երկրորդական համարելով գաղափարական-քաղաքական տարածայնությունները, ՅՅԴ մի շարք այլ գործիչների հետ համախորհուրդ, փորձեց դաշնակից ձեռք բերել՝ ի դեմս բոլշևիկյան Ռուսաստանի: Այդ նպատակով նա հարաբերությունների մեջ մտավ Երևանի բոլշևիկներ Պ. Մակինցյանի և Արշ. Մելիքյանի հետ: Նրա կողմից բոլշևիկների հետ բանակցելու նպատակով Մոսկվա ուղարկվեց Երևանի Հայոց Ազգային խորհրդի անդամ Պ. Սակինցյանը, որը խոստացել էր աշխատել հայոց օգտին: Թիֆլիսում գտնվող Ռուբենին ուղղված Արամի գրությունը թույլ է տալիս ընկալել այն կարևորությունը, որ տալիս էր վերջինս այդ գործուղմանը: Արամը Ռուբենին գրում էր. «Ապահով անցկացրեք: Անհրաժեշտ է: Պետք է մենք ամեն կերպ միանանք Ռոստոմին (Բագուին): Քու էշը քշիր: Մեր մեջքը թե ամուր չլինի, կը կրկնուի 1915 թիւը»¹⁴⁷: Ակնհայտ է, որ Արամի մտահոգությունն ազգային նոր աղետի կանխումն էր: Սակայն, մինչև Հայաստանի խորհրդայնացումը Պ. Մակինցյանից որևէ լուր չստացվեց Երևանում: Արամը հեռակա կարգով մասնակցեց Թիֆլիսում Ռուբենի և ՅՅԴ այլ գործիչների կողմից Անդրկովկասի բոլշևիկյան ղեկավարների հետ տարվող բանակցություններին: Այդ ընթացքում ՅՅԴ գործիչների և Կովկասում խորհրդային Ռուսաստանի ներկայացուցիչ Ստ. Շահումյանի ջանքերով ընդունվեց համագործակցության գաղտնի ծրագիր, որի առանցքը հայ-բոլշևիկյան ճակատի ձևավորումն էր թուրքերի դեմ՝ Կովկասի խորհրդայնացման պայմանով (Արևմտահայաստանը լինելու էր անկախ)¹⁴⁸: Հայ գործիչների ջանքերը հաջողություն չբերեցին: Ստ. Շահումյանը չկարողացավ կատարել իր խոստումը՝ ռուսական զորամասեր պահել ռազմաճակատում, իսկ Բրեստ-Լիտովսկի պայմանագիրն ու թուրքական սրընթաց առաջխաղացումը ջնջեցին հետագա գործակցության հնարավորությունները:

Մինչ Երևանում և այլուր հայկական շրջանակները ջանքեր էին քափում ազգային փրկության համար, տարածաշրջանում և միջազգային

¹⁴⁷ Ռուբեն, հ. 7, էջ 143:

¹⁴⁸ Նույն տեղում, էջ 142-143:

հարաբերություններում կատարվեցին անցքեր, որոնք էլ ավելի ծանրացրին հայ ժողովրդի կացությունը:

1918թ. հունվարի 30-ին (փետրվարին 12-ին) թուրքական 50000-ոց բանակը՝ խախտելով Երզնկայի զինադադարը, անցել էր հարձակման և, հաղթահարելով հայկական փոքրաթիվ ուժերի հերոսական դիմադրությունը, մինչև մարտ ամսվա վերջը գրավել Արևմտյան Հայաստանը՝ նոր ուժիկներ գործելով հեռանալ չհասցրած հայ բնակչության նկատմամբ: Այնուհետև, հետապնդելով նահանջող փոքրաքանակ հայկական զորամասերին՝ թշնամին շարժվեց դեպի Արևելյան Հայաստան:

Միջազգային հարաբերություններում ևս գործընթացները զարգանում էին ի վնաս հայ ժողովրդի շահերի: Երկարատև բանակցություններից հետո, 1918թ. փետրվարի 18-ին (մարտի 3-ին) Բրեստ-Լիտովսկի պայմանագրով Խորհրդային Ռուսաստանը Թուրքիային զիջեց Արևմտյան Հայաստանը, Կարսի և Բաթումի մարզերն ու Արդահանի օկրուգը¹⁴⁹: Ոչ մի լավ հեռանկար չէին խոստանում նաև Թուրքիայի և Անդրկովկասի ներկայացուցիչների միջև մարտի 1(14)-ին Տրապիզոնում սկսված բանակցությունները, որոնք ձգձգումներով շարունակվեցին շուրջ մեկ ամիս¹⁵⁰: Թուրքական կողմը կտրականապես մերժելով անդրկովկասյան պատվիրակների բոլոր առաջարկները՝ պահանջեց անվերապահորեն ընդունել Բրեստ-Լիտովսկի հաշտության պայմանները և հռչակել Անդրկովկասի անկախությունը: Հետևանքը եղավ այն, որ մարտի 31-ին Անդրկովկասյան Սեյմը որոշեց իր պատվիրակներին հետ կանչել Թիֆլիս և շարունակել պատերազմը Թուրքիայի դեմ: Սակայն, վրացիների ոգևորությունը շուտով չքացավ, և հայերը դարձյալ մնացին մենակ թուրքերի դիմաց:

ԱՐԱՍ ՄԱՆՈՒԿՅԱՆԻ ՀՈՇԱԿՈՒՄԸ ԴԻԿՏԱՏՈՐ

1918թ. մարտի 23-ին (ապրիլի 5-ին), տասնօրյա մարտերից հետո, հայկական զորքերը հեռացան նաև Սարիղամիշից: Սարիղամիշի անկման

¹⁴⁹ Ավետիսյան Հ., Հայկական հարցը 1918 թվականին, Երևան, 1997, էջ 101-102:

¹⁵⁰ Նույն տեղում, էջ 113-138:

լուրը ցնցեց հայ ժողովրդին, հատկապես Երևանի ազգաբնակչությանն ու զորամասերին: Երևանն անսախաղեպ իրարանցման մեջ էր: Հասարակության տարբեր խավերի մասնակցությամբ տեղի էին ունենում խորհրդակցություններ, ժողովներ, որոնց միակ նպատակն էր ելք գտնել ստեղծված կացությունից, որպիսին նկատվեց նահանգում արագ ու վճռական գործող ուժեղ իշխանության ստեղծումը՝ ի դեմս դիկտատորության: Դիկտատորի ընտրության համար առաջադրվեցին զենեքալ Մ. Սիլիկյանի, Դանիել Բեկ Փիրումյանի, Արամի և ուրիշների թեկնածությունները: Արամի թեկնածությունն առաջադրած Երևանի պարետ Շահխաթունին գտնում էր, որ նրա վրա պետք է դնել դիկտատորի ծանր պարտականությունը, քանի որ նա ընթացում էր երկրի կացությունը, ուներ «լայն ժողովրդականութիւն, ուժեղ կամք, վճռականութիւն»¹⁵¹: 1918թ. մարտի 24-ին Երևանի բնակչությունը, զորքը և Հայոց ազգային խորհուրդը Արամին ընտրեցին Երևանի նահանգի «դիկտատոր»՝ նրան օժտելով անսահմանափակ լիազորություններով: Պատմության մեջ, թերևս, եզակի դեպքերից էր, երբ ժողովուրդը կամովին ընտրեց դիկտատոր, որն իր անսահմանափակ իշխանությունը մինչև վերջ օգտագործեց բացառապես հօգուտ համազգային շահերի, երբեք չփորձեց իրեն վեր դասել ազգային ու զինվորական կառույցներից: Անշուշտ, իրավացի է Հայաստանի Հանրապետության ներկայիս վարչապետ Տիգրան Սարգսյանը. «...Սա այն բացառիկ դեպքերից է, երբ ասում ես դիկտատոր, եւ որեւէ բացասական էմոցիա մեջդ չի առաջանում»¹⁵²:

Դիկտատոր ընտրվելու կապակցությամբ ժողովրդի առջև ունեցած ելույթում Արամը պատրաստակամություն հայտնեց ուժերի ներածին չափով ծառայել հայրենիքին և շարունակել անգիջում պայքարը հայրենիքի հանդեպ իրենց պարտքը թերացողների դեմ: Անդրադառնալով Չոլախ Գևորգի գնդակահարությանը՝ նա անվարան հայտարարեց, որ այդպես է վարվելու բոլոր նրանց նկատմամբ, ովքեր կխանգարեն ընդհանուր գործին ու կխաթարեն հասարակական անդորրը»¹⁵³:

¹⁵¹ Բժ. Յովակիմ Մելիքեան, նշվ. հոդվածը, «Հայրենիք», 1925, փետրվար, N 4, էջ 87:

¹⁵² «Երկիր», Երևան, 2009, հունվարի 30, N 3, էջ 3:

¹⁵³ Բժ. Յովակիմ Մելիքեան, նշվ. հոդվածը, «Հայրենիք», 1925, փետրվար, N 4, էջ 87-88:

Արամը լավ էր հասկանում, որ միայնակ ոչնչի հասնել հնարավոր չէ, որ հայրենիքի փրկությունը կախված է ժողովրդի հավաքական կամքից ու կարևորում էր վերջինիս պատրաստակամությունը նվիրաբերվելու ընդհանուր գործին, ուստի ամընդհատ փորձում էր բարձրացնել նրա խանդավառությունը: Նա նշում էր. «...դուք պիտի իմանաք, որ ես անոյժ եմ առանց ձեզ: Հերոսը ինքը ժողովուրդն է և եթե ժողովուրդը պատրաստակամութիւն ունի... աշխատել ու փրկել հայութիւնը վերահաս կործանումից, ապա իմ ու ինձ նման շատերի աշխատանքը ապարդիւն չի անցնի»¹⁵⁴:

ՀԳՂ նշանավոր գործիչներից Ս. Օհանջանյանը, որն Արամին ճանաչում էր 1904թ., ըստ արժանվույն գնահատելով նրա դերը հայ ժողովրդի համար այդ ծանր ժամանակաշրջանում, նշել է. «...Արամն է, որ լուսաւորում է բոլորիս ճամբան, եւ քանի նա կայ, կասկած չունեմ, որ յաջողելու ենք եւ լոյս աշխարհ ենք դուրս գալու այս...խոր վիրապից»¹⁵⁵: Այս խոսքերը, ինչպես նաև ժողովրդական խանդավառության պայմաններում Արամի դիկտատոր ընտրվելու փաստը նրա անծի նկատմամբ տածվող անսահման հավատի վկայություններն են:

Իրագեկը (Հակոբ Տեր-Հակոբյան), որը 1918թ. Ալեքսանդրապոլի Հայոց Ազգային խորհրդի նախագահն էր, նշելով, որ Երևանի Ազգային խորհուրդն Արամին օժտեց դիկտատորական իրավունքներով «երկիրը կառաւարելու և զխաւորապէս պատերազմը տաճիկների դէմ կազմակերպելու և վարելու գործում», նկատել է, որ «շնորհիւ իր բարձր հեղինակութեան՝ Արամի առաջնորդութեամբ հայ ժողովուրդը, մի մարդու նման ուռքի ելաւ ու ծառացաւ հզօր թշնամու դէմ իր ինքնապաշտպանութեան անհաւասար կռիւը հերոսաբար կերտելու համար»¹⁵⁶:

Դիկտատորի պաշտոնը ստանձնելուց քիչ անց, 1918թ. մարտի 28-ին Արամը ժողովրդին դիմեց մի կոչով, որը միաժամանակ գործունեության համապարփակ ծրագիր էր՝ միտված ռազմաճակատի ամրապնդմանը, նահանգում ամուր իշխանության և կարգ ու կանոնի հաստատմանը: Գո-

¹⁵⁴ «Զանգ», 1918, մարտի 27, N 24:

¹⁵⁵ Աստուածատրեան Ա., Արամը, «Հայրենիք», 1964, հուլիս, N 7, էջ 75:

¹⁵⁶ Իրագեկ Յ., Մօտիկ անցեալից (Պատմական դէպքեր եւ ապրումներ. 1917-1922), Պէյրութ, 1956, էջ 27:

տեսչանդված իր հանդեպ ցուցաբերված բացառիկ վստահությունից, մեկ անգամ ևս հայտարարելով, որ քաղաքացիական ու զինվորական մարմինները պահպանելու են իրենց դերը, իսկ իր անելիքը լինելու է դրանց համակարգումն ու աշխատանքների արագացումը, Արամը հստակորեն սահմանեց նրանց անելիքները: Համոզված լինելով, որ հայ ժողովրդի փրկությունը մեծապես պայմանավորված է նրա հավաքական կամքով, Արամը հերթական անգամ փորձում էր ազդել հասարակության յուրաքանչյուր անդամի, առաջին հերթին՝ զինվորականության գիտակցության և ինքնասիրության վրա: Նա շեշտում էր. «Հայրենակիցներ! Հասարակական շարժման յաջողութունը գերազանցապես կախած է զոհաբերությունից և կարգապահությունից: Ձոռեցեք ձեր անհատականը, ձեր ոյժերի և ստացածքի մաքսիմումը, քանի դեռ հնարաւորութիւն կայ փրկելու ընդհանուրը. այլապես դուք և ձեր կարողութիւնը, ձեր կայքերն ու դրամը, ձեր կանայքն ու երեխաները կըտրորւեն ներս խուժող թշնամու ձիերի սմբակների տակ... Հայ զինուորներ, նամանաւանդ հայ սպաներ, վերջին խօսքս ձեզ եմ ուղղում. տոգորւեցեք վայրկեանի գերագոյն ոգով: Հայրենիքի փրկութիւնը ձեր ձեռքին է: Դուք, սպաներ ու զինուորներ, կամ պետք է մեր սիրուն հայրենիքի փրկիչները լինեք, կամ նրա գերեզմանափորները: Գործի դիմենք, վերջ տանք սին խօսքին ու ժողովներին: Թշնամին՝ հրէշային ախորժակներով, առաջանում է. հուժկու գրոհով պետք է քշենք նրան հայրենի սահմաններից»: Արամը կոչն ավարտում էր բավական ազդու տոնով. «Տոյց տանք աշխարհին, որ Հայը ազատ անկախ ապրելու իրաւունք ունի: Այժմ կամ երբեք»¹⁵⁷: Նկատելի է, որ Արամը ոչ միայն պարզորոշ ըմբռնում էր վտանգի ահռելիությունը, այլև առաջադրում դրա հաղթահարմանն ուղղված որոշակի և իրատեսական ծրագիր:

Գործակցելով զորահրամանատարության, պետական, հասարակական-քաղաքական կառույցների հետ՝ Արամը հաջողությամբ շարունակեց նահանգի ռազմաքաղաքական իրավիճակի կայունացման գործը:

Դեռևս 1918թ. մարտի 21-ին ստորագրած հրամանով Արամը թաղային մարմիններին հրահանգեց ցուցակագրել 18-ից բարձր բոլոր

¹⁵⁷ Հ ԱԱ, ֆ. 289, ց. 1, գ. 9, թ. 1; Սարգսյան Կ., Պատմություն և իրականություն, Երևան, 1991, էջ 15-16:

տղամարդկանց, իրենց տներում գիշերող զինվորներին և մինչև մարտի 27-ը ցուցակները ներկայացնել իրեն¹⁵⁸։ Երևանի Հայոց Ազգային խորհրդի կողմից ստեղծվեցին արտակարգ հանձնաժողովներ՝ զորահավաքի գործն արագացնելու նպատակով։ 1918թ. մարտի 31-ի հրամանով Ազգային խորհուրդը Նոր Բայազետի շրջանի հայ գյուղացիությանը տեղեկացնում էր իրենց շրջան 12 հոգանոց պատվիրակություն ուղարկելու մասին, որի խնդիրն էր լինելու տեղական Ազգային խորհրդի և իր լիազորների հետ կատարել 19-32 տարեկանների զորահավաք։ Սահմանվում էր, որ զորահավաք կատարող մարմնին անսացողները «ԱՄԽՆԱՅ ԿՈՄԲԱԿՈՐԻԵՆ ՈՒ ԿՊԵՏԱԿԱՅԱՐԻԵՆ»¹⁵⁹։

Զեռնարկված արտակարգ և հետևողական միջոցառումների շնորհիվ ստեղծվեցին 10-12 հազարանոց զինուժ, որին հիմնականում հաջողվեց ճնշել թուրքական հակապետական շարժումները նահանգի զգալի մասում, բացել ռազմաճակատի և հայկական բնակավայրերի հետ կապող հիմնական մայրուղիները։ Հաջողվեց մեղմել պարենային խնդիրը, զսպել դասալքությունն ու ավազակաբարո մյուս տարրերին։

Այս ժամանակաշրջանում շարունակում էր բարդանալ իրավիճակը Կովկասի քաղաքական կենտրոնում և ռազմաճակատում։ Ապրիլի 1-ին Բաթումի անկումից հետո վրացիները թաթարների հետ վճռեցին վերջ տալ պատերազմին, ընդունել Բրեստ-Լիտովսկի պայմանագիրը և Անդրկովկասը անկախ հայտարարելու թուրքիայի պահանջը։ 1918թ. ապրիլի 9(22)-ին Անդրկովկասյան Սեյմը հռչակեց Անդրկովկասի անկախությունը։

Իրադարձությունների այդօրինակ զարգացումից ակնկալիքներ ունեցող վրացական շրջանակները փորձեցին իրենց շահերը պաշտպանել հայության դեմ ուղղված խարդավանքների միջոցով։ Ապրիլի 11(24)-ին Անդրկովկասի նորընտիր վարչապետ Զխենկելին և զինվորական նախարարի պաշտոնակատար Օղիշելիժեն, առանց տեղեկացնելու Թիֆլիսի հայ ղեկավար շրջաններին, Հայկական կորպուսի հրամանատար գեմ. թ. Նազարբեկյանից պահանջեցին Կարսը հանձնել թուրքերին ու զորքերը հետ քաշել Բրեստ-Լիտովսկի պայմանագրով սահ-

¹⁵⁸ Հ ԱԱ, ֆ. 121, ց. 2, գ. 180, թ. 1; «Զանգ», 1918, մարտի 27, N 24:

¹⁵⁹ Հ ԱԱ, ֆ. 289, ց. 1, գ. 8, p. 2:

մանված նոր սահմանագիծ: Վրաց գործիչների խարդավանքների հետևանքով ապրիլի 12(25)-ին Կարսը հանձնվեց թուրքերին: Այդ կերպ վրացիները, Յ. Սիմոնյանի իրավացի բնորոշմամբ, փորձեցին «իրենց երկիրը փրկել Հայաստանի՝ թեկուզ կործանման հաշվին»¹⁶⁰:

Արամի գործունեությունը լիովին ընկալելու և ճիշտ գնահատելու համար թեթևակի անդրադառնանք Կարսի անկման պատճառներին: Մեր կարծիքով Կարսի անփառունակ անկման մեջ իրենց մեղքի որոշակի բաժինն ունեին նաև Թիֆլիսի հայ քաղաքական ղեկավար շրջանակները: Եթե նրանք ցուցաբերեին նախաձեռնողականություն և աշխատեին ընթացք տալ ռազմաքաղաքական անցքերին, այլ ոչ թե հետևեին դրանց զարգացմանը, ապա նման տխուր փաստի առաջ, ամենայն հավանականությամբ, չէին կանգնի: Նրանք պարտավոր էին վաղօրոք, մինչև ապրիլի 10-12-ը, երբ գործվեց դավը, որի ընթացքում կտրված էր հեռագրական կապը Թիֆլիսի և Կարսի հայ հրամանատարության միջև, որոշել իրենց վերաբերմունքը դեպի Կարսի հետագա ճակատագիրը: Ասվածի համար հիմք է ծառայում այն հանգամանքը, որ հայ գործիչները տեղյակ էին Տրապիզոնի բանակցությունների ընթացքին, որում առաջարկվել էր Կարսը զիջել թուրքերին: Ավելին, Հայկական կորպուսի հրամանատար գոր. Նազարբեկյանը Հայոց Կ. Ազգային խորհրդի նախագահին հղած մարտի 30-ի հեռագրում, որը տպագրվել էր նաև «Հորիզոն»ում, հերքել էր Ա. Չխենկելու հայտարարությունն այն մասին, թե Արդահանը վերցված է, իսկ Կարսի բախտը կվճռվի մոտակա օրերում: Բողոքելով Չխենկելու անհիմն հայտարարության դեմ՝ հայ զորավարը վստահությամբ հայտնել էր, որ «Կարսի բաղդը ոչ միայն չի վճռվի այս օրերում, այլև թուրքերին հեշտ չի լինի վերցնել այդ ամրութիւնը, որի պաշտպանութեան համար բերդապետը ծեռք է առել բոլոր անհրաժեշտ միջոցները...»¹⁶¹:

Այս հանգամանքը լրացուցիչ անգամ փաստում է, թե որքան վճռորոշ էր Արամի նման հեռատես, նախաձեռնող ու կազմակերպչական ջիղ ունեցող գործի ներկայությունը Երևանի նահանգում:

¹⁶⁰ Սիմոնյան Յ., Անդրանիկի ժամանակը, գ. Բ, Երևան, 1996, էջ 110:

¹⁶¹ «Հորիզոն», 1918, ապրիլի 14(1), N 69:

ՍԱՐԴԱՐԱՊԱՏԻ ՀԵՐՈՍԱՍԱՐՏԻ ԿԱԶՄԱԿԵՐՊՈՒՄԸ

Շարունակելով հարձակումը՝ թուրքական զորքերը դիրքավորվեցին Արփաչայի աջ ափին՝ ավարտելով Բրեստ-Լիտովսկի պայմանագրով իրենց տրված տարածքների զավթումը: Սակայն թշնամին այդքանով չբավարարվեց: 1918թ. մայիսի 11-ին, Բաթումում սկսված հաշտության բանակցություններում թուրքական պատվիրակության նախագահ Խալիլ բեյը Անդրկովկասի պատվիրակներին ներկայացրեց պայմանագրի նոր նախագիծ, որով պահանջվում էր իրենց հանձնել Երևանի նահանգի զգալի մասը, Ախալքալաքի, Ախալցխայի գավառները և հայերի համար կենսական նշանակություն ունեցող Ալեքսանդրապոլ-Կարս, Ալեքսանդրապոլ-Ջուլֆա երկաթուղագծերը:

1918թ. մայիսի 15-ին թուրքական բանակը գրավեց Ալեքսանդրապոլը և երկու ուղղություններով՝ Համամլու-Բաշ-Ապարան և Ալեքսանդրապոլ-Երևան երկաթգծի ուղղությամբ, շարժվեց դեպի Երևան¹⁶²: Մայիսի 20-ին թշնամին գրավեց Երևանից 40 կմ հեռու գտնվող Արաքս կայարանը, իսկ հաջորդ օրը՝ Երևանից 30 կմ հեռու գտնվող Սարդարապատ կայարանն ու գյուղը: Թուրքական ներխուժման վտանգն անմիջականորեն կախվեց էջմիածնի և Երևանի վրա: Ամբողջ սրությամբ դրվեց հայության լինել-չլինելու խնդիրը: Այդ իրողությունը մատնանշել են անգամ Թուրքիայի դաշնակցի՝ Գերմանիայի՝ իրադարձությունների ժամանակակից գործիչները: Մասնավորապես, իր կառավարությանն ուղղած 1918թ. մայիսի 23-ի հեռագրում Բաթումում գերմանական պատվիրակության ղեկավար Ֆոն Լոսովը նկատել է. «Թուրքական քաղաքականության նպատակն է, ինչպես ես միշտ կրկնում եմ, մշտապես գրավել հայկական շրջանները և բնաջնջել հայերին: Թալեաթի և Էնվերի դրան հակառակ խոսքերն անարժեք են»¹⁶³:

¹⁶² Հարությունյան Ա., Թուրքական ինտերվենցիան Անդրկովկաս 1918թ. և ինքնապաշտպանական կռիվները, Երևան, 1984, էջ 174-175; Աֆանասյան Ս., Սարդարապատի հաղթանակը (Հայաստան. Մայիս 1918), Երևան, 1991, էջ 33-34:

¹⁶³ Ավետիսյան Հ., Հայոց ազգային միասնության հաղթանակը. 1918 թվականի մայիս, Երևան, 1998, էջ 80:

Թշնամու առաջխաղացումը տեղիք տվեց մեծ իրարանցման և ուղեկցվեց բազմահազար հայ ազգաբնակչության նոր գաղթով դեպի Երևան: Հոսքն այնքան մեծ էր, որ ծանրաբեռնվել էին Երևան տանող բոլոր ճանապարհները: Էջմիածնի մոտ ծովածավալ բազմության կուտակման հետևանքով փակվել էին ելքի և մուտքի ճանապարհները: Երևանի նահանգում առկա էր պարենի, դեղորայքի, վառելիքի, մարդկային տարրական գոյության համար ամեն ինչի սուր պակաս: Երկիրը շրջապատված էր թշնամական օղակով. մի կողմից թուրքական բանակն էր, մյուս կողմից՝ ցանկացած պահի նրան աջակցելու պատրաստ թաթարները: Դեպքերի ժամանակակից Ա. Աստվածատրյանն այսպես է նկարագրել այդ օրերի դժխեն իրավիճակը. «Ըստ ամենայնի՝ բնական պետք է համարուէր, եթէ Երեւանի, Արարատեան դաշտի հայութիւնը պարտուէր Սարդարապատի տակ...բոլոր պայմանները դասաւորուել էին յօգուտ տաճիկների եւ ի վնաս հայերի: Անգամ այսօր, տասնեակ տարիներ յետոյ, մարդ առանց ներքին դողի անկարող է յիշել նոյն օրերի յուսահատական պայմանները: Աշխարհից կտրուած, շրջապատուած ամտուն ու անտեղ հարազատներով ու գաղթականներով, պարենավորման անմխիթար կացութիւն, հաղորդակցութեան ողբալի միջոցներ. ոչ մի տեղից ոչ մի մխիթարական, յուսատու ծայն...»¹⁶⁴:

Զկար ամենից կարևորը՝ հավատը սեփական ուժերի և հաջողության նկատմամբ: Շարունակական պարտություններն ու հայրենիքի մեծագույն մասի կորուստը բարոյալքել էր հայկական զորքին: Անգամ գեն. Մ. Սիլիկյանը մի պահ ընկճվել էր. նրա հաղորդագրությունները կրում էին հուսահատական բնույթ: Հայկական կորպուսի շտաբի մայիսի 20-ի գրառումներում կարդում ենք. «Գեն. Սիլիկյանը հաղորդում է Երևանյան ջոկատի ողբերգական վիճակի մասին. զորքերի հետագա կառավարելը դառնում է անհնարին»¹⁶⁵: Գեն. Նազարբեկյանն Ազգային խորհրդին հաղորդում էր անհապաղ վերջնական հաշտություն կնքելու անհրաժեշտության մասին: Ս. Վրացյանն այդ օրերի մասին գրել է. «Դիմադրությունը շատերին թվում էր անհնար և անիմաստ: Հաղթության

¹⁶⁴ Աստուածատրեան Ա., Արամը, «Հայրենիք», 1964, հուլիս, N 7, էջ 77; «Արամը», էջ 129:

¹⁶⁵ Հ ԱԱ, ֆ. 121, ց. 2, գ. 98, ք. 18:

վստահություն չէին ներշնչում և մինչև այդ բանակից հասնող տեղեկությունները. զոր. Սիլիկյանի հաղորդագրությունները մռայլ գույներով էին ներկայացնում զորամասերի դիմադրական կարողությունը: Բնակչությունը պատրաստվում էր փախուստի»¹⁶⁶:

Հայոց մեջ իշխող պարտվողական տրամադրությունները, որոնք հանգում էին նույնիսկ Երևանից նահանջելու անհեթեթ մտքին, անխուսափելիորեն նրան տանելու էին դեպի կործանում, եթե չձեռնարկվեին արմատական հակամիջոցներ:

Այդ բախտորոշ օրերին Արամը դրսևորեց թշնամուն հակահարված հասցնելու աներեր կամք և մեծագույն եռանդ: Ս. Աֆանասյանի դիպուկ ծանակերպմամբ՝ «Արամը, ինչպես Վարդանը Ավարայրում, ի հայտ բերեց այդ հիշարժան հերոսապատմանը վայել քաջություն»¹⁶⁷:

Դեռևս Ալեքսանդրապոլի անկումից առաջ Արամը, կանխատեսելով, որ թուրքերը չեն բավարարվելու ձեռք բերածով, նախանշել էր իրենց բռնելիք դիրքը: 1918թ. մայիսի կեսերին Երևանում գումարված արտակարգ ժողովում նա նշել էր. «Ես չեմ հաւատար, որ թիւրք բանակը կանգուն պիտի մնայ Ախուրեանի ափին» և իրեն բնորոշ հաստատականությամբ ավելացրեց, որ «եթէ երբէք մեր ճակատի վրա թիւրքերը սկսեցին յառաջխաղացումը, մենք անպայման պէտք է դիմադրենք զէնքով, քնդանօթով, ոչ թէ ստրկօրէն անձնատուր ըլլամք և կոտորուինք»¹⁶⁸:

1918թ. մայիսի 19-ի առավոտյան, երբ թշնամին նոր էր ներխուժել Արարատյան դաշտավայր, Արամ Մանուկյանը զորավար Սիլիկյանի հետ ունեցած հեռախոսագրույցում, անկարելի համարելով զորքերի հետագա նահանջը և Երևանն էլ ավելի մեծ վտանգի ենթարկելը, վերջինիս հանձնարարեց վերջ տալ հետագա նահանջին, պահպանել դիրքերը և Արարատյան դաշտավայրում թշնամուն հակահարված հասցնելու վերաբերյալ նախօրոք դրված խնդիրն իրագործելու համար վստահեցրեց, որ երկու օրվա ընթացքում զորավարին կտրամադրվի այդ

¹⁶⁶ Վրացյան Ս., Հայաստանի Հանրապետություն, էջ 145:

¹⁶⁷ Աֆանասյան Ս., Սարդարապատի հաղթանակը (Հայաստան. Մայիս 1918). Երևան, 1991, էջ 41:

¹⁶⁸ Կոստյեան Հ., նշվ. հոդվածը, «Դրօշակ», 1928, մայիս, N 5, էջ 137:

բանի համար անհրաժեշտ ամեն ինչ՝ մարդկային ուժ, զենք-զինամթերք և թիկունքի ոգևորությունը¹⁶⁹:

Թշնամուն վճռական հակահարված հասցնելու վերաբերյալ որոշումն ընդունվել էր այդ օրերին գորահրամանատարության մասնակցությամբ Երևանում կայացած գաղտնի խորհրդակցության ժամանակ, այն բանից հետո, երբ Արամը վճռականորեն հայտնել էր բանակի կարիքները կատարելապես բավարարելու պատրաստակամության մասին¹⁷⁰:

Մ. Սիլիկյանի հետ խոսակցությունից ամփոփապես հետո Արամը հրավիրեց բոլոր կուսակցությունների ներկայացուցիչների ժողով՝ նրանց պարզելով իրողությունը: Սինչ ժողովականները կորոշեին հարցի քննարկումը թողնել երեկոյան գումարվելիք նոր ժողովին, Արամը գիտակից պահի ճակատագրականությանը, լծվեց անդուլ աշխատանքի: Հայ ժողովրդի համար ծայրահեղ բարդ իրավիճակում նա ի հայտ բերեց իր ողջ ներուժը՝ անկոտրուկ կամքը, հեղինակությունը, կազմակերպչական տաղանդն ու եռանդը՝ արդարացնելու համար մի կողմից՝ իր վրա դրված հույսերը, մյուս կողմից՝ ամփսներ առաջ որդեգրված ուղու ճշմարտացիությունը: Անելիքը շատ էր, ժամանակը՝ սուղ: Նա իր գործակիցներին հրահանգեց անհապաղ՝ մինչև երեկո, առանց տարիքի ու դիրքի խտրության ռազմաճակատ ուղարկել բոլոր զինապարտներին: Խստագույնս արգելվեց քաղաքից հեռանալը: Կանայք պետք է տներից փամփուշտ հավաքեին և ջուր հասցնեին ճակատում գտնվող զինվորներին: Արամը, որը սիրում էր ամեն ինչին անծամբ հետևել, կրկնապատկել էր եռանդը. նա «իբրեւ շարժական ոգի, ամեն տեղ էր՝ հրապարակներում, շուկայում, տներում, եկեղեցիներում եւ կոթեւորեր իր խօսքերով ու կը ներշնչէր ամենքին»¹⁷¹: Նա կարևորում էր ամենքին՝ հոգևորականությանը, բանվորությանը, պատանիներին ու կանանց, և ամենքին էլ գործի լծում:

¹⁶⁹ Շահխաթունի Ա., Արամը. յիշողութիւններ, «Ճակատամարտ», Կ. Պոլիս, 1921, հունվարի 30, N 670 . 249:

¹⁷⁰ Շահխաթունի Ա., Հանդիպում սպարապետ Նազարբեկեանի հետ(Իմ յուշերից), «Հայրենիք», 1959, հունիս, N 6, էջ 98:

¹⁷¹ «Ճակատամարտ», 1921, հունվարի 30, N 670 . 249; Վավերագրեր հայ եկեղեցու պատմության, գիրք Ե, էջ 63:

Մայիսի 19-ի երեկոյան գումարված Ազգային խորհրդի նիստում հարց բարձրացվեց Երևանը թշնամուն հանձնելու, Նոր Բայազետի լեռները նահանջելու և այնտեղից դիմադրական մարտեր մղելու մասին: Հերթական անգամ Արամն ամենայն վճռականությամբ բացառեց անձնատվությունը՝ մշելով. «... ոչ մի նահանջ ոչ մի գծի վրա: Նահանջ Երևանից՝ կնշանակե խաչ քաշել մեր ամբողջ գործունեության եւ մեր ապագա քաղաքական մուրազներուն վրա, բոլորդ պիտի մնաք եւ մեռնիք»¹⁷²: Այդ առիթով Ա. Ահարոնյանը գրել է, թե Արամն ուժգնորեն հարվածեց սեղանին և մշեց. «Երեւանը չենք դատարկի, եւ պէտք է կռուենք, դիմադրենք թշնամուն մինչեւ վերջին մեր կաթիլ արիւնը, մինչեւ վերջին զնդակը»¹⁷³: Արամի վճռական կեցվածքն Ազգային խորհրդի անբեկանելի վճիռն էր: Ազգային խորհրդի որոշումը՝ թշնամուն Սարդարապատում և Բաշ-Ապարանում ճակատամարտ տալու մասին, հանձնվեց զորահրամանատարությանն ի կատար ածելու:

Վերջ տրվեց նաև ազգաբնակչության շրջանում տիրող խուճապին: Այդ առումով հիշատակելի է հատկապես մայիսի 21-ը: Այդ օրը երեկոյան Երևանի քաղաքային ժողովարանի ամառային շենքի հրապարակում (Սկետինգրինգում) կայացած հանրահավաքում, որում սկզբնապես տիրում էր հուսահատության և անորոշության մթնոլորտ, Արամը հանդես եկավ հակիրճ, բայց զանգվածի զգայուն թելերին դիպչող ելույթով: Նա մշեց. «Կրկնութիւններ անելու այժմ տրամադիր չեմ և ժամանակ էլ չկայ ճառերով զբաղելու: Ես եկել եմ յայտնելու ձեզ, որ թշնամին գրաւել է Սարդարաքաղը և շարժում է դէպի Էջմիածին: Մեզ մնում է մի բան, կամ զենք վերցնել ու դուրս գալ թշնամու առաջ և կամ կոտորել ոչխարի պես... Ով ուզում է ապրել, առանց ըռպէ կորցնելու, թող վերցնի զենքը, վերցնի նաև երեք օրւայ պաշար ու իսկոյն և եթ դիմէ ուսուցչական սեմինարիայի շէնքը՝ ցուցակագրւելու և այնտեղից էլ ճակատ ուղարկւելու համար: Ես իմ ասելիքս վերջացրի, այժմ ձեզ է մնում անելիքը»¹⁷⁴: Ժողովուրդը համակվեց ոգևորությամբ և մարտական տրամադրությամբ: Սարդարապատի հերոսամարտի մասնակից Մ. Մանասիր-

¹⁷² «Ճակատամարտ», 1921, հունվարի 30, N 670 . 249:

¹⁷³ Սահարոնյան Ա., Ավարայրի ոգեկոչումը, Անդրանիկ, Երևան, 1991, էջ 9:

¹⁷⁴ «Հորիզոն», 1918, սեպտեմբերի 6, N 178:

յանն այդ հավաքի կապակցությամբ 1968թ. վերհիշել է, որ Արամը, գրող Ղ. Դեմիրճյանը և այլոք ոգեշնչում էին ժողովրդին և կոչ անում անկախ տարիքային ու սոցիալական խտրության, քաղաքական համոզմունքների զեմք ստանալ ու մեկնել ճակատ, իսկ վերջինս՝ արծագանքելով իրեն ուղղված հորդորներին, բացականչում էր, թե ավելի լավ է ճակատում զոհվել, քան սեփական օջախներում մորթոտվել¹⁷⁵:

Հայրենիքի համար այդ ծանր պահին անգամ կային ուժեր, որոնք ըմբոստանում էին իշխանությունների դեմ: Սարդարապատի մոտ հայկական զորքի թեթևակի նահանջից հետո՝ մայիսի 21-ին, Երևանում ծագել էր խռովություն, որի մասնակիցների անթաքույց ձգտումն էր հաշվեհարդարի ենթարկել Արամին և հանձնվել թշնամուն¹⁷⁶: Ծայրաստիճան վտանգավոր դրությունը հարթվեց Արամի վճռականության շնորհիվ: Ազգային խորհրդում նա նշեց. «Այս միջոցին, երբ Սարդարաբադի մէջ հայոց համար կեանքի եւ մահուան հարց է դրուած, ուր հայ արիւնը հոսում է, անթոյլատրելի է, որ մի դասալիք խայտառակութիւններ անի: Ես սպառնալիքից չեմ վախենում: Բայց երբ հայ ժողովրդի ճակատագրի մասին է հարցը, ես պահանջում եմ ամենախիստ պատիժը»¹⁷⁷: Նրա հրամանով խռովարարների պարագլուխները զնդակահարվեցին, որից հետո ամբոխը հնազանդվեց իշխանություններին, իսկ դասալիքներն ուղարկվեցին ռազմաճակատ:

Այդ օրերին Երևանում տիրում էր նախադեպը չունեցող աշխատանքային մթնոլորտ: Աշխատանքի էին լծվել ամենքը. «Խրամատներ կը փորէին և շրջանային դատարանի նախագահը, և՛ դպրոցական երեխան, և՛ երիտասարդ գեղեցկուհի Երեւանցին, և՛ 60 տարեկան Վանուհին...»¹⁷⁸: Ոչինչ չէր խնայվում ռազմաճակատում գտնվող բանակի համար: Բոլորը դարձել էին մի սիրտ, մի հոգի: Ժամանակակիցների վկայությամբ Արամը ոգի էր ու եռանդ: Ա. Աստվածատրյանը նկատում է, որ Արամը «շարունակ

¹⁷⁵ ՀՀ ՊՊԹ, Նոր պատմության բաժնի վավերագրերի ֆոնդ, Մանասիրյան Ս., Հիշողություններ Սարդարապատի հերոսամարտից, ք. մ. 960, մ. մ. 12441, ք. 6:

¹⁷⁶ Շահխաթունի Ա., Սարդարապատի հերոսամարտը եւ մահափորձը Արամ փաշայի դէմ (Իմ յուշերից), «Հայրենիք», 1959, օգոստոս, N 8, էջ 27-30:

¹⁷⁷ Շահխաթունի Ա., ...մահափորձը Արամ փաշայի դէմ, «Հայրենիք», 1959, օգոստոս, N 8, էջ 28; «Արամը», էջ 519:

¹⁷⁸ Վավերագրեր հայ եկեղեցու պատմության. գիրք Ե, էջ 63:

ոտքի վրայ էր: Հանգիստն ինչ է՝ մոռացել էր: Ռազմաճակատը նրա մտահոգության միակ առարկան էր... Անընդհատ յարաբերութեան մէջ էր գլխաւոր շտաբի հետ, որ նստած էր Վաղարշապատում: Արամը իր շնչով վարակում էր ամենքին: Ո՛չ ոք չէր խնայում հնարաւորը»¹⁷⁹:

Մեկ այլ ժամանակակցի բնորոշմամբ՝ Արամը «կը մղէր, ընթացք կուտար, թէ քաղաքի ներքին ինքնապաշտպանութեան, թէ՛ ճակատներ կամաւորներու առաջման, մէկ խօսքով, բոլոր կենսական հարցերն ու խնդիրները նրա դատողութեան և կամքի բովն կանցնէին: Ֆիզիքապէս, ամոր ներկայութեան մէջ, կը տեսնէր յոյսի և անակնկալ յաղթանակներու արշալոյսը»¹⁸⁰:

Արամի ու նրա գործակիցների եռանդուն և, որ չափազանց կարևոր էր, հետևողական քայլերը տվեցին ցանկալի արդյունք. մարտական ոգին, գիտակցական կարգապահությունը ձևավորված էր: Ոգևորությամբ համակված ժողովրդական զանգվածները թե՛ երևանից և թե՛ գավառներից, կամավորական խմբեր կազմած, մեկնում էին ռազմաճակատ: Ձեռնարկված արդյունավետ քայլերի առթիվ զորավար Սիլիկյանն իր գոհունակությունը և, միաժամանակ, հարծակման անցնելու մտադրությունը հայտնեց Արամին: Թշնամուն վճռական հակահարված հասցնելը դժվարին գործ էր: Տարբեր տվյալներով 5500-7000 զինվորներ ունեցող հայկական զորքը Սարդարապատում պետք է հաղթահարեր 6000-9000 կանոնավոր զինվորներ և 1500-3000 քուրդ հեծյալներ հաշվվող և լավ սպառազինված հակառակորդի դիմակայությունը¹⁸¹: Թուրքերն ունեին ռազմամթերքի պաշարներ, օգնական ուժեր ստանալու հնարավորություններ, գումարած թաթարների աջակցությունը: Հայկական զորքը զուրկ էր օգնության որևէ հույսից:

1918 թ. մայիսի 22-29-ին, զորավար Սիլիկյանի և փոխգնդապետ Ա. Վեքիլյանի մշակած պլանի համաձայն, հայկական զորքը գնդապետ Դանիել Բեկ Փիրումյանի անմիջական հրամանատարությամբ Սարդարապատի ճակատում հակահարծակման անցավ թուրքական զերակշիռ ու-

¹⁷⁹ «Արամը», էջ 129-130:

¹⁸⁰ Կոստյան Զ., նշվ. հոդվածը, «Դրօշակ», 1928, մայիս, N 5, էջ 138:

¹⁸¹ Աֆանասյան Ա., նշվ. աշխ., էջ 37-38: Փափագեան Վ., Սարդարապատի հերոսամարտը, Դրօշակ, Աթենք, 1988, 25 մայիս-8 հունիս, N 3-4, էջ 51: Արզումանյան Մ., Արիավիրքից վերածնունդ, Երևան, 1973, էջ 144:

ծերի դեմ և ծանր մարտերից հետո թշնամուց ազատագրեց Արարատյան դաշտավայրի և հարակից շրջանների տասնյակ բնակավայրեր¹⁸²: Ջախ-ջախված թուրքերը (մրանց միայն զոհերի թիվը հասնում էր 3.500-ի) նահանջեցին Ալեքսանդրապոլի ուղղությամբ¹⁸³:

Սարդարապատի հաղթանակից ոգևորված Բաշ-Ապարանի ճակատում գործող Դրոյի զորամասերը մայիսի 28-ին անցան հակահարձակման և թեժ մարտերի ընթացքում ջարդելով թուրքերին ազատագրեցին Ալի-Քուչակն ու Բաշ-Ապարանը: Մայիսի 29-ին թուրքերը հեռացան Զանաձուլից:

Սարդարապատի ու Բաշ-Ապարանի հաղթություններն աննախադեպ ոգևորություն առաջացրին և՛ թիկունքում, և՛ ռազմաճակատում: Այն իր արտահայտությունն է գտել մայիսի 29-ին զորավար Սիլիկյանին ուղարկված Արամի հեռագրում: Ոգևորված Արամը մշում էր. «Ո՛րախ եմ Ձեզ հաղորդել, որ Ձեզ վստահված բանակի տարած հաղթանակը Սարդարապատի մոտ առողջարար ներգործություն ունեցավ մեր ժողովրդի վրա: Ոտքի վրա է ոչ միայն Երևանի նահանգը, այլև Ղազախն ու Դիլիջանը...: Բոլորը զենքերը ձեռքերին շտապում են Ղարաքիլիսա...»¹⁸⁴: Այս հեռագիրը փաստում է, որ Արամը գիտեր նաև գնահատել ու մեծարել արժանավոր մարդկանց:

Տիրող հոգեվիճակի լավագույն արտահայտությունն էր այն համազամանքը, որ զորավար Սիլիկյանը մայիսի 29-ին պատրաստվում էր ազատագրել Ալեքսանդրապոլը: Մայիսյան հերոսամարտերի բաղկացուցիչն էր նաև Ղարաքիլիսայի ճակատամարտը: Մայիսի 24-28-ը զորավար Նազարբեկյանի ընդհանուր հրամանատարության ներքո գործող մոտ 7000-ոց հայկական բանակային և աշխարհագորային ջոկատները ծանր հարված հասցրին թուրքական 10000-ոց բանակին՝ մրանց վրա գործելով մեծ ու զսպիչ ազդեցություն¹⁸⁵:

¹⁸² ՀԱԱ, ֆ. 121, ց. 2, գ. 84, ք. 5; գ. 82, ք. 5; գ. 82, ք. 16-17; Ավետիսյան Հ., Զայոց ազգային միասնության հաղթանակը..., էջ 95-96:

¹⁸³ ՀԱԱ, ֆ. 121, ց. 2, գ. 82, ք. 19:

¹⁸⁴ Զայաստանի Զանրապետությունը 1918-1920թթ., (Քաղաքական պատմություն): Փաստաթղթերի և նյութերի ժողովածու, Պատ. խմբագիրներ Գ. Գալոյան, Վ. Ղազախեցյան, Երևան, 2000, էջ 34:

¹⁸⁵ Սարգսյան Ե., Թուրքիան և նրա նվաճողական քաղաքականությունը Ամերիկովկասում (1914-1918), Երևան, 1964, էջ 450:

Նշված ժամանակաշրջանում իրենց տրամաբանական վախճանին հասան նաև տարածաշրջանում զարգացող քաղաքական անցքերը: 1918թ. մայիսի 26-ին Բաթումում թուրքական կողմը նոր վերջնագիր ներկայացրեց անդրկովկասյան պատվիրակությանը: Նրանով, ի հավելումն մայիսի 11-ի վերջնագրի, թուրքերը պահանջում էին լրացուցիչ տարածքներ ի հաշիվ Երևանի նահանգի, ինչպես նաև Անդրկովկասի երկաթուղիների տրամադրումը իրենց գործերին: Վերջնագիրն ավելի սրեց հայերի, վրացիների և թաթարների ներկայացուցիչների միջև առկա հակասությունները: Այդ առիթով Ե. Սարգսյանը նկատել է. «Մուսավաթականները գտնում էին, որ պետք է այն անհապաղ ընդունել, դաշնակները լրիվ մերժում էին թուրքական պահանջները, իսկ վրացական մենշևիկները ձգտում էին թուրքիայի հետ իրենց ձեռնտու հաշտության պայմանների հասնել հայկական տերիտորիաների հաշվին»¹⁸⁶:

Գերմանական հովանավորությունն ապահոված վրաց գործիչների և կովկասյան թաթարների ներկայացուցիչների ջանքերով մայիսի 26-ին Անդրկովկասյան Սեյմը լուծարվեց: Անդրկովկասյան հանրապետությունը դադարեց գոյություն ունենալ: Նույն օրը վրաց քաղաքական գործիչները, որոնք պահը հարմար էին նկատել զատվելու խեղդվող հայերից¹⁸⁷, հռչակեցին Վրաստանի անկախությունը: Հաջորդ օրը կովկասյան թաթարների ներկայացուցիչները հայտարարեցին իրենց պետության ստեղծման մասին՝ նրան տալով Ադրբեջան անունը:

Մայիսյան ճակատագրական օրերին քաղաքական ճանապարհով հայ ժողովրդի փրկությանը ձգտող Թիֆլիսի Հայոց Ազգային խորհուրդը կանգնած էր երկընտրանքի առջև՝ կամ մերժել թուրքական վերջնագիրը և արդեն պաշտոնապես միայնակ շարունակել անհավասար պատերազմը, կամ էլ՝ ընդունել ծանր պայմաններ պարտադրող թուրքական վերջնագիրը և կնքել հաշտություն, ինչը ենթադրում էր նաև հռչակել Հայաստանի անկախությունը: Կար մի էական հանգամանք ևս. անկա-

¹⁸⁶ Սարգսյան Ե., Թուրքիան և նրա նվաճողական քաղաքականությունը..., էջ 374:

¹⁸⁷ Խատիսեան Ա., Հայաստանի Հանրապետութեան ծագումն ու զարգացումը, Բեյրութ, 1968, էջ 82:

խություն չհռչակելու դեպքում Արևելյան Հայաստանի տարածքը կարող էր բաժանվել Վրաստանի և Ադրբեջանի միջև: Այդ ժամանակվանից նրանց որդեգրած ռազմաքաղաքական ուղեգիծը միանշանակորեն վկայում է, որ նրանք առանց երկմտելու փորձելու էին Հայաստանի պատմական տարածքները բաժանել իրար միջև:

Ի վերջո, երկար քննարկումներից հետո Հայոց Կ. Ազգային խորհուրդը մայիսի 28-ին որոշեց հաշտարար պատվիրակություն ուղարկել Բաթում, որը պետք է անկախ Հայաստանի անունից հաշտություն կնքեր Թուրքիայի հետ¹⁸⁸: Իսկ Հայաստանի անկախությունը, ավելի ճիշտ՝ հայկական գավառների նկատմամբ Հայոց Կ. Ազգային խորհրդի գերագույն և միակ իշխանությունը հռչակվեց մայիսի 30-ին: Ահա այն. «Անդրկովկասի քաղաքական ամբողջության լուծումով եւ Վրաստանի ու Ադրբեջանի անկախութեան հռչակումով ստեղծուած նոր դրութեան հանդէպ, Հայոց Ազգային խորհուրդը իրեն յայտարարում է Հայկական գաւառների Գերագոյն ու Միակ իշխանութիւն: Որոշ ծանրակշիռ պատճառներով թողնելով մօտիկ օրերը՝ կազմել Հայոց Ազգային Կառավարութիւն, Ազգային խորհուրդը ժամանակաւորապէս ստանձնում է կառավարական բոլոր ֆունկցիաները՝ հայկական գաւառների քաղաքական եւ վարչական ղեկը վարելու համար»¹⁸⁹:

1918թ. հունիսի 4-ին Բաթումում Հայաստանի և Թուրքիայի միջև կնքվեց հաշտության պայմանագիր: Այն անչափ ծանր էր հայ ժողովրդի համար, նրան թողնվում էր ընդամենը 11 հազար քառ. կմ տարածք և մի քանի կմ երկաթուղագիծ: Այդուհանդերձ, իրականանում էր անկախ պետականության վերականգնման հայոց բազմադարյան ծգտունը, որն ինքնին մեծ նվաճում էր դարավոր թշնամու դեմ երկարատև պայքար մղող հայության համար:

Բաթումում թուրքական վերջնագիրն ընդունելուց հետո Ա. Ահարոնյանը Երևանի Հայոց Ազգային խորհրդին հաղորդում էր. «... թեև փոքրիկ և աղքատ բայց Ազատ Հայաստանի համար մենք պարտական ենք մեր զորքերի անձնագոհությանը: Որքան մեզ հայտնի է, գեր-

¹⁸⁸ Ավետիսյան Հ., Հայկական հարցը 1918 թվականին, էջ 245-258:

¹⁸⁹ Վրացեան Ս., Կեանքի ուղիներով, Դէպքեր: Դէմքեր: Ապրումներ, հ. Դ, Պէյրուք, 1965, էջ 120:

մանացիները և թուրքերը Կովկասը բաժանում էին Վրաստանի և Ադրբեջանի, հայերին ապահովելով միայն ֆիզիկական գոյություն: Պետք է ենթադրել, որ մեր գործի դիմադրությունը նրանց հարկադրեց ճանաչել և ճայաստանը»¹⁹⁰: Հայոց դիմադրությանն ականատես Վեհիքը հաստատում էր այն փաստը, որ հայ ժողովրդի դիմադրությունը հարկադրեց իրենց հաշվի նստել նրա հետ: Մատնանշելով հայոց հուժկու կռիվները, նա Բաթումում հալիլ բեյին հորդորում էր արագացնել հաշտության կնքումը հայերի հետ¹⁹¹:

Այսպիսով, մայիսյան հերոսամարտերը, որոնց կազմակերպմանը Արամ Մանուկյանն ունեցավ առաջնակարգ ղեկավար մասնակցություն, բացառիկ նշանակություն ունեցան հայության համար: Փրկելով հայ ժողովրդին վերջնական բնաջնջումից, բարձրացնելով նրա բարոյական ու մարտական կորովը, հերթական անգամ հաստատելով, որ միասնական պայքարի դեպքում անկարելի է ընկճել նրան, հերոսամարտերը հնարավոր դարձրին Հայաստանի անկախության վերականգնումը:

Սինչև մայիսյան հերոսամարտերը թուրքերը դեմ էին ինքնուրույն Հայաստանի ստեղծման ցանկացած գաղափարի¹⁹²:

Հայաստանի առաջին հանրապետության ստեղծման, ապա նաև նրա հիմքերի ամրապնդման գործում ունեցած առաջնակարգ և վիթխարի ներդրման համար Արամ Մանուկյանն արժանացավ Հանրապետության հիմնադրի պատվանմանը:

Արամի գործունեությանը բարձր գնահատական են տվել արդեն նրա ժամանակակիցները, իսկ ավելի ուշ՝ նաև պատմագրության ներկայացուցիչները:

Գնդապետ Արարատյանը, տալով 1918թ. սկզբից Երևանի նահանգում կատարված ռազմաքաղաքական իրադարձությունների, այդ թվում՝ Երևանյան զորամասի կազմավորման, մայիսյան հերոսամարտերի

¹⁹⁰ Հ ԱԱ, ֆ. 289, ց. 1, գ. 2, ք. 10; գ. 11, ք. 5; «Ձանգ», 1918, հունիսի 11, N 41:

¹⁹¹ Աւետեան Ս., Յուշամատեան եւ զօր Անդրանիկ (Հայ ազատագրական ազգային յիսնամեայ. 1870-1920), Փարիզ, 1954, էջ 193:

¹⁹² Армянский вопрос и геноцид армян в Турции (1913-1919). Материалы Политического архива министерства иностранных дел Кайзеровской Германии. Сборник. Составитель, ответственный редактор, автор предисловия, введения и примечаний В. Микаелян, Ереван, 1995, с. 508:

նկարագիրը, 1919թ. փետրվարին գրել է. «Երևանի շրջանում այն ժամանակ ամբողջ իշխանությունը հաստատուն կերպով գտնվում էր Արամի ձեռքում, որը լիակատար համերաշխությամբ զործում էր գեներալ Սիլվիոսի և, զորքին ու ժողովրդին ոգևորող, Դրոյի հետ: Երևանի շրջանի ռազմական հզորության, տնտեսական և մնացյալ կարգի կազմակերպման Արամի փայլուն ընդունակությունը հայերին հնարավորություն տվեց գեներլ ձեռքներին պահպանել փոքրիկ հողակտորը, միակ քաղաք Երևանը և Սուրբ Էջմիածնի եկեղեցին և, եթե հայերիս հետ հաշվի էին նստում այն ժամանակ և հաշվի են նստում այժմ, ապա դա կարող են վերագրել բացառապես երեք անձանց՝ Արամին, գեներալ Սիլվիոսին և Դրոյին»¹⁹³:

Սիմոն Վրացյանը մայիսյան հերոսամարտերից տասնամյակներ անց նկատել է. «Յիշենք միշտ, որ եթե այսօր Հայաստանը Հայաստան է իր ազգագրական կազմով եւ ազգային պետական կառույցով, հայութիւնը այդ բանի համար երախտագետ պետք է լինի առաւելապէս Արամին եւ Դրոյին եւ, ի հարկէ, Արարատեան Աշխարհի հայ ժողովրդին ու զործիչներին»¹⁹⁴:

Արամին մեծարել կամ ուղղակիորեն անկախ Հայաստանի հիմնադիր են անվանել Ն. Աղբալյանը՝ ՀՀ Դաշնակցության Արևելյան բյուրոյի անունից նրան ծոնած դամբանականում, Ա. Շահխաթունին, Օ. Մխիթարյանը, Գ. Լազյանը, Ս. Վրացյանը, հայրենական և սփյուռքի պատմաբաններ Հր. Սիմոնյանը, Գ. Գալոյանը, Ա. Հակոբյանը, Ա. Մելքոնյանը, Ռ. Հովհաննիսյանը, Անահիտ Տեր-Սիմասյանը և շատ ուրիշներ¹⁹⁵:

¹⁹³ Հ ԱԱ, ֆ. 121, ց. 2, գ. 84, ք. 6; Ավետիսյան Հ., Հայկական հարցը 1918 թվականին, էջ 224:

¹⁹⁴ Վրացեան Ս., Կեանքի ուղիներով: հ. Դ, էջ 182:

¹⁹⁵ «Աշխատանք»ի բացառիկ, 1919, փետրվարի 12; «Ճակատամարտ», 1921, հունվարի 30; «Հայրենիք», 1923, հունիս, N 8; էջ 38, 42; Վրացեան Ս., Կեանքի ուղիներով, հ. Դ, էջ 184; Լազեան Գ., Յեղափոխական դեմքեր (Մտաւորականներ եւ հայդուկներ), Գահիրէ, 1945, էջ 201; Սիմոնյան Հր., Անդրանիկի ժամանակը, Երևան, 1996, էջ 127; Գալոյան Գ., Հայաստանը և մեծ տերությունները 1917-1923թթ., Երևան, 1999, էջ 26-27, 36; Հակոբյան Ա., Հայաստանի Հանրապետություն (1918-1920թթ.), Երևան, 1992, էջ 6; Մելքոնյան Ա., Հայոց պատմություն: Դասախոսությունների ձեռնարկ, Երևան, 1998, էջ 197: Hovannisian R., The Republic of Armenia, vol. I, The First Year, 1918-1919, Berkeley-Los Angeles-London, 1974, p. 147: Ter Minassian A., La République d'Arménie (1918-1920), p. 74:

խորհրդահայ պատմագրությունը խորհրդային վարչակարգի հարուցած քաղաքական-գաղափարական պարտադրանքի պայմաններում չկարողացավ ի հարկին գնահատել Արամի դերը հերոսամարտերում, բայց և զերծ մնաց նրան փնտվելուց¹⁹⁶: Ավելին, որոշ ներկայացուցիչներ, օրինակ Սարգարապատի հերոսամարտին առաջին հատուկ ուսումնասիրությունը նվիրած Յ. Թուրշյանի մոտ ակնհայտ էր Արամին դրական ներկայացնելու, նրա վճռական դերակատարումը զոհեքողարկված ձևով ընդունելու ձգտումը: Կարծում ենք այն ժամանակ տիրող պայմաններում հրապարակայնորեն ավելին ասել հնարավոր չէր: Պա է փաստում Յ. Թուրշյանի կողմից Սարգարապատում Արամի ունեցած դերին տրված միանշանակ բարձր գնահատականը 1964թ. զրած իր անտիպ հոդվածում, որը եզրափակվում է հետևյալ խոսքերով. «Արամ Մանուկյանը հայ ժողովրդի բովանդակ պատմության այն սակավաթիվ իրատես դեմքերից մեկն է, որոնց մեծությունը ճիշտ տեսնելու և ճիշտ գնահատելու համար հարկավոր է ժամանակի հեռավորություն: Քանի գոյատևի և հարատևի մեր ժողովուրդը, նա այնքան ավելի հստակորեն կտեսնի ու այնքան ավելի բարձր կգնահատի Սարգարապատի հերոսամարտը, որտեղ մենք, վերջապես, բռնեցինք անկախության իրավունքի քննությունը, և այդ հերոսամարտի հաղթանակի ապահովման հետ սերտորեն միաձուլված Արամ Մանուկյանին»¹⁹⁷:

Հայոց նորանկախ պետությունը գտնվում էր չափազանց ծանր կացության մեջ: Բարեբեր տարածքներից զրկված փոքրիկ երկիրը շրջապատված էր թշնամական օղակով, զուրկ էր արտաքին աշխարհի հետ կանոնավոր հաղորդակցության ճանապարհներից, իր ներսում ուներ մոտ 400 հազար անօթևան և ապրուստի տարրական միջոցներից զուրկ

¹⁹⁶ Թուրշյան Յ., Նշվ. աշխ.: Արզումանյան Մ., Նշվ. աշխ.: Աղայան Ծ.Պ., Հոկտեմբերը և հայ ժողովրդի ազատագրական պայքարը, Երևան, 1982; Հարությունյան Ա., Թուրքական ինտերվենցիան Անդրկովկաս 1918թ. և ինքնապաշտպանական կռիվները, Երևան, 1984, և այլն:

¹⁹⁷ Թուրշյան Յ., Հուշեր նվիրված Վանի 1915թ. ինքնապաշտպանության հերոս Արամ Մանուկյանին, ՀՀ ՊՊԹ Նոր պատմության բաժնի վավերագրերի ֆոնդ, ք.մ. 941,մ.մ. 11844, ք. 39:

հայ փախստականներ: Զգացվում էր բնակարանների, պարենամթերքի և դեղորայքի սուր պակաս, գլուխ էին բարձրացնում համաճարակային հիվանդությունները՝ օրական խլելով տասնյակ կյանքեր և այլն:

Որքան էլ որ երկրի դրությունը ծանր էր, Արամը երբեք չհուսահատվեց: Քաղաքից հեռանալու մասին իրեն ուղղված առաջարկություններին նա պատասխանում էր, որ ոչ թե քաղաքից հեռանալու մասին պետք է մտածել, այլ այն փրկելու¹⁹⁸: Իսկ ստեղծված ծանրագույն իրավիճակը թելադրում էր անհապաղ ստեղծել Հայաստանի պետական իշխանություն և տեր կանգնել երկրի ու ժողովրդի ճակատագրին:

Մինչ Հայոց Կենտրոնական Ազգային խորհուրդը և նրա հանձնարարությամբ Հովհաննես Քաջազնունու կողմից ձևավորվող ՀՀ անդրամիկ կառավարությունը կտեղափոխվեին Երևան՝ Արամ Մանուկյանի նախաձեռնությամբ 1918թ. հունիսի կեսերին ստեղծվեց անկախ Հայաստանի նախակառավարության դեր կատարող Երևանի Ազգային խորհրդի Վարչությունը: Այն պետք է կառավարեր երկիրը մինչև ՀՀ անդրամիկ կառավարության Երևան ժամանելը¹⁹⁹: Նրան պետք է ենթարկվեին երկրի պետական և հասարակական բոլոր հիմնարկությունները:

Երևանի Հայոց Ազգային խորհրդի Վարչության նախագահը և զինվորական բաժնի վարիչը Արամ Մանուկյանն էր²⁰⁰: Հայաստանի Առաջին Հանրապետության պետական գործիչներից Ա. Բաբայանը նկատել է. «Արամն էր, որ փաստօրեն կառավարում էր երկիրը: Իբրեւ լիազօր Ազգային խորհրդի, նա կազմակերպել էր վարչութիւնները եւ սպասում էր նորընտիր կառավարութեան եւ Ազգային խորհրդի Երեւան տեղափոխուելուն»²⁰¹:

Վարչության ձևավորման ընթացքում մեկ անգամ ևս ընդգծվեց Արամի ուրույն դերն այդ բախտորոշ ժամանակաշրջանում: Ստանձնելով Վարչության նախագահի պաշտոնը Արամը սկզբնապես հրաժարվեց իրեն

¹⁹⁸ Աստուածատրեան Ա., Արամ, «Հայրենիք», 1964, օգոստոս, N 8, էջ 35:

¹⁹⁹ «Լրատու» Երևանի Հայոց Ազգային խորհրդի, 1918, հուլիսի 9, N 2; հուլիսի 23, N 6:

²⁰⁰ Ասրյան Ա., Արամ Մանուկյան. կյանքը և գործը..., էջ 211:

²⁰¹ Բաբայան Ա., Էջեր Հայաստանի անկախութեան պատմութիւնից, Գահիրէ, 1959, էջ 8:

առաջարկվող զինվորական վարիչի պաշտոնից հոգուտ զինվորական գործչի՝ դա պատճառաբանելով մի կողմից զբաղվածությամբ, մյուս կողմից՝ զինվորականության զգացմունքներին չդիպելու և դժգոհությունների տեղիք չտալու ցանկությամբ: Նրա առաջարկությունը մերժվեց, իսկ կամխատեսումն արդարացավ: Այդ իսկ պատճառով Արամն առաջարկեց այդ պաշտոնը հանձնել զոր. Սիլիկյանին: Վերջինս այդ կապակցությամբ տվեց հետևյալ պատասխանը. «Դժգոհները չեն ճանաչում Արամին: Երբ ճանաչեն կը համոզուեն, որ ներկայումս նա միակ կարող մարդն է այդ պաշտոնի համար: Ես ինչու՞ եմ հրաժարում. որովհետեւ մէկ է՝ ես ինքս առանց Արամի ոչինչ չեմ անելու: Ես այժմ էլ առանց Արամի հետ խորհրդակցելու ոչ մի կարեւոր քայլ չեմ անում, իսկ վարիչի պաշտոնը յանձն առնելու պարագային, գրասենեակս տեղափոխելու եմ նրա մօտ: Ո՛չ մի զինուորական վերարկու ոչ ոքի չի տայ այն, ինչ որ ունի Արամը: Նրանից յարմար վարիչ մեզ համար չէք գտնի»²⁰²: Այս խոսքերն անչափ կարևոր են, որովհետև պատկանում են մի ջերմ հայրենասերի, որի գլխավորությամբ մշակվեց և իրականացվեց Սարդարապատի հաղթական օպերացիան:

Վարչությունն ուներ զինվորական, ներքին գործերի, պարենավորման, ֆինանսների և այլ բաժիններ: Նրանց ձևավորման ժամանակ հերթական անգամ Արամը դրսևորեց անխտրական, ապակուսակցական մոտեցում: Լինելով 33 դաշնակցության ղեկավար գործիչներից՝ նա գործի մեջ ներգրավեց բոլոր կարող ուժերին՝ անկախ կուսակցական պատկանելությունից:

Արամը հաջողությամբ և յուրահատուկ ձևով, առանց ընդունված օրենքների մեխանիկական կիրառման, մղում տվեց Երևանի Վարչության աշխատանքներին: Նրա գլխավորությամբ Երևանի Վարչությունը ձեռնամուխ եղավ ռազմական, վարչական, սոցիալ-տնտեսական և այլ հրատապ խնդիրների լուծմանը:

Բնականաբար, Վարչության և անծամբ Արամի գլխավոր մտահոգությունը երկիրը թուրքական ոտնձգություններից պաշտպանելն էր: Երևանում քաջ գիտակցում էին, որ քաղաքից յոթ կմ հեռու կանգնած

²⁰² Աստուածատրեան Ա., Արամ, «Հայրենիք», 1964, հուլիս, N 7, էջ 74; «Արամը», էջ 125:

թուրքերը ցանկացած պահի կարող էին խախտել Բաթումի պայմանագիրը և անցնել հարձակման: Հունիսի 3-ին Ազգային խորհուրդը հայությանը կոչ էր անում ամուր պահել ռազմաճակատը՝ ընդգծելով, որ վերջնական հաշտությունը կախված է հայոց ռազմական ուժից, թիկունքի և ճակատի անձնագոհությունից²⁰³: Հունիսի 5-ին Երևանի Հայոց Ազգային խորհուրդը վճռեց «ձեռնարկել ժողովրդի ռազմական ուժերի կազմակերպման ապագա անակնկալների դեմ...»²⁰⁴: Հունիսի սկզբներին Ազգային խորհուրդը 19-32 տարեկան տղամարդկանց հրահանգում էր մտնել զորքի շարքերը, առավել տարիքավորներին՝ կազմել կամավորական խմբեր ու ներկայանալ հրամանատարությանը, իսկ նրանց ուժեր անկարող էին կռվել՝ հրահանգում էր իրենց զենք-զինամթերքը և զինվորական հանդերձանքը հանձնել զինվորական իշխանությանը:

Ռազմական գործի կազմակերպմանն Արամն ունեցավ այնքան կարևոր նասնակցություն, որ տասնամյակներ անց Ռուբեն Տեր-Մինասյանը, տալով ՀՀ զինվորական նախարարության (1918-1920) գործունեության համեմատական նկարագիրը և այդ համապատկերում անդրադառնալով Արամի զինվորական ձեռնարկներին, նկատել է, որ նրա կողմից «կիրառուած ժողովրդական-զինուորական ծեւերի շնորհիւ, առանց նիւթական եւ դրամական միջոցների, մի պատկառելի զինուորական ոյժ էր կազմակերպուած թուրքերի դիմաց, որից կ'ակնածէին նոքա»²⁰⁵:

Ռազմական պատրաստություններին զուգընթաց Երևանի Հայոց Ազգային խորհուրդը, նրա Վարչությունը և անձամբ Արամը բանակցություններ էին վարում թուրքերի հետ՝ փորձելով հասնել նրանց կողմից Բաթումում ստանձնած պայմանագրային պարտավորությունների կատարմանը, ինչպես նաև Անդրկովկասյան մյուս հանրապետությունների հետ Հայաստանի սահմանների ճշգրտմանը: Ա. Մանուկյանը զեներալ Նազարբեկյանի և զեդապետ Բաղդասարյանի հետ հունիսի 12-ին Դիլիջանում արտահայտվեց այն բանի օգտին, որ

²⁰³ Հ ԱԱ, ֆ. 289, ց. 1, գ. 4, ք. 14:

²⁰⁴ «Զանգ», 1918, հունիսի 7, N 40:

²⁰⁵ Ռուբեն, հ. 7, էջ 330-331:

հայկական ուժերը հետ քաշվեցին Բաթումի պայմանագրով գծված նոր սահմանագիծ, իսկ թուրքերն իրենց ուժերը հետ քաշեցին Բաշ-Ապարանի և Ղարաքիլիսայի ուղղություններում²⁰⁶։ Հունիսի 17-ին Վեհիբ փաշան զոր. Նազարբեկյանին առաջարկեց մինչև հայ-վրացական սահմանի որոշումը թուրքական զորքերը թողնել Ալեքսանդրապոլ-Սադախլու երկաթգծի ուղղությամբ։ Արամը դեմ արտահայտվեց այդ մտքին՝ գտնելով, որ թուրքերին հարկավոր է հեռացնել Ղարաքիլիսայի գծից և Վրաստանի հետ սահմանը պահպանել հայկական զորքերով²⁰⁷։ Թշնամու ճնշման տակ հայկական զորամասերը նահանջեցին նոր սահմանագիծ, իսկ թուրքական զորքերի հեռացման հարցը մնաց առկախ մինչև 1918թ. աշուն, երբ Առաջին աշխարհամարտում պարտված Թուրքիան պարտադրված իր ուժերը հեռացրեց Կովկասից։

Երևանի Վարչության առջև ծառացած դժվարին խնդիրներից մյուսը պարենային ճգնաժամի մեղմումն էր։ Այդ նպատակով Ազգային խորհուրդը 1918թ. հուլիսի 9-ին երկրում սահմանեց հացի պետական մոնոպոլիա՝ հսկողության տակ վերցնելով հացահատիկի բերքը։ Հրապարակված հրահանգ-օրենքը հստակորեն սահմանում էր հացահատիկի հավաքման, հսկողության կարգը, պետականացված բերքի գինը և այլ հանգամանքներ։ Օրենքը խախտող անձինք և գյուղերը ենթակա էին խստագույն պատժի²⁰⁸։ Գյուղացիների դժգոհությունը մեղմելու նպատակով նրանց էր թողնվում իրենց ընտանիքներին հարկավոր չափաբաժինը, իսկ մնացածը համապատասխան գնով, որից չպետք է տուժեին ո՛չ գյուղացին և ո՛չ էլ քաղաքացին, վերցնում էր պետությունը՝ բնակչության մնացած մասին ու զորքին հատկացնելու համար²⁰⁹։

Իրականացվում էին քայլեր նորանկախ երկրի ճակատագրի և իրենց զբաղեցրած դիրքի նկատմամբ պաշտոնյաների պատասխանատվությունը բարձրացնելու ուղղությամբ։ Մասնավորապես, Ներքին գործերի բաժնի վարիչ Ս. Թորոսյանը Երևանի գավառի Ղանարլուի (Արտաշատ) տեղամասի կոմիսարին աշխատանքից ազատել էր այն

²⁰⁶ Հ ԱԱ, ֆ. 121, ց. 2, գ. 175, թ. 34։

²⁰⁷ Նույն տեղում, գ. 98, թ. 25։

²⁰⁸ «Լրատու» Երևանի Հայոց Ազգային խորհրդի, 1918, հուլիսի 9, N 2։

«Հորիզոն», 1918, օգոստոսի 21, N 165։

²⁰⁹ «Լրատու» Երևանի Հայոց Ազգային խորհրդի, 1918, հուլիսի 12, N 3։

բանի համար, որ նա 1918թ. հունիսին Ղամարլուի շրջանի էվակուացիայի ժամանակ առաջինն էր լքել շրջանը, որի պատճառով գրասենյակը կողոպտվել էր²¹⁰:

Ընթերցելով լրատվության կարևորությունն այդ բարդ և խառնակ ժամանակաշրջանում Վարչությունը հունիսի 23-ին որոշեց հիմնել սեփական թերթ, որը ստացավ «Երևանի Ազգային խորհրդի լրատու» անունը²¹¹: Արագ և ստույգ լրատվություն ապահովելու նպատակով Արամը պետական մարմինների ղեկավարներին խնդրում էր հրապարակման ենթակա տեղեկություններն ամեն օր ուղարկել թերթին: Ավելին, մամուլի գործունեությունը ինքնահոսի չմատնելու նպատակով նույն օրը ստեղծվեց պատերազմական ժամանակի մամուլի վերաբերյալ հրահանգ մշակող չորս հոգանոց հանձնաժողով: Մշակվելիք հրահանգը պետք է ներկայացվեր Երևանի Ազգային խորհրդի հաստատմանը²¹²:

Արամի կառավարությունը որոշակի հսկողություն սահմանեց հրապարակային ելույթների վրա, անշուշտ, ելնելով այն հայեցակետից, որ երկրում իրականացվելիք ձեռնարկների հաջողությունն ամենից առաջ պայմանավորված էր հասարակական կայունությամբ: Ոմանք, ամտեսելով այն հանգամանքը, որ այդ քայլը թելադրված էր երկրի ճգնաժամային իրավիճակով, իշխանություններին մեղադրում էին խոսքի ազատությունը սահմանափակելու մեջ: Սոցիալ-դեմոկրատ Զ. Ազատյանը Երևանի և Թիֆլիսի Ազգային խորհուրդներին զանգատվում էր, որ ինքը ցանկացել է դասախոսություն կարդալ, սակայն տպարանները մերժել են առանց միլիցիայի պետի թույլտվության տպել ազդագրերը և ավելացնում, որ «դա խօսքի ազատութեան բռնադատումն է, որը պետք է այսօր և եթ վերացի»: Իրավիճակին խորամուխ Արամն այդ առիթով նշում էր, որ «իւրաքանչիւր դասախօս պարտաւոր է յայտնել միլիցիապետին թէ որտեղ, որ ժամին և ինչի մասին պիտի խօսի»²¹³: Կարծում ենք նրա կեցվածքը տվյալ պահին արդարացված էր, քանզի ավելորդ ժողովրդավարությունը կարող էր վնասել երկրի կայունացմանը:

²¹⁰ Գ ԱԱ, ֆ. 201, ց. 2, գ. 1, ք. 1, 2:

²¹¹ Նույն տեղում, ֆ. 206, ց. 1, գ. 7, ք. 5:

²¹² Նույն տեղում, գ. 6, ք. 9:

²¹³ «Լրատու» Երևանի Զայոց Ազգային խորհրդի, 1918, հուլիսի 23, N 6:

Արդյունավետ քայլեր կատարվեցին երկրի վարչական ապարատն ամրապնդելու, պետական հաստատությունների գործունեությունը կանոնավորելու, տնտեսությունը հսկողության տակ պահելու և ֆինանսական սուղ միջոցները լրացնելու ուղղություններով և այլն:

Հայրենամյվեր աշխատանքի շնորհիվ՝ Արամի գլխավորությամբ, Երևանի կառավարությունը ապահովեց հանրապետության կյանքի տարբեր ոլորտների կենսագործունեությունը, նրա համեմատական կայունությունը և, միաժամանակ, որոշակի հիմքեր ստեղծեց պետական շինարարության համար, որին ձեռնամուխ էր լինելու Երևան ժամանող ՀՀ առաջին կառավարությունը:

1918թ. հուլիսի 19-ին Երևանի Վարչության նախագահ Ա. Մանուկյանը և իշխանության մյուս գործիչները հանդիսավորությամբ դիմավորեցին հայրենիք ժամանող Թիֆլիսի Հայոց Կենտրոնական Ազգային խորհրդին և Հ. Զաքազնունու գլխավորած ՀՀ առաջին կառավարության անդամներին: Հուլիսի 20-ին Երևանի և Թիֆլիսի Հայոց Ազգային խորհուրդների համատեղ նիստում Ա. Մանուկյանը հայտնեց իշխանությունը ՀՀ «օրինաւոր կառավարութեանը» հանձնելու մասին և իր ու իր գործակիցների անունից պատրաստակամություն հայտնեց աջակցել նրան՝ «երկրում կարգ ու կանոն և տանելի կեանք ստեղծելու գործում»²¹⁴: Այն փաստը, որ Ազգային խորհրդի գործունեության մասին զեկուցեց Արամը և ոչ թե նրա նախագահ խորեն եպ. Մուրադբեկյանը²¹⁵, լրացուցիչ անգամ փաստում է, որ նա Ազգային խորհրդի և նրա մարմինների անվիճելի առաջնորդն էր, Երևանի փաստացի ղեկավարը:

ՀՀ ՆԵՐՔԻՆ ԳՈՐԾԵՐԻ ԱՌԱՋԻՆ ՆԱԽԱՐԱՐԸ

Հուլիսի 20-ին և 22-ին Երևանում գումարված տեղի և Թիֆլիսի Ազգային խորհուրդների համատեղ նիստեր համատեղ նիստերում

²¹⁴ Նույն տեղում:

²¹⁵ Նույն տեղում: Ազգային խորհրդի նախագահի պաշտոնում խորեն եպ. Մուրադբեկյանին նախորդել էր Սկրտիչ Մուսինյանը:

վերջնական տեսքի բերվեցին Հայաստանի պետական իշխանության բարձրագույն մարմինները:

1918թ. հուլիսի 24-ին հրապարակվեց ՀՀ անդրամիկ կառավարության կազմը, որն ուներ հետևյալ պատկերը. վարչապետ՝ Յովհաննես Բաջազյանի, արտաքին գործերի նախարար՝ Ալեքսանդր Խատիսյան, ներքին գործերի նախարար՝ Արամ Մանուկյան, ֆինանսների նախարար՝ Խաչատուր Կարճիկյան, զինվորական նախարար՝ զեմ. Հ. Հախվերդյան²¹⁶: Կարճ ժամանակ անց արդարադատության նախարար նշանակվեց Երևանի գործիչներից Գ. Պետրոսյանը:

Կարծում ենք ավելի ճիշտ կլիներ, եթե Արամը նշանակվեր վարչապետ, քանզի նա վեց ամսից ավելի հանդիսանում էր Երևանի նահանգի փաստացի ղեկավարը, ուներ կազմակերպչական բացառիկ ծիրը, լայն ժողովրդականություն, երկաթյա կամք և ամբողջական պատկերացում երկրում տիրող իրադրության մասին: Հ. Թուրքյանն իրավացիորեն նկատել է, որ Արամը «իրերի բերունով, պատմության ընթացքով արդեն գտնվում էր այդ պոստում»²¹⁷: Ա. Աստվածատրյանը, որը ողջունում էր 1917թ. դեկտեմբերին Արամ Մանուկյանի գործուղումը Երևան և նշում, որ այդ գործում Հ. Բաջազյանին չէր կարող համեմատվել նրա հետ, այժմ հայտնում էր, որ «վարչապետութեան համար այլ շնորհք էր հարկավոր, որպիսի տեսակետով Բաջազյանին Արամից բարձր էր»²¹⁸: Վերջին միտքը, որին չեն հետևում հիմնավորումներ, համոզիչ չէ: Իսկ ինչու՞ Արամը չընտրվեց վարչապետ: Թերևս տրամաբանական է թվում հետևյալ պատճառը: Կարծում ենք, և դա մատնանշել են նաև ժամանակի որոշ գործիչներ, որ հարկավոր էր այդ պաշտոնում ընտրել մեկին, որը չէր հարուցի թուրքերի հատուկ վրդովմունքը: Իսկ Արամն այն գործիչն էր, որն իր ամբողջ գործունեությամբ մեծապես վնասել էր թուրքական պլանների կենսագործմանը թե՛ Արևմտյան Հայաստանում և թե՛ Արևելյան Հայաստանում:

²¹⁶ Հ ԱԱ, ֆ. 199, ց. 1, գ. 10, ք. 2: Արամը ՆԳ նախարարի պաշտոնը զբաղեցրեց նաև 1918թ. նոյեմբերի 4-ին ձևավորված ՀՀ երկրորդ կառավարության

կառավարության մեջ տես Հ ԱԱ, ֆ. 201, ց. 2, գ. 1, ք. 151; ֆ. 206, ց. 1, գ. 3, ք. 1:

²¹⁷ Թուրքյան Հ., նշվ. աշխ., էջ 230-231:

²¹⁸ Աստուածատրեան Ա., Սարդարապատի պատմաշինությունը, էջ 137:

ինչև, 1918թ. հուլիսի 26-ին Արամը ստանձնեց ՆԳ նախարարի պաշտոնը²¹⁹:

ՀՀ կառավարության մեջ Արամն ուներ բացառիկ դիրք: Ղա հետևանք էր մի կողմից նրա կամային որակների, մյուս կողմից՝ այն համ-
գամանքի, որ նրա ենթակայության ներքո էին կենտրոնացվել նաև
լուսավորության, հաղորդակցության, պարենավորման, խնամատա-
րության, մեր օրերի լեզվով ասած՝ տարածքային կառավարման
նախարարի լիազորությունները: Այս համգամանքը մեզ հիմք է տալիս
համաձայնվել Ռուբենի այն մտքին, թե «1918ին, երբ Հայաստանի օրի-
նական կառավարութեան Քաջազնունու դահլիճն էր կազմւած, փաստո-
րէն կառավարութիւնը մնում էր Արամը...»²²⁰:

Արամին ՆԳ նախարար նշանակելու առիթով Ս. Վրացյանը,
միանգամայն իրավացիորեն, նկատել է, որ նա միակն էր, որ «այդ
խառնակ օրերին ընդունակ էր կարգ ու անդորրութիւն պահել երկրում եւ
պետական» շինարարություն սկսել²²¹: Ավելին, Հայաստանի
Հանրապետության երկրորդ՝ կոալիցիոն կառավարության ձևավորման
ժամանակ ՀՅԴ-ն՝ մերժելով Արամին կառավարության մեջ չընդգրկելու
ժողովրդականների պահանջը, հայտարարեց, որ միայն Արամ
Մանուկյանը կարող է կարգ պահել երկրում²²²:

1918թ. օգոստոսի 1-ին աշխատանքը սկսեց Հայաստանի անդրանիկ
օրենսդիր մարմինը՝ Խորհուրդը: Խորհրդի երկրորդ նիստում՝ օգոստոսի
3-ին, Հ. Քաջազնունին հրապարակեց կառավարության ծրագիրը, որը
ներքին քաղաքականության ոլորտում նախատեսում էր. երկրում իրավա-
կարգի, կյանքի և գույքի ապահովության հաստատում,
հաղորդակցության ճանապարհների բացում, պարենային ճգնաժամի
հաղթահարում, հոգածություն փախստականության ու գաղթականության
նկատմամբ, ներքին ու արտաքին փոստ-հեռագրական կապի

²¹⁹ Հ ԱԱ, ֆ. 201, ց. 2, գ. 10, ք. 2:

²²⁰ Ռուբեն, հ. 7, էջ 312:

²²¹ Յուշապատում Հ.Յ. Ղաշնակցութեան, էջ 467:

²²² Բաբաջանյան Վ., Կուսակցությունները Հայաստանի առաջին Հանրապետու-
յան կոալիցիոն կառավարությունում, «Բանբեր Հայաստանի արխիվների», 2003,
N 2, էջ 180:

վերահաստատում, բանակի վերակազմավորում, տնտեսության վերականգնում և այլն:

Նկատենք, որ առաջին իսկ օրերին Հայաստանի խորհուրդը պետական դրոշ ընդունեց եռագույնը (կարմիր, երկնագույն, նարնջագույն), որն Արամի սեպտեմբերի 13-ի հրահանգով պետք է բարձրացվեր պետական-կառավարական հիմնարկների վրա²²³:

Նոր պաշտոնում ու նոր պայմաններում Արամի ազգային-պետական մտածողությունն ու գործելակերպը նոր շունչ և որակական նոր դրսևորումներ ստացան: Նա միշտ հանդես եկավ նախածեռնողի, իրադարձություններին ընթացք տվողի դերում, որպիսիք կարևորագույն գծեր են յուրաքանչյուր բարձրաստիճան պաշտոնյայի համար, հատկապես այն օրերի նման բախտորոշ ժամանակաշրջանում:

Արամը մեծագույն եռանդով մասնակցեց կառավարության հետապնդած ծրագրի իրականացմանը:

ՀՀ իշխանությունների, հատկապես ՆԳ նախարարության առաջնակարգ խնդիրներից մեկը երկրում կյանքի և գույքի ապահովության, իրավակարգի, ամուր իշխանության հաստատումն էր: Անկախության սկզբնական շրջանում երկրում դեռևս շարունակվում էին հանցագործությունները, այդ թվում և սպանությունները. սպանում էին անգամ մեկ պարկ ալյուրի համար: Ահավոր չափեր էր ընդունել մաուզերիզմը: Մաուզերիստների խժդժությունների զոհ էին դառնում բազմաթիվ քաղաքացիներ: Իրավիճակը մտահոգիչ էր նաև այն առումով, որ մի շարք գյուղերում բնակչությունը խուսափում էր հարկերի վճարումից և իշխանության ներկայացուցիչներին դիմավորում էր զենքով²²⁴:

Առաջադրված խնդրի հաջող իրագործման նպատակով Արամ Մանուկյանն առաջ քաշեց մասնավոր զենք-զինամթերքի պետականացման խնդիրը: Խորհրդարանում հիմնավորելով հարցը՝ Արամը իրավացիորեն նշում էր, որ երկրում ոչ մի իշխանություն չի կարելի հաստատել, քանի որ կառավարության կարգադրությունները չեն կատարվում, իսկ հարկադրանքի դեպքում հանդիպում են զինված

²²³ Հայաստանի Հանրապետությունը 1918-1920թթ., (Քաղաքական պատմություն), էջ 62:

²²⁴ «Զանգ», 1918, օգոստոսի 17, N 46:

դիմադրության: Նա իրավացիորեն գտնում էր, որ եթե ժամանակին ժողովրդին զինելն անհրաժեշտություն էր և ուներ ինքնապաշտպանական նպատակներ, ապա տվյալ պահին անձի անձեռնմխելիությունը, ունեցվածքի և այլ իրավունքների պաշտպանությունը պետական իշխանության պարտականությունն է: 1918թ. օգոստոսի 29-ին Հայաստանի խորհուրդն ընդունեց Արամի ներկայացրած «Մասնավոր սեփականություն կազմող զենքերի և զինամթերքների պետականացման մասին» օրենքը²²⁵: Այն նախատեսում էր պետականացնել մասնավոր զենք-զինամթերքը, բացի որսորդական և անպահունակավոր տեսակներից: Ձեռքը կամովին չհանձնելու դեպքում այն գրավվելու էր հարկադրաբար, իսկ օրինազանցները ՆԳ նախարարի որոշմամբ ենթարկվելու էին պատժի: Վտանգված գյուղերի ինքնապաշտպանությանը չվնասելու նպատակով նախատեսվում էր այդ գյուղերից գրավված զենքի մի մասը թողնել տեղում՝ հատուկ մարդկանց պահպանության ներքո:

Դեռևս օգոստոսի 27-ին Արամը Երևանի միլիցիապետին հրահանգել էր ձեռնարկել եռանդուն քայլեր՝ քաղաքում հրաձգությունը դադարեցնելու և ապօրինի հրազեն կրող քաղաքացիների զենքերն առգրավելու ուղղությամբ: Նա նաև խստագույնս պատվիրել էր օրինախախտներին պատասխանատվության ենթարկելիս կազմել արձանագրություններ, իսկ առգրաված զենքի քանակի մասին զեկուցել իրեն²²⁶:

Ձեռք-զինամթերքի առգրավման ընթացքում թյուրիմացություններից խուսափելու համար սեպտեմբերի 27-ին Արամը զինագրավող հանձնաժողովին կարգադրեց խուզարկություններ կատարել միայն տվյալների առկայության դեպքում և հարգալից վերաբերվել բնակչությանը, բնակարանատիրոջը ներկայացնել իր ստորագրությամբ լիազորագիրը՝ խուզարկություն կատարելու մասին: Նա նաև հանձնաժողովին պարտավորեցնում էր զենք-զինամթերք գտնելու

²²⁵ Հ ԱԱ, ֆ. 199, ց. 1, գ. 4, թ. 1: Հայաստանի Հանրապետության պառլամենտի օրենքները (1918-1920թթ.), Պատասխանատու խմբագիրներ՝ Միրզոյան Ս., Մամիկոնյան Ֆ., Երևան, 1998, էջ 2-3:

²²⁶ Հ ԱԱ, ֆ. 201, ց. 1, գ. 15, թ. 52:

դեպքում կազմել առանձին արձանագրություն, որը պետք է ստորագրվեր հանձնաժողովի անդամների, բնակարանատիրոջ և վկաների կողմից:

Ծավալվեց հետևողական պայքար օրինազանցությունների դեմ: 1918թ. հոկտեմբերի 8-ին, ընթացք տալով Երևանի գավառային կոմիսարի դիմումին, Արամը երեք ամսով կալանքի ենթարկեց զինագրավման մասին օրենքը խախտած Գ. Ավանեսովին և Յ. Օրդուկին²²⁷: Հոկտեմբերի 28-ին Արամի հրամանով մեկ ամսով կալանվեց Սարդարապատի բնակիչ Գ. Հակոբյանը՝ իշխանության ներկայացուցչի պահանջին չենթարկվելու և նրան ծեծելու համար²²⁸: Սեպտեմբերի 30-ին ձերբակալվեցին Երևանի գավառի Ավան գյուղի երկու բնակիչներ, որոնք գյուղի այլ բնակիչների հետ ստեղծել էին ավազակախումբ և զբաղվում էին խաղաղ բնակչության թալանով²²⁹:

ԵՊ նախարարության հետապնդած տարաբնույթ խնդիրների հաջող կենսագործումը ենթադրում էր սեփական շարքերի մաքրում անհուսալի, օրինազանց և անկարգապահ աշխատակիցներից, ինչը և կատարում էր Արամը՝ խտրականություն չդնելով ոչ ոքի մեջ: Սեպտեմբերի 13-ին նա Նոր Բայազետի գավառային կոմիսարին հանձնարարեց ձերբակալել հարկահավաքի ժամանակ չարաշահումներ կատարած տեղամասային կոմիսարներ Ռ. Թարունյանցին ու Ն. Աթոյանցին²³⁰: Հոկտեմբերի 12-ին Արամը պարենավորման բաժանմունքի վարիչին հրահանգեց նույն բաժանմունքի պաշտոնյա, Բաշ-Ապարանի հեթոսներից Արսեն Տեր-Պողոսյանին ժամանակավորապես՝ մինչև քննության ավարտը, ազատել աշխատանքից՝ հիմք ունենալով գնդապետ Բեյ-Մամիկոնյանի կատարած հետաքննության ընթացքում նրա վրա բարդված մեղադրանքները²³¹: Հոկտեմբերի 25-ին Արամը Երևանի շրջանային դատարանի դատախազին առաջարկում էր քրեական պատասխանատվության ենթարկել պարենավորման բաժանմունքի լիազորներ Ս. Հարությունյանին և Ս.

²²⁷ Նույն տեղում, գ. 16, թ. 35:

²²⁸ Նույն տեղում, թ. 73:

²²⁹ Նույն տեղում, գ. 15, թ. 121:

²³⁰ Նույն տեղում, թ. 78:

²³¹ Նույն տեղում, ց. 2, գ. 1, թ. 122:

Սահակյանին՝ պետական պարենամթերքը յուրացնելու և այլ ապօրինությունների համար²³²:

Արամը փորձում էր վերացնել նաև հանցագործությունների առաջացմանը նպաստող պայմանները: Այսպես, Հայաստանի խորհրդի նախագահի և քարտուղարի անուններով կեղծ վկայագիր կազմելու և դրանով հացահատիկ հավաքելու համար 1918թ. սեպտեմբերի 26-ին ձերբակալվել էր Ե. Լուսիկյանը: Սեպտեմբերի 27-ին Արամը գործն ուղարկել էր Երևանի շրջանային դատարանի դատախազին՝ մեղադրյալին քրեական պատասխանատվության ենթարկելու նպատակով²³³: Այստեղ էականն այն է, որ ելնելով այդ դեպքից՝ նա գավառային և տեղամասային կոմիսարներին հանձնարարում է նմանօրինակ թյուրիմացություններից խուսափելու համար լինել զգոն, գործել իրենց պարտականությունների շրջանակներում, իսկ օրենքով չնախատեսված դեպքերում գործել միայն վերադասի արտոնությամբ²³⁴:

ՆԳ մախարար Արամի աշխատանքային պրակտիկայում տեղ էր գտել այնպիսի կարևոր սկզբունք, ինչպիսին էր սահմանված վարչական պատժաչափի կրճատումը, եթե դա կարող էր ավելի ծանր հետևանքների հանգեցնել, քան գործված հանցանքն էր, կամ էլ եթե պարզվել էր, որ պատժի համար բավարար հիմքեր չեն եղել: Օրինակ, հաշվի առնելով հոկտեմբերի 12-ին իր կողմից 1,5 ամսով կալանված Խ. Բակլաչյանի հիվանդագին վիճակը, հոկտեմբերի 22-ին Արամը նրան ազատեց պատժի հետագա մասի կրումից²³⁵: Նոյեմբերի 9-ին նա միջնորդեց Հայկական դիվիզիայի պետին՝ Քարվանսարայի մի խումբ ձերբակալված բնակիչների կալանքից ազատելու համար՝ հենվելով ՆԳ մախարարին կից իրավախորհրդատուի եզրակացության վրա, ըստ որի գործում բացակայում էին հանցանշանները²³⁶:

Արամը հանդես էր գալիս նաև իշխանության ամհարկի դրսևորումների դեմ: Ղեկտեմբերի 4-ին, ընդառաջելով եղվարդցիների բողոքին, նա պարենավորման մախարարից պահանջեց հետ կանչել Եղվարդ

²³² Նույն տեղում, ց. 1, գ. 16, ք. 50:

²³³ Նույն տեղում, գ. 18, ք. 32-34:

²³⁴ Նույն տեղում, գ. 16, ք. 39:

²³⁵ Նույն տեղում, ք. 47:

²³⁶ Նույն տեղում, ք. 92:

գյուղում գտնվող պատմիչ զորախումբը, իսկ ծերեակալված գյուղացիներին անհապաղ ազատել բանտարկությունից, ավելացնելով, որ հակառակ դեպքում օրինազանց պաշտոնյաները կենթարկվեն խստագույն պատժի²³⁷։ Երաշտի պատճառով գյուղը ուշացրել էր հարկի վճարումը պետությանը՝ պարտավորվելով վճարել հաջորդ տարի։

ՀՀ-ում ստեղծված սոցիալ-տնտեսական ծանր կացությունը թելադրում էր նոր մոտեցում օրինախախտներին պատժելու հարցում։ Այդ հարցում նախաձեռնությամբ հանդես եկավ Երևանի քաղաքապետը՝ առաջարկելով քաղաքի միլիցիայի պետին օրինախախտ քաղաքացիներին արգելափակելու փոխարեն վարչական կարգով տուգանքի ենթարկելու արտոնություն տալ։ Արամն ընթացք տվեց այս առաջարկությանը և այն ներկայացրեց կառավարությանը։ Վերջինս հավանություն տվեց այդ առաջարկությանը՝ սահմանելով, որ միլիցիայի պետին իրավունք էր տրվում քաղաքացուն ենթարկել դրամական տուգանքի, որը պետք է փոխանցվեր պետական գանձարան²³⁸։

Արամի մշտական ուշադրության կենտրոնում էր գտնվում ազգաբնակչության շահերի պաշտպանությունն ամեն տեսակ ապօրինություններից։ Օգոստոսի 5-ին նա զինվորական նախարարին առաջարկեց միջոցներ ձեռնարկել զինվորների կողմից դավալուցիներից խլված անասնահոտը հետ վերադարձնելու և առաջիկայում նման դեպքերը կանխելու ուղղությամբ²³⁹։ Հոկտեմբերի 7-ին Արամը Նոր Բայազետի գավառային կոմիսարին հանձնարարեց անհապաղ քայլեր ձեռնարկել Ն. Ախտայի բնակիչների գլխին պատուհաս դարձած ոմն խմբապետ Շնավոնի և նրա խմբի շահատակությունները կանխելու ուղղությամբ, և կատարածի մասին հաղորդել իրեն²⁴⁰։

Արամն ամեն ինչ անում էր իր ենթակայության ներքո գտնվող պետական ծառայողներին զգաստացնելու, նրանց մեջ վստահված գործի հանդեպ պատասխանատվության զգացումը բարձրացնելու համար։ 1918թ. սեպտեմբերի 8-ի շրջաբերականով Արամն ի գիտություն

²³⁷ Նույն տեղում, գ. 15, թ. 202։

²³⁸ Նույն տեղում, գ. 105, թ. 2; գ. 16, թ. 10, 11։

²³⁹ Նույն տեղում, գ. 15, թ. 44։

²⁴⁰ Նույն տեղում, թ. 158-159։

գավառային պաշտոնյաների հայտարարեց, որ եթե իրենց նկատմամբ լրագրերում հրապարակված մեղադրանքները կարճ ժամանակում չհերքվեն, ապա նրանք կհեռացվեն աշխատանքից և դատի կտրվեն²⁴¹։ Մեկ այլ անգամ նա գավառային կոմիսարներին առաջարկեց ներկայացնել իրենց տեսակետներն այն մասին, թե որքանով են վարչական մարմինների համար նախատեսված հաստիքները համապատասխան իրենց գավառներում։ Կոմիսարներին առաջարկվում էր իրենց տեսակետներն արտահայտելիս ելնել պետական գանձարանի ծախսերը խնայելու անհրաժեշտությունից և որոշված նորմերի ավելացման անհրաժեշտության առաջարկի դեպքում ներկայացնել անհերքելի հիմնավորում²⁴²։

Արամն, անշուշտ, կառավարության օժանդակությամբ, որոշակի քայլեր ձեռնարկեց ներքին գործերի համակարգն ուժեղացնելու, նրանում հստակություն մտցնելու ուղղությամբ։ Այսպես, եթե Դարալազյազի միլիցիան 1918թ. հուլիսին ուներ 13 միլիցիոներ, ապա նոյեմբերին՝ 37²⁴³։ Եթե նույն թվականի օգոստոսին ՆԳՆ կենտրոնական ապարատն ուներ 26 ծառայող²⁴⁴, ապա նոյեմբերին՝ 41 և իրենից ներկայացնում էր բավական կազմակերպված կառույց։ Նրանում կային հատուկ հանձնարարությունների գծով երկու կոմիսարներ, իրավախորհրդատու, նախարարի գրասենյակի կառավարիչ իր ենթականերով, նախարարին կից Հայաստանի տարածքի վարչակազմի և միլիցիայի կոմիսար²⁴⁵։

ՆԳ նախարարությունում հստակություն մտցնելուն էր միտված Արամ Մանուկյանի հետևյալ քայլը։ Սեպտեմբերի 7-ին նա դիմեց Երևանի քաղաքապետին, որի իրավասության ներքո էր գտնվում քաղաքի միլիցիայի պետի նշանակումը, նրան առաջարկելով հրահանգ իջեցնել միլիցիայի պետին այն մասին, որ նա իր որոշումներով այս կամ այն անձանց կալանելու վերաբերյալ անհապաղ իրեն ներկայացնի այդ որոշումների պատճենները²⁴⁶։

²⁴¹ Նույն տեղում, գ. 1, թ. 79, 80, 81, 82։

²⁴² Նույն տեղում, գ. 2, գ. 47, թ. 120։

²⁴³ Նույն տեղում, թ. 96։

²⁴⁴ Նույն տեղում, գ. 3, թ. 65-67։

²⁴⁵ Նույն տեղում, թ. 123-124։

²⁴⁶ Նույն տեղում, գ. 1, գ. 18, թ. 9։

Սեպտեմբերի 10-ին Արամն անձամբ իր դժգոհությունն ուղղեց Երևանի միլիցիայի պետին՝ գործերում տեղ գտած այն երևույթների համար, որ նա կատարում էր ձերբակալություններ և գրանցում իր անունով, այնինչ ինքը տեղյակ չէր ո՛չ ձերբակալությունների, ո՛չ էլ դրանց պատճառների մասին: Նա միլիցիապետին հանձնարարում էր երկօրյա ժամկետում իրեն ներկայացնել բոլոր այդպիսի որոշումների մասին՝ մատնանշելով նաև, թե արդյո՞ք դրանց առթիվ կազմվել են մեղադրական ակտեր և ու՞մ են ուղարկվել²⁴⁷:

1918թ. հոկտեմբերի կեսերից Թուրքիան, որի կապիտուլյացիան համաշխարհային պատերազմում օրերի հարց էր, սկսեց իր զորքերը հեռացնել Կովկասից, այդ թվում և գրավյալ հայկական շրջաններից: Դրան զուգահեռ հայկական զինուժը զբաղեցնում էր այդ տարածքները: Մասնավորապես, հոկտեմբերի 18-21-ը հայկական ուժերը հաստատվեցին Լոռի-Փամբակում²⁴⁸: ՀՀ կառավարությունն Արամի գործուն մասնակցությամբ քայլ առ քայլ վերականգնում էր իշխանության մարմիններն ազատագրվող տարածքներում: Արդեն նոյեմբերին Ղարաքիլիսայի գավառային կոմիսարիատն ուներ 11 ծառայող, իսկ միլիցիան՝ 195 միլիցիոներ²⁴⁹: Արամը, փորձելով արագացնել թուրքերի կողմից ազատվելիք տարածքներում (Նախիջևան, Սուրմալու և այլն) իշխանության վերականգնումը, նոյեմբեր-դեկտեմբեր ամիսներին դրանց վարչական ղեկավարման համար կատարեց մի շարք նշանակումներ²⁵⁰: Դեկտեմբերի 8-ին նա Երևանի գավառային կոմիսարին հանձնարարեց մեկնել Ղամարլուի և Դավալուի շրջաններ ու վերականգնել իշխանությունը տեղերում, իսկ անհրաժեշտության դեպքում դիմել տեղի զինվորականությանն աջակցությանը²⁵¹:

Մինչև ՀՀ երկրորդ՝ կոալիցիոն կառավարության ստեղծումը (նոյեմբերի 4), երբ ՆԳՆ-ից զատվեցին պարենավորման և լուսավորության նախարարությունները, Արամն իր ներդրումն ունեցավ նաև

²⁴⁷ Նույն տեղում, գ. 16, թ. 20:

²⁴⁸ «Բանբեր Հայաստանի արխիվների», 1991, N 3, էջ 43; Վրացյան Ս.,

Հայաստանի Հանրապետություն, էջ 203:

²⁴⁹ Հ ԱԱ, ֆ. 201, ց. 2, գ. 47, թ. 100-112:

²⁵⁰ Նույն տեղում, թ. 69, 124, 131, 147; գ. 60, թ. 1:

²⁵¹ Նույն տեղում, ց. 1, գ. 15, թ. 203:

պարենային ճգնաժամի մեղմացման գործին: Ղա դժվարին գործ էր, քանզի երկրի պաշարները սահմանափակ էին, իսկ հաղորդակցությունն արտաքին աշխարհի հետ գրեթե բացակայում էր:

Օգոստոս ամսից, մի կողմից պարենային ծանր կացությունը մեղմելու, մյուս կողմից պետության զանձարանը լցնելու համար, ի լրումն հացի պետականացման, պետական մենաշնորհի հաստատվեց նաև գետնախնձորի, բամբակի, խմիչքների, աղի, կարտոֆիլի նկատմամբ: Վերջինի պետականացման վերաբերյալ օրինագիծը սեպտեմբերին կառավարությանն էր ներկայացրել Արամը²⁵²:

Կարճ ժամանակում պարենամթերքի պետականացման ուղղությամբ կատարվեց մեծ աշխատանք: Սեպտեմբերի 16-ի դրությամբ ՆԳ նախարարության պարենավորման բաժանմունքը հավաքել էր 180 հազար փութ հացահատիկ²⁵³:

Ձեռնարկվեցին քայլեր հանրապետության տարածք մթերքների պետական ներկրում կազմակերպելու և քաղաքացիների կողմից դրանց ներմուծումը դյուրացնելու ուղղությամբ: 1918թ. օգոստոսի վերջերին ՆԳՆ-ին կից պարենավորման բաժանմունքի կողմից Թիֆլիս ուղարկվեց Ս. Վանցյանը՝ այնտեղից պարենային և այլ ապրանքներ գնելու համար: Գործը դյուրացնելու նպատակով պարենավորման բաժանմունքը հայցեց արտաքին գործերի նախարարության օժանդակությունը²⁵⁴:

1918թ. օգոստոսի սկզբներին Արամի կարգադրությամբ ապրանքների ներմուծումը հայտարարվեց ազատ, իսկ անհրաժեշտ մթերքների արտահանումն արգելվեց և պետք է կատարվեր միայն հատուկ թույլտվությամբ²⁵⁵: Նոյեմբերի 28-ին Արամը ֆինանսների նախարարին խնդրեց մաքսային հաստատությունների վարչությանը կարգադրել արտոնել պարենամթերքի անարգել ներկրումը հանրապետություն: Գաղթականներին թույլատրվեց 10-15-ական փութ հաց բերել դրսից:

Կազմակերպվեց նաև հացի բաշխումը ազգաբնակչությանը: Հոկտեմբերի սկզբին Երևանում հաց էին ստանում 36 հազար

²⁵² «Ձանգ», 1918, սեպտեմբերի 28, N 57:

²⁵³ Հ ԱԱ, ֆ. 200, ց. 1, գ. 105, թ. 26:

²⁵⁴ Նույն տեղում, թ. 5, 6; «Ձանգ», 1918, օգոստոսի 25, N 48:

²⁵⁵ «Ձանգ», 1918, օգոստոսի 10, N 44:

գաղթականներ և տեղացիներ²⁵⁶։ Ա. Վրացյանը նկատել է, որ բնակչությանը պարենով, ինչպես նաև բնակարանով ապահովելու համար Արամը ստիպված էր դիմել նաև հարկադրանքի, ինչը հարուցում էր սեփականատերերի և ընդդիմության դժգոհությունը²⁵⁷։ Դրությունը շտկելու այլ ուղի չկար։

Արամը որոշակի, համրապետության ֆինանսատնտեսական ներուժին համարժեք քայլեր ձեռնարկեց խճուղիների պահպանման, հեռագրակապը վերականգնելու, ռադիոցանց ստեղծելու, ավտոմեքենաների շարժակազմը նորոգելու ուղղությամբ։ 1918թ. օգոստոսի 30-ին Արամը խճուղիների պահպանման համար կառավարությունից ստացավ 30000, իսկ սեպտեմբերի 6-ին՝ 100000 ռուբլի²⁵⁸։ Սեպտեմբերի 16-ին նա կառավարությունից ստացավ 20000 ռուբլի ավտոմեքենաների շարժակազմը սարքին պահելու և 50000 ռուբլի Դիլիջան-Այրում հեռագրացանցը վերականգնելու համար։ 1918թ. նոյեմբերի 16-ին ընդունվեց օրենք ՆԳ նախարարին 200 հազար ռուբլի վարկ տրամադրելու մասին՝ ռադիոկայան գնելու և երևանում գործարկելու համար²⁵⁹։

Արամը որոշակիորեն մասնակցեց նաև գավառներից մայրաքաղաքին մոտեցող համաճարակների կանխարգելմանը։ Հուլիսի 27-ին Ազգային խորհրդին կից Սանիտորիդի նախագահ Ջ. Անդրիասովից տեղեկանալով, որ Երևանի մի շարք շրջաններ աղտոտված են Արամը, նկատի ունենալով բնակչության առողջությանը սպառնացող վտանգը, քաղաքագլխին առաջարկեց ձեռնարկել միջոցներ քաղաքի հակասանիտարական վիճակում գտնվող վայրերը մաքրելու համար։ Ի հարկին քաղաքագլխի տրամադրության տակ էին դրվելու աշխատունակ փախստականները, ինչպես նաև զորամաս²⁶⁰։

Օգոստոս ամսին համաճարակային հիվանդությունները գավառներից թափանցեցին Երևան։ Օգոստոսի 21-ին Հայաստանի խորհուրդը

²⁵⁶ «Ձանգ», 1918, հոկտեմբերի 12, N 61:

²⁵⁷ Վրացեան Ա., Կեանքի ուղիներով։ Դեպքեր։ Դեմքեր։ Ապրումներ, հ. ե, Պէյրուք, 1966, էջ 29:

²⁵⁸ Հ ԱԱ, ֆ. 200, ց. 1, գ. 105, ք. 9, 18:

²⁵⁹ Հայաստանի Հանրապետության պառլամենտի օրենքները (1918-1920թթ.), էջ 19:

²⁶⁰ Հ ԱԱ, ֆ. 201, ց. 1, գ. 15, ք. 39-41:

երկիրը հայտարարեց խուլերայից վտանգված: Անհատների և կազմակերպությունների հանցավոր անտարբերությունը կանխելու նպատակով Արամը սեպտեմբերի սկզբներին արտահայտվեց խուլերայի դեմ պայքարի գլխավոր մարմնին՝ բժշկա-սամիտարական հանձնաժողովին չենթարկվողներին երեք ամսով բանտարկելու կամ 3000 ռուբլի տուգանելու առաջարկով²⁶¹: խուլերայի դեմ պայքարի նպատակով գավառներ էին ուղարկվում բժիշկներ ու ֆելդշերներ, հատկացվում որոշ զոււմարներ:

Արամի գործունեությունն այս բնագավառում նաև քննադատվել է: Մասնավորապես, Խորհրդի սոցիալ-դեմոկրատ պատգամավոր Յ. Ազատյանը նույնիսկ նշում էր, թե ՆԳ նախարարություն չկա և իրենց պետք չէ այդպիսի ՆԳ նախարար²⁶²: Աղբյուրները, սակայն, հերքում են այդ մեղադրանքը՝ վկայելով, որ ՆԳ նախարարություն և ՆԳ նախարար կար և նրանք հնարավորինք անում էին վիճակը շտկելու համար: Սակայն միջոցները բավարար չէին և ծանր հետևանքներից չհաջողվեց խուսափել: Մի փոքր ուշ սկսեց հետևանքներով էլ ավելի կործանարար տիֆը: Ընդհանուր առմամբ, 1918թ. աշնանից մինչև 1919թ. գարուն համաճարակներից ու սովից զոհվեց մոտ 180 հազար մարդ:

Երկրի ծանր դրությունը հնարավորություն չընձեռեց նկատելի քայլեր կատարել լուսավորության ոլորտում: Դրանք հիմնականում հանգում էին դպրոցական շենքերը զինվորականներից, գաղթականներից և որբերից ազատելուն ու բուն նպատակին հատկացնելուն: Նոյեմբերի 6-ին Հայաստանի Խորհրդի միստում Արամը հայտնեց, որ տարրական դպրոցների մի մասը բացված է, մյուս մասը՝ բացվելու վրա է: Այն դպրոցները, որտեղ զորք կար, շուտով ազատվելու էին և դրանցում ևս սկսվելու էին դասեր: Նա, ելնելով այն հանգամանքից, որ լուսավորության նախարարությունը զատվել էր ՆԳՆ-ից և վերածվել առանձին կառույցի, հույս էր հայտնում, որ այդուհետև դպրոցական գործն էլ ավելի կկանոնավորվի²⁶³: Արամը նոյեմբերի 16-ին ՆԳՆ-ին կից ուսումնական բաժնի վարիչի պաշտոնից ազատեց Ա. Աստվածատրյանին, որն այդ

²⁶¹ «Զանգ», 1918, սեպտեմբերի 10, N 52:

²⁶² Նույն տեղում:

²⁶³ «Զանգ», 1918, նոյեմբերի 21, N 72: «Բանբեր Հայաստանի արխիվների».
1991, N 3, էջ 50:

պաշտոնին էր նշանակվել իր կողմից օգոստոսի 26-ին, և վարիչի պարտականությունները փոխանցեց նորանշանակ ժողովրդական կրթության նախարարին²⁶⁴:

Կրթության զարգացմանը միտված կարևորագույն քայլ էր սեպտեմբերի 11-ի դպրոցական օրենքը, որով տարաբնույթ կազմակերպություններին և անհատ քաղաքացիներին արտոնվում էր սեփական միջոցներով բացել դպրոցներ²⁶⁵:

Արամը երկրում կատարվող գրագրությունների հայացման նախանձախնդիր էր: ՀՀ կառավարության սեպտեմբերի 14-ի նիստում, շեշտելով երկրի տարածքում հեռագրերի ընդունման և առաքման հայացման անհրաժեշտությունը՝ նա առաջարկեց Մորզեի ապարատի համար իր իսկ կողմից մշակված հայկական տառաշարը: Կառավարությունը հավանություն տվեց նրա առաջարկին և հանձնարարեց քայլեր ձեռնարկել նոյեմբերի 1-ից երկրում հեռագրերը թե՛ ռուսերեն և թե՛ հայերեն լեզուներով հաղորդելու համար²⁶⁶: «Ջանգ»ի սեպտեմբերի 28-ի հաղորդման համաձայն Արամը հեռախոսային գործերի կառավարչին հայտնել էր, որ այդ հաստատության ծառայողները պարտավոր են իմանալ հայերեն²⁶⁷: Ձեռնարկված քայլերի հետևանքով գրագրությունները, որոնք նախկինում տարվում էին հիմնականում ռուսերենով, աստիճանաբար հայանում էին:

ՀՀ իշխանությունների, անձամբ Արամի ուշադրության ներքո էր գտնվում հարյուր հազարավոր գաղթականության (փախստականության) և որբերի հոգածության հարցը: Նրանց օգնելու համար հատկացվեցին մեծ գումարներ և ընդունվեցին մի շարք օրենքներ: Օգոստոսի 22-ին կառավարության նիստում Արամը զեկուցեց Երևանի քաղաքային ինքնավարությանը կից գաղթականական բաժանմունքի ստեղծման և նրան միջոցներ տրամադրելու անհրաժեշտության մասին: Կառավարությունն ինքնավարությանը տրամադրեց 100000 ռուբլի²⁶⁸:

²⁶⁴ Հ ԱԱ, ֆ. 201, ց. 2, գ. 1, ք. 178:

²⁶⁵ Նույն տեղում, ֆ. 207, ց. 1, գ. 14, ք. 3:

²⁶⁶ Նույն տեղում, ֆ. 200, ց. 1, գ. 105, ք. 25:

²⁶⁷ «Ջանգ», 1918, սեպտեմբերի 28, N 57:

²⁶⁸ Հ ԱԱ, ֆ. 200, ց. 1, գ. 105, ք. 3:

«Ձանգ»ի տվյալներով գաղթականական բաժանմունքը ստեղծվել էր Արամի կողմից²⁶⁹:

Հոկտեմբերի 1-ին Հայաստանի Հանրապետության հորիզուրդը որբերի խնամքի համար Արամին հատկացրեց 750000 ռուբլի²⁷⁰: Մի քանի օր անց որբերի և գաղթականների օգնության, ինչպես նաև նրանց տրամադրվելիք բնակարանների վերաշինության նպատակով երկրի իշխանությունները առանձնացրեցին ևս 1 մլն 736 հազար ռուբլի: Դեռևս սեպտեմբերի 28-ին հորիզուրդն ընդունել էր օրենք, որով պետությունը պարտավորվում էր ընչազուրկ գաղթականներին հող կամ աշխատանք տրամադրել, իսկ հակառակ դեպքում հատկացնել պետական նպաստ²⁷¹: Կառավարության մոտեցումը գաղթականների հարցին ուսանելի է այն առումով, որ որոշվել էր օգնություն չցուցաբերել նրանց, ովքեր խուսափում էին առաջարկվող աշխատանքից:

Արամ Մանուկյանի նախանձախնդրությունն ու սրտացավությունն ակնհայտ էր առանձնապես որբերի ճակատագրի հարցում: Քաջ գիտակցելով, որ բավարար միջոցների բացակայության պայմաններում միայն համաժողովրդական մոտեցման դեպքում հնարավոր կլինի որբերին փրկել մահվան ճիրաններից, Արամը հոկտեմբերի 8-ին դիմեց ժողովրդին: Տեղեկացնելով, որ կառավարությունն իր խնամքի տակ է վերցրել 4000 որբերի և նտադիր է նրանց թիվը հասցնել 10000-ի, Արամն ավելացնում էր, որ հանրապետության կառավարությունն իր սուղ միջոցներով ի վիճակի չէ օգնել 50 հազարի հասնող բոլոր որբերին: Ժողովրդի աջակցությունը ստանալու համար Արամը դիմում էր նրա գիտակցությանն ու բնազդին՝ հետևյալ հոգեցունց խոսքերով. «Թառամում է խոշորագույն մասը մեր մատաղ սերնդի, մեռնում է ապագան մեր հայրենիքի, որի համար ցեղի լաւագույն մարդիկը պայքարեցին, տառապեցին և նահատակուեցին»: Հայտնելով, որ կարիքը մեծ է, միջոցներն ու ժամանակը՝ քիչ, Արամը ավելացնում էր. «Օգնութեան եկէ՛ք Ձեր Կառավարութեանը, փրկեցէ՛ք անկումից վաղուայ

²⁶⁹ «Ձանգ», 1918, օգոստոսի 25; Հայաստանի Հանրապետության պառլամենտի օրենքները (1918-1920թթ.), էջ 9:

²⁷⁰ Հ ԱԱ, ֆ. 199, ց. 1, գ. 4, ք. 3:

²⁷¹ Հայաստանի Հանրապետության պառլամենտի օրենքները (1918-1920թթ.), էջ 6:

յոյսը մեր Հայրենիքի, խնամուտ ձեռք կարկառեցեք մայքերի ու ճանապարհների վրայ մռմռացող անուժ որբերին, որոնց սովատանջ հայեացքը աղերսում է թէկուզ փշրանքը ձեր սեղանների»։ Նա ժողովրդին կոչ էր անում օգնել որբերին և հույս հայտնում, որ փոխադարձ ջանքերով կարելի կլինի փրկել նրանց²⁷²։

1918թ. հոկտեմբերի 11-ին ընդունած գաղթական որբերի խնամատարության և դաստիարակության մասին օրենքով պետությունը, համծինս խնամատարության նախարարի, իր վրա էր վերցնում բոլոր գաղթական որբերի խնամքը։ Նախատեսվում էր խնամվող որբերի թիվը հասցնել 10 հազարի, և ևս 5000-ի համար կառուցել նոր որբանոցներ։ Պետությունն իր վրա էր վերցնում մինչև 15 տարեկան որբերի խնամքը, իսկ 15 տարեկանից բարձր տարիքի որբերի համար պետք է աշխատանք գտներ²⁷³։

Հայաստանի ռազմաքաղաքական փխրուն կացությունը կառավարությանը թելադրում էր շարունակել Հայոց Կ. Ազգային խորհրդի կողմից Թուրքիայի և նրա դաշնակիցների հետ սկսված բանակցությունները։ Հայկական պատվիրակությունները Բեռլինում Հ. Օհանջանյանի և Կոստանդնուպոլսում՝ Ա. Ահարոնյանի գլխավորությամբ ծավալել էին եռանդուն գործունեություն։

Թուրքերի հետ բանակցություններ, թեև ոչ մեծամասշտաբ, ընթացան նաև Երևանում, որին մասնակցեց նաև Արամը։ Որպես պետական գործիչ և իրավիճակին քաջատեղյակ անձնավորություն նա, որքան էլ նրա համար դժվար էր համակերպվել հայ ժողովրդին պարտադրված թուրքական ծանր պայմաններին, որքան էլ որ ծանր էր բանակցել թուրք ջարդարարների հետ, ըմբռնում էր վերջիններիս հետ բանակցելու անհրաժեշտությունը։ Ժամանակը չէր խրոխտ կեցվածքի, այն միայն կբարդացներ հայոց կացությունը։ Այդ իսկ պատճառով Արամի գլխավորությամբ կազմակերպվեց պատշաճ ընդունելություն 1918թ. օգոստոսի 31-ին Երևան ժամանած թուրք գորավար հալիլին²⁷⁴։ Ավելին,

²⁷² Հ ԱԱ, ֆ. 201, ց. 1, գ. 38 (I մաս), թ. 53-54; ֆ. 199, ց. 1, գ. 207, թ. 19։

²⁷³ Հայաստանի Հանրապետության պառլամենտի օրենքները (1918-1920թթ.), էջ 11-12։

²⁷⁴ Հ ԱԱ, ֆ. 370, ց. 3, գ. 19, թ. 55; Նալասարդեան Վ., Արամի կեանքից, «Հայրենիք», 1925, նոյեմբեր, N 1, էջ 75-79։

Արամն անձամբ ժամանեց երկաթուղային կայարան՝ թուրք գործչին դրնավորելու համար ու գրկախառնվեց, անգամ համբուրվեց նրա հետ: 1918թ. Վրաստանում Հայաստանի դեսպան Արշակ Ջամալյանի վկայությամբ, Խալիլի հետ «պաշտոնական խոսակցությունը», այսինքն՝ հայ-թուրքական բանակցությունն ընթացավ Արամի բնակարանում²⁷⁵:

Ելնելով այն բանից, որ բանակցություններում քննարկվել է նաև Անդրանիկի հարցը, որին թուրքերը ձգտում էին վերացնել ասպարեզից, գրականության մեջ հանիրավի կերպով փորձ է արվել բանակցությունները ներկայացնել որպես ազգային շահերի և Անդրանիկի դեմ ուղղված ձեռնարկ:

Արխիվային նյութերի և գրականության ուսումնասիրությունից հետևում է, որ Անդրանիկի դեմ միջոցներ ձեռնարկելու հարցի քննարկումը եղել է դիվանագիտական քայլ, հեռու գործադրվելու հնարավորությունից²⁷⁶: Ադրբեջանը երբեք չէր ընդունի Ջանգեզուրում գտնվող Անդրանիկի դեմ զուտ հայկական զորք ուղարկելու Հ. Քաջագունու՝ Խալիլին արված առաջարկությունը²⁷⁷, այն պարզ պատճառով, որ անշեղորեն ձգտում էր նվաճել այն: Մյուս կողմից, Անդրանիկի հեղինակությունը (նաև զինուժը) այնքան մեծ էր, որ հանրապետության կառավարությունը չէր փորձի նրա դեմ զորք ուղարկել և սկսել եղբայրասպան պատերազմ, մի բան, որը կործանարար կլիներ երկուստեք: Բացի այդ, Հայաստանի Հանրապետությունը չճանաչող հերոսի գոյությունը ստեղծված պայմաններում, բացասական հետևանքներով հանդերձ, ավելի շատ ձեռնտու էր երկրին, քան վնաս, որովհետև իր գտնվելու շրջաններում հերոսը հանդիսանում էր զսպող ուժ թուրքերի դեմ: Առհասարակ, Անդրանիկը մեծապես խանգարում էր թուրքերի հայակույժ ագրեսիայի իրագործմանը:

Փորձելով օգտվել Խալիլի հետ ծանոթությունից՝ Արամն առաջ քաշեց Հայաստանի Հանրապետության տարածքի ընդարձակման հարցը, սակայն թուրք գործիչն առաջադրեց անընդունելի պայմաններ,

²⁷⁵ Հ ԱԱ, ֆ. 370, ց. 3, գ. 19, ք. 56:

²⁷⁶ Տե՛ս՝ Ասրյան Ա., ՀՀ կառավարության և Անդրանիկի հարաբերությունների հարցի շուրջ, Խ. Աբովյանի անվան ՀԴՄՀ-ի գիտական աշխատանքների ժողովածու, հ. II, Երևան, 2002, էջ 26-29:

²⁷⁷ Հ ԱԱ, ֆ. 370, ց. 3, գ. 19, ք. 56-57:

այն է՝ Մեղրին փոխանակել Ադրբեջանի իշխանության ներքո գտնվող Ջիվանշիրի և Վարանդայի շրջանների հետ: Խալիլ-Արամ կապի շնորհիվ սովի ճիրաններում գտնվող Հայաստանը Խալիլից ստացավ 25000 փութ ցորեն: Բացի այդ, թուրք գործիչը հրահանգեց Բաշ-Գառնիի շրջանի Միլլի ձորի թաթարներին հեռանալ թուրքական տարածք՝ այն հայ փախստականությանը զիջելու նպատակով²⁷⁸: Թեև, ինչպես սպասելի էր, թաթարները չանսացին Խալիլի ծայրին, որի անկեղծությունը միանգամայն կասկածելի էր, այնուամենայնիվ, այդքանն էլ բավական էր, որ հայկական ուժերը նշված տարածքը մաքրեին այդ թշնամական տարրերից: Իսկ հայկական պատմական տարածքներից թաթարների հեռացումը հրամայական անհրաժեշտություն էր՝ մի կողմից երկրի անվտանգությունն ապահովելու, մյուս կողմից՝ անօթևան տասնյակ հազարավոր հայ փախստականությանը տեղավորելու համար: Այդ ուղու նախանձախնդիրներից էին Արամը, Ռուբենը և ազատագրական շարժման այլ գործիչներ: 1918թ. ամռան վերջերից արևմտահայկական ուժերը խմբապետ Մուշեղի և ուրիշների գլխավորությամբ թշնամուց ազատագրեցին ճղնի ձորը, Միլիտերեն (Չանգեզուր տանող ճանապարհին), Բաշ-Գառնին և այլ տարածքներ: Ազատագրական այդ գործողությունների համար անհրաժեշտ զենք-զինամթերքը, որպիսիք արգելված էր դուրս տանել Երևանից, հայկական ուժերը ստացան Արամի արտոնագրով²⁷⁹: Բացի այդ, Բաշ-Գառնիի ազատագրումը, ինչպես տեղեկանում ենք Հայաստանի առաջին հանրապետության ռազմական նախարար, զեներալ Հ. Հախվերդյանի վկայությունից, իրականացվել էր միլիցիայի օժանդակությամբ²⁸⁰: Պարզ է, որ դա կարող էր կատարվել միայն ՆԳ նախարար Արամի հրահանգով:

1918թ. սեպտեմբերի 18-ին Արամը Նոր Բայազետի գավառային կոմիսարին հանձնարարեց կանխել գավառի Բասարգեչարի շրջանի նկատմամբ Ադրբեջանի իշխանության հաստատմանը ձգտող ոմն Չայ-խորսկու գործողությունները և թաթարներին հայտարարել, որ նրանք

²⁷⁸ Ռուբեն, հ. 7, էջ 145-146:

²⁷⁹ Նույն տեղում, էջ 111:

²⁸⁰ Հ ԱԱ, ֆ. 45, ց. 1, գ. 32, ք. 15:

պարտավոր են կատարել ՀՀ կառավարության օրինական պահանջները²⁸¹:

Երկիրը ներքին թշնամուց ազատագրելու կոնկրետ գործողությունների մասին, այդ թվում և Արամի մասնակցությամբ իրականացված գործողությունների մասին այնքան էլ չատ չեն: Սակայն, գեներալ Հ. Հախվերդյանի մեկ այլ վկայություն լիովին բացահայտում է Արամի դիրքորոշումն այդ հարցում: 1931թ. նա նկատել է, որ Արամը «Հայաստանի թաթարական բնակչության նկատմամբ վարում էր նեղ ազգային և պետական առումով վնասակար քաղաքականություն, արտաքսելով կամ, ավելի ճիշտ, ուղղակի քշելով թաթարներին իրենց բնակավայրերից, որոնք ենթադրվում էր բնակեցնել հայ փախստականներով: Այդ քաղաքականությունը, իմ խորին համոզմամբ, վարում էր ինքնուրույն, լռակյաց, հաշվի չնստելով նախարարների խորհրդի կարծիքի հետ, և ասելով մի բան, կատարելով այլ բան, հավանաբար, գտնելով դա օգտակար հայ ժողովրդի շահերի համար»²⁸²: Անշուշտ, քննադատության չի դիմանում և անընդունելի է Հ. Հախվերդյանի այն գնահատականը, թե Արամի այդ գործելակերպը պետական առումով վնասակար էր: Ընդհակառակը, պետական շահը պահանջում էր խիստ մոտեցում հայոց պատմական տարածքներում նստած թաթարների հանդեպ, որովհետև նրանք տասնամյակներ շարունակ, հատկապես 1905-1906թթ. և 1918թ. որդեգրել էին ծայրահեղ հակահայկական կեցվածք: Այդ էր պատճառը, որ Արամն իրականացրեց երկիրը նրանցից մաքրելու քաղաքականություն: Որ Արամը վարում էր ոչ թե նեղ ազգային, այլ ազգային-պետական շահերից բխող գործունեություն հաստատվում է այն հանգամանքով, որ նա, գնահատելով եզդիների և նրանց առաջնորդ Ջհանգիր աղայի օրինապահ դիրքը պետության հանդեպ, 1918թ. օգոստոսի 27-ին վերջինիս նշանակեց Հայաստանի տարածքում փախստական եզդիների գործերի վարիչ²⁸³ և պաշտպանեց նրանց շահերը բազմաթույն օրինախախտումներից:

²⁸¹ Նույն տեղում, ֆ. 201, ց. 1, գ. 15, թ. 102:

²⁸² Նույն տեղում, ֆ. 45, ց. 1, գ. 28, թ. 44:

²⁸³ Նույն տեղում, ֆ. 201, ց. 2, գ. 3, թ. 52:

Արխիվային փաստաթղթերի վերլուծությունից երևում է, որ Արամը կառավարության մեջ ուներ բացառիկ դիրք, և իզուր չէ, որ պատմագրության մեջ նրան անվանում են Հայաստանի փաստական կառավարիչ: Այսպես, Էլենելով թուրքական կողմի հետ կայացած համաձայնությունից՝ 1918թ. հուլիսի վերջերին Արամը ենթասպա Խոյեցյանին նշանակեց կառավարության ներկայացուցիչ Ալեքսանդրապոլում, որը պետք է կարգավորեր գաղթականական և այլ հարցերը²⁸⁴: Հուլիսի 30-ին նա Երևանի նահանգային վարչության բժշկական բաժանմունքը ժողովրդական առողջապահության տնօրինությունից հանեց և ընդգրկեց ՆԳՆ ենթակայության ներքո²⁸⁵: Այս քայլերը վկայում են, որ Արամի հեղինակությունը և լիազորությունների շրջանակը շատ ավելի լայն էր, քան ՆԳ նախարարինը: Արամի առանձնակի դերը երևում է և այն բանից, որ Երեւան նրան էին դիմում մաև ոչ իրեն վերապահված հարցերի վերաբերյալ, որոնց նա ընթացք էր տալիս: 1918թ. նոյեմբերի 25-ին արդարադատության նախարար Ս. Հարությունյանը հարցնում էր նրա կարծիքն այն մասին, թե արդյո՞ք ժամանակին և նպատակահարմար չէ լուծարել Էջմիածնի Հայ-լուսավորչական սինոդին կից դատախազի պաշտոնը: Արամի պատասխանն այդ հարցմանը դրական էր²⁸⁶: Հիմք ընդունելով Ղարաքիլիսայի ռազմական օկրուգի պետի՝ իրեն ուղղված հաղորդումը, որ քննչական իշխանության չգոյության պատճառով տեղում կուտակվել էին մեծ թվով քննչական գործեր, դեկտեմբերի 18-ին Արամն արդարադատության նախարարության առաջ հարց հարուցեց նշված տեղամասում շտապ նշանակել քննիչ և այդ մասին տեղեկացնել իրեն²⁸⁷: Արամի հրամանով նոյեմբերի 16-ին կրթության նախարարության գործը ՆԳՆ ենթակայությունից վերցվեց և փոխանցվեց կրթության նորանշանակ նախարարին:

Հայրենիքի հանդեպ ունեցած պատասխանատվությունը, ժողովրդասիրությունը, հետապնդվող խնդիրների նկատմամբ ցուցաբերած նախանձախնդրությունն Արամին ապահովում էին բարձր հեղինակու-

²⁸⁴ Նույն տեղում, գ. 1, ք. 42:

²⁸⁵ Նույն տեղում, գ. 1, գ. 9, ք. 1:

²⁸⁶ Նույն տեղում, գ. 2, գ. 1, ք. 146-147:

²⁸⁷ Նույն տեղում, ք. 174:

յուն: Ասվածի խոսու՞մ վկայությունն է Ղաթաքիլիսայի ազատագրումից հետո՝ հոկտեմբերի 20-ին ղարաքիլիսացիների հղած հեռագիրը զոր. Սիլիկյանին և Արամին, որում ասվում էր. «ՈՒրախ եմք, որ Հայկական զորքի և երկրի ներքին գործերի կառավարութեան գլուխ կանգնած էք դուք, որ հայկական կեանքի ամենածանր շրջանում չլքեցիք ձեր ժողովրդին և ցաւակից եղաք նրան: Հաւատում եմք, որ ձեր աշխատութեամբ և եռանդի շնորհիւ կը կազմւի ուժեղ բանակ և հաստատուն իշխանութիւն, որը վերջ կը դնի մեր ժողովրդի տանջանքներին»²⁸⁸:

Արամի պատասխանը ղարաքիլիսացիներին աչքի էր ընկնում գործնական մտքերով և համեստությամբ: Շնորհակալություն հայտնելով հայության լավ ապագայի համար արտահայտած զգացմունքի և հավատի առթիւ՝ Արամը հույս էր հայտնում, որ «հասարակական գործիչների գործակցութեամբ և ժողովրդի՝ դէպի անցնան մոմենտը ցոյց տւած գիտակցական վերաբերմունքի շնորհիւ մեզ կը յաջողւի մօտիկ ապագայում երկրի մէջ ցանկալի կարգը հաստատել, ձեռնարկելով մեր ժողովրդին այնքան անհրաժեշտ շինարար աշխատանք»²⁸⁹: Նա նաև հետաքրքրվում էր Ղաթաքիլիսայի ազգաբնակչության պարենային կացությամբ: Նկատելի է, որ Արամը խուսափում էր իր ամծին ուղղված գովասանքին անդրադառնալուց և շեշտում նպատակների անշեղ իրականացման ձգտումը, փորձում էր ժողովրդի դերը կարևորելով ստանալ նրա աջակցությունը: Նրա համեստությունը, չմեծամտանալու և մարդկանց գնահատելու կարողությունը չէր կարող անպատասխան մնալ և չբարձրացնել վարկը ժողովրդի մոտ:

Ելնելով ժողովրդի և ընդհանուր գործի շահերից՝ Արամը երբեմն անտեսում էր օրենքն ու գործող կարգը: Այսպես, ելնելով բազմահազար որբերի պատսպարման, հետևաբար նրանց անխուսափելի զրկանքներից և կործանումից փրկելու նպատակից, Արամն արդարացնում էր Երևանի դպրոցներից մեկը նրանց տրամադրելու մասին Ռուբենի ապօրինի արարքը և դրանով իսկ հավանություն տալիս վերջինիս այն մտքին, թե «ողջ եւ ապահով երեխաների ուսման հարցը աւելի կարելոր է, քան փողոցներում թափուածների ու քաղցի ճիրաններում գալարուողների

²⁸⁸ «Չամգ», 1918, հոկտեմբերի 27, N 65:

²⁸⁹ Նույն տեղում:

կեանքը»²⁹⁰: Նա իրավացիորեն գտնում էր, որ «կան դեպքեր...երբ օրենքն ու իրաւունքը գործադրելով՝ մենք յանցաւորներ կը դառնանք, մանաւանդ այնպիսի ծանր ու անբնական ժամանակներում, երբ դեպքերը տեղի են ունենում գահավէժ արագութեամբ եւ ստեղծում դրութիւններ, որոնք օրենքը չէր կարող նախատեսել»²⁹¹: Մեկ այլ անգամ, անտեսելով գոյություն ունեցող կարգն այն մասին, որ աշխատավարձը պետք է տրվեր միայն ներկայացվող պահանջաթերթիկի հիման վրա, նա Նոր Բայազետի գավառային կոմիսարին հղեց նրա աշխատակիցների աշխատավարձը, բավարարվելով զգուշացումով, որ հետագայում գումարները փոխանցվելու էին միայն ըստ կարգի»²⁹²:

Ժամանակակիցները վկայում են, որ Արամի արարքները զերծ էին անձնական շահախնդրությունից: ՀՀ առաջին կառավարության արդարադատության նախարար Գ. Պետրոսյանն Արամի մահվանից մեկ տարի անց նշում էր, որ նրա ձեռնարկները զուրկ էին անձնական միտումներից և բխում էին բացառապես հասարակության շահերից»²⁹³:

Գեներալ Հախվերդյանը, որի մոտ ակնհայտ է համակրանքի բացակայությունն Արամի հանդեպ, հիշատակված գրության մեջ նշում է, որ նա «անձնապես ձևանով և հարստության տենչող մարդ չէր»²⁹⁴: Հիրավի, նա աչքի էր ընկել անկաշառ վարքով, ապրել համեստ կենցաղով, խուսափել մեծամտությունից և մարդկանց հետ հարաբերություններում դրսևորել համեստություն ու փափկանկատություն: Գործ ունենալով հսկայական գումարների հետ և օժտված լինելով մեծ իշխանությամբ՝ նա երբեք դրանք չծառայեցրեց իր անձնական հարստացմանը: Ա. Աստվածատրյանի վկայությամբ, նա մինչև իր ընտանիքի Երևան տեղափոխվելն ապրում էր մի սենյակում, որը զուրկ էր հարմարություններից, ուներ «մի անշուք մահճակալ, երկու հասարակ սեղան եւ մի երեք-չորս նոյնպէս հասարակ աթոռ...Մի անկիւնում հին արկղի վրայ յարմարեցուած էր թիթեղեայ վառարան...»: Նա նաև ավելացնում է, որ Արամը սնվում էր ինչպես

²⁹⁰ «Արամը», էջ 139:

²⁹¹ Նույն տեղում, էջ 140:

²⁹² Հ ԱԱ, ֆ. 201, ց. 2, գ. 47, ք. 6:

²⁹³ Աստուածատրեան Ա., Արամը, «Հայրենիք», 1964, հունիս, N 6, էջ 80: «Արամը», էջ 124:

²⁹⁴ Հ ԱԱ, ֆ. 45, ց. 1, գ. 28, ք. 44:

հասարակ երևանցին, անգամ պատահում էր, որ ճաշի ժամանակ հաց չէր ունենում²⁹⁵։ Անգամ մրա թաղման ծախսը, որն այդքան էլ մեծ գումար չէր՝ ընդամենը յոթ հազար երեք հարյուր ութսուն ռուբլի վաթսուն կոպեկ, հոգաց պետությունը²⁹⁶։

Արամի պետական մտածողությունը, հաշվենկատ, հայրենամուտ ու օգտավետ գործելակերպը դարձել էին մրա նկատմամբ խոր հավատի աղբյուր։ 1919թ., Արամի մահվանից ամիսներ անց եղիշե Իշխանյանի հետ զրույցի ժամանակ, որը 1917-1919թթ. Ղարաբաղում ակտիվ դեր էր կատարել՝ լինելով ժողովրդական կառավարության նախագահ, Հակոբ Տերունին Ձանգեզուր-Ղարաբաղի ծանր դրության կապակցությամբ նշել էր. «Կառավարութիւնը...լուրջ, մտածած ու ծրագրած վերաբերմունք չունի Ձանգեզուր-Ղարաբաղի, մանաւանդ Ղարաբաղի վերաբերեալ։ Եթէ Արամը վաղաժամ մեռած չլիներ, վստահ եղիր, այլ վերաբերմունք կը լիներ»²⁹⁷։ Մեկ այլ օրինակ. 1919թ. հուլիսի 4-ին Ալեքսանդրապոլի գավառային կոմիսարը, փորձելով ՆԳ նախարարին համոզել, որ աննպատակահարմար է գավառի տեղամասերի թիվը չորսից իջեցնել երեքի, իր խոսքին ուժ տալու նպատակով նշում էր, թե գավառը չորս տեղամասերի էր բաժանվել հանգուցյալ Արամի հրամանով՝ 1918թ. նոյեմբերին²⁹⁸։

Արամի գործունեությունը, որպես ՆԳ նախարարի, բարձր են գնահատել մրա շատ ու շատ ժամանակակիցներ։ Նրանցից էր մաս Ռուբեն Տեր-Սիմասյանը։ Վերլուծելով 1918-1920թթ. ՀՀ ՆԳ նախարարության գործունեությունը, նա նշել է. «Արամի ժամանակ, ներքին գործոց նախարարութիւն ասելով պէտք էր հասկանալ պետութեան ֆիզիքական ոյժը եւ մրա կառավարական վարչամեքենան, մարմնացումը պետական եւ կուսակցական բարոյական հասկացողութեանց, օրէնքների գործադրման եւ պարտադրման միակ խողովակն ու միջոցը, կեդրոնը որտեղ ամփոփւում էին Հայաստանը կազմակերպելու բոլոր ձգտումներն

²⁹⁵ Աստուածատրեան Ա., Արամ, «Հայրենիք», 1964, ապրիլ, N 4, էջ 75; «Արամը», էջ 97-98;

²⁹⁶ Հ ԱԱ, ֆ. 199, ց. 1, գ. 16, ք. 14, 15, 16, 17, 18, 19; Սարգսյան Կ., Պատմություն և իրականություն, էջ 23:

²⁹⁷ Իշխանեան Ե., Լեռնային Ղարաբաղ (1917-1920), Երևան, 1999, էջ 505:

²⁹⁸ Հ ԱԱ, ֆ. 201, ց. 2, գ. 64 (I մաս), ք. 140:

ու ճիգերը: Արամի ատեն, ներքին գործոց նախարարութիւնը կը ներկայացնէր ամէն ինչ...»²⁹⁹: Դա հետեանք էր նրա կազմակերպչական ջիղի, հետևողականության, նախանձախնդրության, ազգային շահերի գերակայության ընդունման:

Դժբախտաբար, Արամին վիճակված չէր երկար ապրել, շարունակել ազգօգուտ գործունեությունը և հայրենիքի կայունությունը դնել առավել ամուր հիմքերի վրա: Ժողովրդի հետ ամենօրյա շփումների մեջ գտնվող Արամ Մանուկյանը 1918թ. դեկտեմբերին վարակվեց երկրում մոլեգնող բժավոր տիֆով³⁰⁰: 1918թ. դեկտեմբերի 28-ին Արամը, ամենայն հավանականությամբ, վերջին անգամ մասնակցեց կառավարության նիստին³⁰¹, իսկ դեկտեմբերի 30-ին վերջին անգամ իր ստորագրությունը դրեց փաստաթղթի ներքո: 1919թ. հունվարի 3-ին ՀՀ վարչապետ Հ. Զաքազնունու կարգադրությամբ, Արամի հիվանդության պատճառով, ներքին գործերի նախարարի պաշտոնը ժամանակավորապես հանձնվեց խնամատարության նախարար Ալ. Խատիսյանին³⁰²: Այնուամենայնիվ, անկողնին գամված Արամը մնում էր հեղինակություն և շարունակում իր մասնակցությունը բերել գործերին: Այսպես, 1919թ. հունվարի 14-ին ՆԳՆ գրասենյակի կառավարիչը նրա «հանձնարարությամբ» գավառային կոմիսարներին խնդրում էր վերջ տալ պարսիկների հանդեպ որոշ տարրերի կողմից կատարվող ավազակություններին³⁰³: Բնականաբար այդ հանձնարարականը թելադրված էր Պարսկաստանի հետ բարիդրացիական հարաբերություններին չվնասելու մտահոգությամբ:

Արամը վախճանվեց 1919թ. հունվարի 29-ին, ժամը 14: 30-ին³⁰⁴, բժավոր տիֆից և թոքատապից³⁰⁵: Նրա մահը ծանր հարված էր դեռևս խանձարուրում գտնվող հայոց պետականության և բազմաչարչար հայ

²⁹⁹ Ռուբեն, հ. 7, էջ 312-313:

³⁰⁰ Ի դեպ, 1918թ. դեկտեմբերի սկզբին Արամը կտրականապես մերժել էր ընդգրկվել Փարիզի խաղաղության խորհրդաժողովին մասնակցելու նախադրյալ ստեղծվող Ավ. Ահարոնյանի պատվիրակության մեջ և մեկնել Եվրոպա. Տես՝ Ամատունի 3., Անդրկովկասեն Կ. Պոլիս (Ապրուած օրեր), «Հայրենիք», 1940, հոկտեմբեր, N 12, էջ 72:

³⁰¹ Հ ԱԱ, ֆ. 199, ց. 1, գ. 207, ք. 51:

³⁰² Նույն տեղում, ք. 50:

³⁰³ Նույն տեղում, ֆ. 201, ց. 1, գ. 20, ք. 4:

³⁰⁴ Նույն տեղում, ֆ. 199, ց. 1, գ. 231, ք. 2:

³⁰⁵ Նույն տեղում, ֆ. 47, ց. 6, գ. 363, ք. 36:

ժողովրդի համար: Արամի մահը ցնցեց հայ ժողովրդին, պետական, հասարակական ու կուսակցական գործիչներին:

Որպեսզի պարզ լինի Արամի մահվան ողջ ահավորությունը, խոսքը տանք Ս. Վրացյանին, որը գրել է. «...Դրոյի բնակարանում նստած էինք ճաշի: Յանկարծ, դրսի դրան զանգը հնչեց, եւ Դրոյի կինը՝ Արփենիկը ներս բերաւ սարսափահար աչքերով մի երիտասարդ: _Արամը մեռաւ, ասաց նա: Դրոյի ծնօրից վար ընկաւ ապուրի գոլալը: Առանց մի խօսք արտասանելու՝ նա դուրս թռաւ սենեակից»³⁰⁶: ԴՅ կառավարությունը, ԴՅ դաշնակցության Հայաստանի և Արևելյան բյուրոները, Խորհրդարանի և քաղաքային դումայի ֆրակցիաները, արևմտահայ և տեղական կոմիտեները և այլ մարմիններ անհուն վշտով ազդարարեցին Արամի մահը³⁰⁷: Երկրի տարբեր կողմերից ուղարկվեցին բազմաթիվ ցավակցական հեռագրեր, որոնք նաև ծոն էին Արամի հիշատակին³⁰⁸: Արամի հուղարկավորության օրը սրտառուչ դամբանականներ արտասանեցին Խորեն եպ. Սուրադբեկյանը, Դ. Քաջազնունին, Ն. Աղբալյանը և աչքի ընկնող բազմաթիվ այլ գործիչներ:

Հանդես գալով ԴՅԴ Արևելյան բյուրոյի անունից՝ Ն. Աղբալյանը նշեց. «...մենք այս օր պիտի թաղենք մեծ մարդը, զոր հայ ժողովուրդը տուած է մեծ պատերազմի ընթացքին: Ի՞նչ է մեծ մարդը_Մեծ մարդը ան է, որ գիտէ ըմբռնել ժամանակի հարցը և որո՞նք էին այս վերջին շրջանի մեծ հարցերը, որ համայն հայ ժողովրդին կը պատկանէին_հայ ժողովրդի պաշտպանութեան և ազատութեան հարցերն էին ատոնք ...Վանը բոլորի յիշողութեան մէջն է, հոն_Արամը հանդիսացաւ հայու հերոսական ոգին, փրկելով անոր ռազմական պատիւը: Երևանը վկայ էր այն հզոր ուժին, որ կար և կապրեր անոր մէջ, որ կազմակերպեց դիմադրութեան ուժը և այդ դիմադրութեան շնորհիւ կարողացաւ հիմք դնել Հայաստանի Հանրապետութեան, հայ ժողովրդի ազատագրութեան»: Նա հավաքված բազմությանը նշում էր. «Երբ գիշերը գայ, մտէք ձեր հոգիի սենեակը և խօսեցէք ձեր խղճի հետ և ըսէք, արդեօք աշխատե՞ր էք հայ ժողովրդի

³⁰⁶ Վրացեան Ս., Կեանքի ուղիներով, հ. Ե, էջ 50:

³⁰⁷ Դ ԱԱ, ֆ. 199, ց. 1, գ. 231, ք. 2; ֆ. 4047, ց. 1, գ. 135, ք. 2:

³⁰⁸ «Զանգ», 1919, փետրվարի 9, N 16:

համար, ինչպես Արամը, եղե՞ր էք այնքան անձնագոհ, որքան Արամը, տե՞ր էք ձեր ամբողջ կեանքը հայ ժողովրդին, ինչպես Արամը...»³⁰⁹:

Հուղարկավորությունը կատարվեց փետրվարի 1-ին, շաբաթ օրը, ս. Պողոս-Պետրոս եկեղեցում կատարված ս. պատարագից հետո, ժամը 11-ին, թմրամոթների որոտի ներքո³¹⁰: Հուղարկավորությանը մասնակցում էին պետական հիմնարկների, զինվորական զնդերի, քաղաքական կուսակցությունների, գավառային համայնքների, արևմտահայ տարբեր մարմինների, ուսուցչական խմբերի և այլ մարմինների ներկայացուցիչներ, բազմահազար ժողովուրդ: «Հայ ժողովուրդը Արամին արաւ մի յուղարկաւորութիւն, որպիսին չէր տեսել Երեւանը. ամբողջ քաղաքը լալիս էր եւ երկիւղածութեամբ հետեւում նրա դագաղին», գրել է Ս. Վրացյանը³¹¹: Ա. Աստվածատրյանը նշել է. «Արամի յուղարկաւորութիւնը համաժողովրդական մեծ սուգ էր: Հազարաւոր մարդիկ եկել էին վերջին յարգանքը մատուցանելու այն մարդուն, որին վստահել էին իրենց բախտը կեանքի ամենածանր օրերին: Ես գիտէի, թէ ի՞նչ էր եղել Արամը այդ ժողովրդի համար, բայց եւ այնպէս, երբ դագաղը դուրս բերինք բնակարանից, այն, ինչ որ տեսայ դուրսը մի վայրկեան սթափեցրեց մեծ կորուստի ազդեցութիւնը ու զարմանք պատճառեց: Աչքդ որ կողմ ուղղում էիր՝ ծով բազմութիւն...Ամբողջ քաղաքը, մեծ ու փոքր, դուրս էին եկել փողոց: Պօղոս-Պետրոս եկեղեցուց սկսած մինչեւ հանգստարան դիակառքը մնաց դատարկ: Դագաղը տանում էին ձեռքերի վրայ»³¹²: Դագաղը տանողները վանեցիներն էին, որոնց հետ նա անց էր կացրել մի ամբողջ կյանք:

³⁰⁹ «Աշխատանք», 1919, փետրվարի 12, N 4; Վրացեան Ս., Կեանքի ուղիներով, հ. Ե, էջ 54-55:

³¹⁰ Հ ԱԱ, ֆ. 199, ց. 1, գ. 231, թ. 1, գ. 207, թ. 57; ֆ. 47, ց. 6, գ. 363, թ. 36;

Վրացեան Ս., Կեանքի ուղիներով, հ. Ե, էջ 51-53:

³¹¹ Յուշապատում Հ.Յ. Դաշնակցութեան, էջ 467; «Դրօշակ», 1929, հունվար-փետրվար, N 1-2, էջ 28:

³¹² Աստուածատրեան Ա., Արամ, «Հայրենիք», 1964, օգոստոս, N 8, էջ 41; «Արամը», էջ 145:

Արամ Մանուկյանը հայոց պատմության մեծերից է, Հայաստանի առաջին համրապետության հիմնադիրը, հայոց նորագույն պատմության մեջ իր կատարած դերով ամենախոշոր ազգային-քաղաքական ու պետական դեմքը:

Հասակ առնելով մի ժամանակաշրջանում (1880-1890-ական թթ.), երբ հայ ազգային-ազատագրական շարժումը թևակոխել էր բարձրագույն՝ զինված պայքարի փուլը, երբ հայությունը տարված էր արևմտահայության ազատագրության գերագույն խնդրով, Արամն անդամագրվեց հայ ազատամարտի առաջատար ուժ ՀՀ դաշնակցությանը և իր ամբողջ կյանքն անմնացորդ նվիրեց հայ ժողովրդի ազատության սուրբ գործին:

Նրա հայացքներն ազատագրական շարժման վերաբերյալ, ինչպես նաև այդ ուղղությամբ ձեռնարկած քայլերն աչքի ընկան նպատակասլացությամբ, հետևողականությամբ ու հիմնավորվածությամբ:

Արամի համոզմունքն էր, որ ազգային-ազատագրական պայքարի դրոշ պարզած հայ ժողովուրդը պետք է ապավինի սեփական ուժերին: Այդ իսկ պատճառով նա սկզբնապես՝ Կարսում գործելու ընթացքում (1903-1904թթ.), փորձում էր զինատար խմբերի կազմակերպման իր մասնակցությունը բերելով հասնել հայոց ներուժի հզորացմանը, ապա՝ Վանում գործելու առաջին շրջանում (1905-1906թթ.) անդադրում աշխատում էր ընդհանուր ապստամբության համար անհրաժեշտ հիմքերի ստեղծման ուղղությամբ, որը հաջողության հասնելու կարևորագույն գրավականներից մեկը կարող էր լինել:

1908թ. երիտթուրքական հեղաշրջումից հետո Արամն արտահայտվեց երիտթուրքերի հետ գործակցելու իր կուսակցության քաղաքական գծի օգտին՝ հուսալով այդ կերպ հասնել արևմտահայության դրության բարելավմանը: Սակայն, երիտթուրքական կուսակցությունը կարճ ժամանակում ապացուցեց, որ ինքը սուլթանական վարչակարգի արժանի հետևորդն է և կայսրության այլազգիների, այդ թվում հայ ժողովրդի հետ հաշվեհարդար տեսնելու համար ոչ մի միջոցի առջև կանգ չի առնելու: Ստեղծված իրավիճակում Արամը, որը երբեք չէր մտածել վերջ տալ

ինքնուրույն ազգային շարժմանը, դարձյալ հակվեց, այլևս անդառնալիորեն, ազգային ուժերով ազգային խնդիրները վճռելու գաղափարին:

Երբ սկսվեց Առաջին աշխարհամարտը, Արամը նախ փորձեց թուրքական իշխանությունների հետ բանակցությունների միջոցով Վանի հայությանը փրկել զրկանքներից ու ջարդերից: Իսկ երբ խաղաղ միջոցներով այլևս անհնար դարձավ կանխել հայոց մեծամասշտաբ ջարդերը, գործակցելով Վանի քաղաքական այլ ուժերի հետ Արամը հաջողությամբ կազմակերպեց ու ղեկավարեց Վանի 1915թ. ապրիլյան հերոսամարտը՝ հանդիսանալով նրա ոգին: Հաղթական ինքնապաշտպանությամբ ոչ միայն ապացուցվեց, որ ճիշտ ղեկավարվելու և միասնականորեն գործելու դեպքում հայությանն անհնար է հաղթել, այլև վասպուրականահայությունը փրկվեց թուրք ցեղասպանների ճիրաններից:

Վանի նահանգապետի պաշտոնում նա լիովին վեր հանեց իր կազմակերպչական տաղանդը, ազգային-պետական մտածելակերպն ու անխտրական ոգին: Առաջնորդվելով հայ ժողովրդի շահերով՝ նա գործի լծեց բոլոր կարող ուժերին, ինչ կուսակցության էլ նրանք պատկանեին: Արամի հմուտ կառավարման շնորհիվ Վան-Վասպուրականի նահանգապետությունն ապրեց այնպիսի զարգացում, որ այն կարելի է անվանել հայոց նորագույն պետականության նախատիպ:

1915թ. հուլիսին, երբ ռուսական բանակը Վանից բռնեց նահանջի ուղին, Արամը՝ հանդես բերելով ազգային-պետական մտածողություն և պատասխանատվության բարձր զգացում իր ժողովրդի հանդեպ, վճռականապես դեմ արտահայտվեց գաղթին: Սակայն գաղթի կասեցումը նրա և հայրենամկեր մյուս ուժերի կամքից վեր գործ էր:

1915-1917թթ. Արամի գործունեությունը հիմնականում աղերսվեց ցեղասպանությունից մազապուրծ արևմտահայ փախստականության ճակատագրի հետ աչքի ընկնելով նպատակաւացությամբ ու հետևողականությամբ: Միաժամանակ, նա իր մասնակցությունը բերեց ՀՀԴ ձեռնարկներին և արևելահայությանը հուզող խնդիրների լուծմանը:

1917թ. ռուսական փետրվարյան հեղափոխության, բայց առավելապես հոկտեմբերյան հեղաշրջման հետևանքով ռուսական Կովկասյան ռազմաճակատի քայքայումը թուրքական ներխուժման սպառնալիքի տակ դրեց նաև Արևելյան Հայաստանը, որը հղի էր հայ ժողովրդի նոր

կոտորածների վտանգով: Հայության առջև հրամայաբար ծառացել էին հայոց բնօրրանի արևելյան հատվածի զգալի մասը զբաղեցնող Երևանի նահանգում ուժեղ իշխանություն ստեղծելու, կազմակերպված զորահավաք իրականացնելու և այլ հրատապ խնդիրներ: Հայ ժողովրդի համար բախտորոշ այդ պահին Թիֆլիսի Հայոց Կենտրոնական Ազգային և Հայ զինվորական խորհուրդների լիազոր-ներկայացուցչի կարգավիճակով Արամ Մանուկյանը գործուղվեց Երևան:

Հենց Երևանում էլ՝ 1917թ. դեկտեմբերից 1919թ. հունվար ընկած ժամանակահատվածում, առավելագույնս բացահայտվեցին Արամի կազմակերպչական տաղանդն ու ազգային-պետական մտածողությունը: Գիտակցելով տարածաշրջանում զարգացող ռազմաքաղաքական անցքերի հնարավոր վտանգավոր հետևանքները հայ ժողովրդի համար՝ Երևան հասնելուն պես Արամն ուրվագծեց հայ ժողովրդի պաշտպանությանն ու ազատությանը միտված պարզ և իրատեսական մի ուղեգիծ, ըստ որի հայ ժողովուրդը առաջին հերթին սեփական ուժերով պետք է հանգուցալուծեր իրեն հուզող բոլոր խնդիրները: Նա ցուցաբերեց աներևակայելի կազմակերպչական տաղանդ, նախածեռնողականություն, երկաթյա կամք, հետևողականություն և շրջահայացություն՝ ժողովրդական գիտակցության մեջ սեփական ուժերի նկատմամբ հավատն ամրապնդելու և համազգային շարժում կազմակերպելու համար:

Ինչպես Վան-Վասպուրականում, այնպես էլ Երևանում, գործելով բացառիկ պայմաններում, նա շատ արագ դարձավ կենտրոնական դեմք՝ իր ուժեղ, նախածեռնող կամքի, նրբամիտ կեցվածքի, գործող անձանց ու կազմակերպություններին իր հավասարակշիռ մոտեցումների և ապակուսակցական ոգու շնորհիվ հասնելով հասարակության հետ նրանից բարձրացող անհատի հակադրության բացառմանը: Այդ է պատճառը, որ նա ժողովրդական լայն զանգվածների, զորքի և Երևանի նահանգի Ազգային խորհրդի կողմից հռչակվեց նահանգի դիկտատոր, այսինքն՝ օժտվեց միանձնյա իշխանությամբ: Սշտապես պարզաբանելով իրականացվող քայլերի հրատապությունը, շեշտելով ժողովրդի և ռազմական ու քաղաքական ուժերի նկատմամբ իր հարգանքը, լինելով հավասարապես հետևողական իր խոսքում և գործում՝ նա կարողացավ ներգործել ժողովրդի վրա և նրան առաջնորդել դեպի հաղթություն: Ամիսներ

շարունակ Արամի նախանշած գաղափարական ու գործնական կոնկրետ ու հետևողական քայլերը, մայիսյան ճակատագրական օրերին նրա վճռական, առարկություն չընդունող դիրքորոշումը հօգուտ թշնամուն վճռական ճակատամարտ տալու և Երևանը պաշտպանելու, սթափեցրին թուրքական առաջխաղացման սարսափելի վտանգից անորոշության մատնված ժողովրդին և տևական պարտություններից հուսալքված զորքին ապահովելով հայ ժողովրդի ոչ միայն գոյությունը, այլև անկախ պետականության վերականգնումը: 1918թ. Հայաստանի Հանրապետության ստեղծման համար մեծապես պարտական ենք նրան և ամենևին էլ պատահական չէ, որ նա արժանացել է ՀՀ հիմնադրի կոչմանը: Ասվածից չի կարելի հետևություն անել, թե Արամը միայնակ կերտեց Հայաստանի Հանրապետությունը: Այն արդյունք էր ողջ ժողովրդի ու բազմաթիվ գործիչների գերմարդկային ջանքերի: Արամի մեծագույն ծառայությունն այդ բոլորին միավորելն ու մեկ նպատակի ուղղորդելն էր:

Սարդարապատի ճակատամարտից հետո Արամը, ստանձնելով անկախ Հայաստանի նախակառավարության նախագահի և զինվորական վարիչի պաշտոնները, ընդհանուր գործին շաղկապելով բանիմաց և հասարակության մեջ մեծ հեղինակություն վայելող ուժերին, կարողացավ նորանկախ երկիրը պահել համեմատական կայունության մեջ, մինչև որ ՀՀ կառավարությունը Թիֆլիսից տեղափոխվեց Երևան:

ՀՀ անդրանիկ կառավարության մեջ Արամն ուներ բացառիկ դիրք. նրան էին վստահվել միաժամանակ ներքին գործերի, լուսավորության, հաղորդակցության, պարենավորման, խնամատարության, մեր օրերի լեզվով ասած՝ նաև տարածքային կառավարման նախարարի լիազորությունները: Համալսարանական կրթության պակասն ինչպես միշտ, այժմ ևս նրան չխանգարեց վարելու խելամիտ ու նպատակային գործունեություն: Արամը՝ առաջնորդվելով ազգային-պետական մտածողությամբ, դրսևորելով կազմակերպչական տաղանդ, անձնական անշահախախնդրություն, նախաձեռնողականություն ու հետևողականություն, նպատակային և արդյունավետ գործունեություն ծավալեց երկրում ամուրի իշխանության և իրավակարգի հաստատման, վարչական մարմինների, հատկապես ՆԳ նախարարության ամրապնդման, երկրի հայացման և այլ ուղղություններում՝ այդ կերպ մեծապես նպաստելով նորաստեղծ պետա-

կանության ամրապնդմանը: Նրա մոտեցումների նույնականությունը բոլորի նկատմամբ՝ անկախ կուսակցական հանգամանքից, պետական և սոցիալական դիրքից, համեստ կենցաղը, հայրենասիրությունը գրավականներ էին իր և իշխանությունների հանդեպ ժողովրդական վստահության ամրապնդման և պետականության կայացման համար:

Արամ Մանուկյանի գործունեության ուսումնասիրությունը հաստատում է այն իրողությունը, որ ազգային արժեքներին անկեղծորեն նվիրվելու, իրապես ազգային նպատակներ հետապնդելու, ազգային ուժերին ապավինելու, հաստատակամ, հավասարակշիռ ու անշահախնդիր գործելու դեպքում հայ քաղաքական, պետական, ռազմական գործիչներն ու ուժերը կարող են համախմբել ժողովրդին և նույնիսկ ամենածանր իրավիճակներից հաղթանակով դուրս գալ: Հակառակ դեպքում, երբ նրանք՝ 1) կանտեսեն ազգային արժեքներն ու շահերը և կառաջադրեն երևութական ազգային գաղափարներ ու ծգտումներ, 2) մեր ժողովրդին կմատուցեն այլ ժողովուրդների և քաղաքակրթությունների առաջադիմական կամ այդպիսին ներկայացվող կենսակերպերը, որոնք, սակայն, անհարիր են հայության ազգային ու բարոյական նկարագրին, 3) կապավինեն տարատեսակ գրավիչ դիմակներով պարբերաբար հայտնվող արտաքին ուժերին կամ կընդունեն նրանց կողմից առաջարկվող պարտադիր «օգնությունը», կհետամտեն նրանց ներկայացրած անվերապահ կենսագործման ենթակա «զարգացման» ծրագրերը, անհնար կլինի հասնել ժողովրդի կենսամակարդակի բարձրացմանը, ազգային ներուժի հզորացմանն ու անկախ պետականության ամրապնդմանը, որոնք ազգային հեռահար նպատակների կենսականացման երաշխիքներն են:

Արամ Մանուկյանի հայրենամուտը, փոթորկահույզ կյանքն ու գործունեությունը ուսանելի օրինակ է հայ ժողովրդի ներկա և գալիք սերունդների համար: Երիցս ընդունելի է գործչի մահվան 90-ամյակի կապակցությամբ նրա շիրիմին մատուցված հոգեհանգստյան արարողության ժամանակ ՀՀ ներկայիս վարչապես Տիգրան Սարգսյանի արտահայտած միտքը. «Այսօր էլ պետք են Արամ Մանուկյանի պես անկոտրում կամք եւ կազմակերպչական ունակություններ ունեցող մարդիկ: Մենք դեռ պետք է շարունակենք նրա գործը»³¹³:

³¹³ «Երկիր», Երևան, 2009, հունվարի 30, N 3, էջ 3:

SUMMARY

In the monograph on the bases of archives documents, timely press, printed and non-printed other primary sources, memorandum and historical different literature is scientifically elucidated the whole history of life and activity of Aram Manukyan (1879-1919) – the devoted person to the national liberation movement, national political figure and statesman, honored to the exclusive rank as the founder of the first Republic of Armenia(RA).

The monograph consists of introduction, three chapters, conclusion and the lists of used literature and sources.

The main conclusions of the work are:

In 90^{es} of the 19 century by accepted to Hay Heghapokhakan Dashnakcutyun Party Aram Manukyan has fought against the freedom of Armenians up to the end of his life. He was sure that Armenians who had raised the liberating flag against Turkish yoke must rely upon his own power.

During the first world war Aram had tried to keep away the Armenians of Van from the large scale of the violence of Turkish. In April of 1915, by collaborating with other political forces, he had organized self-defence of Van, owing to which Van was saved from massacre, to what were given one and a half million Armenians from other marzes of Western Armenia.

In 1918 the ideological and practical consistent steps signed by Aram, his decisional orientation on beginning the battle in favour of Turkish on fatal days of may and on protecting Yerevan, had brought the despaired nation and forces to senses from the horrible danger of attack of Turkish by providing not only the existence of Armenians but also by reestablishing the independent statehood. We are obliged to him for establishing the Republic of Armenia and it isn't casual that only he has been honored with the title of founder of RA.

ԲՈՎԱՆԴԱԿՈՒԹՅՈՒՆ

ԵՐԿՈՒ ԽՈՍՔ	5
ԳԼՈՒԽ ԱՌԱՋԻՆ	
ԱԶԳԱՅԻՆ—ԱԶԱՏԱԳՐԱԿԱՆ ՇԱՐԺՄԱՆ ՏԱՐԻՆԵՐԻՆ	12
Արամ Մանուկյանի մոտքը ազգային-ազատագրական շարժում	12
Արևմտյան Հայաստանում 1905-1907թթ.	16
Երիտթուրքական հեղաշրջման ժամանակաշրջանում	25
ԳԼՈՒԽ ԵՐԿՐՈՐԴ	
ԱՌԱՋԻՆ ՀԱՄԱՇԽԱՐՀԱՅԻՆ ՊԱՏԵՐԱԶՄԻ ՏԱՐԻՆԵՐԻՆ	31
Վանի հերոսամարտի կազմակերպումը	31
Վան-Վասպուրականի նահանգապետը	37
Ազգային-քաղաքական գործունեությունը 1916-1917թթ.	41
ԳԼՈՒԽ ԵՐՐՈՐԴ	
ԱՆԿԱԽ ՊԵՏԱԿԱՆՈՒԹՅԱՆ ՎԵՐԱԿԱՆԳՆՄԱՆ ՈՒ ԿԱՅԱՑՄԱՆ ՈՒՂԻՆԵՐՈՒՄ	46
Ազգային ուժերի համախմբումը թուրքական ներխուժման դեմ	46
Արևելյան Հայաստանում	46
Արամ Մանուկյանի հռչակումը Երևանի դիկտատոր	57
Սարդարապատի հերոսամարտի կազմակերպումը	63
Հայաստանի Հանրապետության ստեղծումը	71
ՀՀ ներքին գործերի առաջին նախարարը	81
ՎԵՐՋԱԲԱՆ	107
SUMMARY	112

ԱՐՄԵՆ ՍԵՐՅՈԺԱՅԻ ԱՍՐՅԱՆ
ԱՐԱՍ ՄԱՆՈՒԿՅԱՆ. ԿՅԱՆՔԸ ԵՎ ԳՈՐԾՈՒՆԵՌՈՒԹՅՈՒՆԸ

АРМЕН СЕРЕЖАЕВИЧ АСРЯН
АРАМ МАНУКЯН: ЖИЗНЬ И ДЕЯТЕЛЬНОСТЬ

Տեխնիկական խմբագիր՝
Համակարգչային շարվածքը՝
Տպագրիչ՝

ԳԱՅԱՆԵ ԲՈՔՈՒՅԱՆ
ԱՐՄԵՆ ԱՍՐՅԱՆԻ
ԼԵՎՈՆ ՍՈՒՐԱԴՅԱՆ

ՀՀ ԳԻՏՈՒԹՅՈՒՆՆԵՐԻ ԱԶԳԱՅԻՆ ԱԿԱԴԵՄԻԱ
ՊԱՏՄՈՒԹՅԱՆ ԻՆՍՏԻՏՈՒՏ

375019, Երևան 19, Մարշալ Բաղրամյան 24^Գ

[1000, m]

ԳԱՍ Հիմնարար Գիտ. Գրադ.



FL0143505

